




6  
19-c  
62



~~6-19-c-62~~

a. a. s.

21.





# CAROLI DE AQUINO

SOCIETATIS JESU  
CARMINUM

*Tomus I.*

LIBRERIA NAZ.  
ROMA  
1801



ROMÆ, MDCCI.

Ex Typographia Antonii de Rubeis  
in Platea Cerenfi.

---

*Superiorum Permissu.*

1

2

3

4

5

6

7

8

9

10

11

12

13


14

# THYRSUS GONZALEZ

*Præpositus Generalis Societatis Jesu.*

**C**UM librum, cui titulus : *Carminum Tomus Primus*, à P. Carolo de Aquino Societatis nostræ Sacerdote compositum, aliquot ejusdem Societatis Religiosi recognoverint, & in lucem edi posse probaverint, facultatem facimus, ut typis mandetur, si iis, ad quos pertinet ita videbitur: cujus rei gratiâ has literas manu nostrâ subscriptas, & sigillo nostro munitas dedimus. Romæ 14. Decembris 1700.

*Thyrus Gonzalez.*




*Imprimatur,*

Si videbitur Reverendissimo Patri Magistro Sac. Pal. Apostolici.



*Dominicus Bellisar. de Bellis Episc. Melphiten. Viceg.*



*Imprimatur.*

Fr. Paulinus Bernardinus Ord. Præd. Sac. Pal. Apost. Magist.

Hoc

Hoc I. Tomo continentur

*Epigrammatum Libri IV.*

*Miscellaneorum Liber I.*

*Anacreon recantatus.*



## EPIGRAMMATUM

## LIBER I.

## AD PUERUM IESUM

*Verbum abbreviatum.*BIBLIOTHECA HAZ  
ROMA

## EPIGRAMMA I.

**I**ngeniosa vocant Vates Epigrammata, ludunt  
 Candida quæ brevibus carmina culta modis.  
 Humanos, DIVINE PUER, collectus in artus  
 Tu quoque dum magni ludis amoris opus,  
 Annue (namq; habeant tibi solum inscripta nitorem)  
 Ante tuos properent Carmina nostra pedes.  
 Argutos à te lusus concludere discent:  
 Pulchrior adstricto clausula nulla DEO;

## AD TUMULUM

## JOANNIS III.

## POLONIÆ REGIS.

## EPIGRAMMA II.

**A**dde novos cineri flores; venerare jacentem;  
 Qua pugnante stetit celsa VIENNA, manum;  
 Quæ si cessasset; Getici fortasse Tyranni  
 Tu quoque jam ferres, qui legis ista, jugum.

A 3

JULIUS

6 EPIGRAMMATUM  
JULIUS CÆSAR,

*Amputato Pompeji capite inspecto,  
lacrymas fundit.*

EPIGRAMMA III.

**N**ON Cilicum messes, nec odoris balsama succis  
Æternant Cineres, Magne superbe, tuos:  
Balsama Cæsarei sunt immortalia luctus;  
Ille liquor totâ plus valet Arabiâ;  
Seû verax, seû ficta fluat tibi lacryma, CÆSAR,  
Extinctum fletus laudat uterque Ducem;  
Lacryma namque novos verax testatur amores;  
Testatur veteres lacryma ficta metus.

A L I U D

EPIGRAMMA IV.

**E**FFUSIS quamvis, CÆSAR, tibi fletibus undent  
Pectora, fata tamen non satis ista gemis.  
Tunc dignè fleres hæc funera; tradere posset  
In lacrymas oculos si tibi ROMA suos:  
Verum ROMA oculos meliores servat in usus;  
Nimirum cladem cernat ut illa tuam.

ALIUD

## ALIUD

## EPIGRAMMA V.

**I**N lacrymas CÆSAR solvit sua lumina, Magni  
 Avulsum Phario dum videt ense caput.  
 O quantum humani Pharsalia sanguinis hausit,  
 Has tandem ut posset fundere CÆSAR aquas!

A D

## MARTINUM LUTHERUM

## EPIGRAMMA VI.

**F**Oedanti tibi cuncta, lutum cognomina; nomen  
 Omnia turbanti Mars tibi ritè dedit.

A D

## CHRISTI DOMINI

*In Cruce pendentis effigiem scriptorio  
 calamo punctim expressam.*

## EPIGRAMMA VII.

**N**On elephas, NUMEN, tua funera sectus adumbrat;  
 Succina nec lento cortice gutta fluens;

A 4

Luci.

# 8 EPIGRAMMATUM

Lucida non simulant pretiosæ frigora rupis;  
 Imo quæque rubet virga resecta mari:  
 Pagina sola refert, istu quæ saucia crebro  
 Atras Dedalææ cuspidis hausit aquas:  
 Sed, si sola tuum componunt vulnera corpus,  
 Hæc primæ effigies nomina laudis habet:  
 Nam, Calamo punctim semper feriente papyrum,  
 Hoc etiam solo vulnere constat opus.

PERTARITUS LONGOBARDORUM REX  
*armatos hostes declinat, dum pelle  
 ab Urso detracta contectus,  
 ipse Ursu assimilatur.*

## EPIGRAMMA VIII.

INDUIS URFINIS, PRINCEPS, dum corpora setis,  
 Hostiles rara decipis arte manus.  
 Hæc pellis Cælum, non Parrahasis Ursa teneret;  
 Illic si posset fraudibus esse locus.  
 Felix, ne properæ sentiret frigora mortis,  
 Quæ texit Dominum pellis amica suum.

## A L I U D

## EPIGRAMMA IX.

FORTUNAM accufes, quod bellua contegat horrens,  
 Cui vestis Serum flamine texta fuit.

Sed



Sed PERTARITUM bene si perpendis utrumque;  
 Plus fœdo inclusus vellere lucis habet:  
 Nunc saltem spoliis discit clarere ferarum;  
 Vermiculi exuviis ante superbus erat.

## AD CRISPINUM

*Noctu per vias, amatorias cantilenas  
 modulantem.*

## EPIGRAMMA X.

CUM, CRISPINE, meam prætergraderere fenestram;  
 Mollia concubiâ carmina nocte canens,  
 Tu mihi succenses; nimias effuderit undas  
 Peluis in immeritum quod jaculata caput:  
 Ignem audieram clamantem, incendia, flammæ;  
 Ustum nescio quâ teque perire face:  
 Quid facerê? ad subitum ut mos est clamâtibus ignem;  
 Adduxi promptas commiseratus aquas.

*Vulcani Statua in Fonte.*

## EPIGRAMMA XI.

VULCANUM, Ætnæo dum fudat anhelus in antro,  
 Urebat longo parta labore sitis:  
 Ad fontem properat; totumque in pectore condit;  
 Aruit absorpto nuda liquore silex:

Nais

# TO EPIGRAMMATUM

Nais aquæ custos, fumoso irata Magistro,  
 Redde; ait, ereptas, improbe, fontis opes.  
 Jamque fugam parat ille; fugam natura negabat;  
 Arcanoque pedes dirigere gelu.  
 Grandia marmorea durescunt membra figura:  
 Mutato rident Numine Najades.  
 Ore, sinu, latices fundens, quas gutture vasto  
 Sustulit, æterno sœnore reddit aquas.

AD LINUM, *qui malum librum Au-  
 thoris censuræ subjecerat.*

## EPIGRAMMA XII.

OMnes mi unguiculi peristis, omnes;  
 Sacer vos malè perdidit libellus,  
 Nugarum satur, atque ineptiarum,  
 Posset, ut juga Caucaſi nivalis,  
 Thermas reddere qui Neronianas.  
 Tractu perpete morſiuncularum  
 Malas dum foditis, rudes tabellas,  
 Iratas Venerique, Gratiisque;  
 Ægri ſomnia; Tethyosque tantùm  
 Dignas, aut Amathuntidos Marito;  
 Omnes mi unguiculi peristis, omnes.  
 Sed tu ſic iterum inquinare chartas  
 Si pergis, LINE; Cum libido mentem  
 Afflarit mala; ſi ſapis, Britannos  
 Cenſores tibi comparabis Urſos,

CIMO.

CIMONEM *captivum Filia lacte  
clam pascit.*

## EPIGRAMMA XIII.

U  
Beribus natæ innexum, colloque reclivem  
Ut Pietas celso vidit ab axe Patrem,  
Erubuit, demissa genas; sua pectora & anceps  
Admota explorat terque, quaterque manu.  
Furtivo Patrem reficit quæ lacte Puellam,  
Ubera namque sibi surripuisse timet.

## A L I U D

## EPIGRAMMA XIV.

D  
Um lacti lacrymas misceret nata Parenti,  
Has dolor; hoc, dixit, sed tibi fundit amor.  
Ille refert; lac dulce licet sit, Filia; in istis  
Nescio quid lacrymis dulcius esse puto.  
Ritè probas lacrymis te natam; lacte parentem;  
Quæ simul es misero nata, parenſque Patri.

A D

P. SYLVESTRUM MAURUM

*in Theologicis disciplinis Præceptorem  
meum Aristotelis opera Periphrasi  
nitidissima illustrantem.*

EPIGRAMMA XV.

**E**Xponis nitidè, veluti caligine sacra  
Quod prius obductum, MAURE, latebat opus.  
Candidus Eloquio non hæres anxius usquam;  
Et salebra æquatum nulla retardat iter.  
Accessisse juvat: Nimirum hoc fonte recepta,  
Clara Stagiræi Solis Imago nitet.

A L I U D

EPIGRAMMA XVI.

**U**Num subsequeris, præcellis & omnibus unus;  
Exemplum, exemplar tuque secutus, cris.  
Tene sequi metuat Ductorem cœtera turba,  
Ipsum qui certa dirigis arte Ducem?

A D

AD COSMUM III.  
MAGNUM ETRURIÆ DUCEM,

*Cum* LAURETANÆ VIRGINIS *Ædiculam*  
*de genu verreret.*

## EPIGRAMMA XVII.

EXpiet ut vitæ sordes, animumque nocentem,  
VIRGINIS Hospitium plurimus Hospes adit:  
Sed qui purum animum sacras inducit in Ædes,  
Marmora, quæ solum tergere possit, habet.

## A L I U D

## EPIGRAMMA XVIII.

CUM Reges animo superes; ditione laceſſas,  
Quod defunt, querimur, Regia sceptrâ tibi:  
Sed, quo VIRGINEÆ mundas sacraria cellæ,  
Verriculo invident Regia sceptrâ tuo.

## A L I U D

## EPIGRAMMA XIX.

GRande pavementum fatures Gangetide gaza;  
Luceat Eoo lectus in Orbe lapis;  
Purius

14 EPIGRAMMATUM

Purius haud facies ; nam longe est clarius illi,  
 A tanta detur quod nituisse manu.  
 Te quoque fusa humeris licet auro sutilis ornet,  
 Et rigeat multo dives Hydaspes chlamys ;  
 Splendidius radiare tamen nunc incipit illa,  
 Pulvere VIRGINEÆ nobilitata Domus .

A L I U D

EPIGRAMMA XX.

**D**Um tua pulveream manus excitat aëre nubem,  
 Relligiosa refert præmia digna manus :  
 Divini propius videas ut lumina Solis,  
 Ipsa oculos acuit pulveris umbra tuos.

AD XERSEM PERSARUM REGEM,  
*Cum Atho monte perforato, & con-*  
*tabulato Hellesponto, vanesceret.*

EPIGRAMMA XXI.

**Q**uid miscere juvat, XERSES, terrasque, salumque?  
 Per modo calcatas victus abibis aquas.  
 Durus Athos, fateor ; sed Græcia durior illo:  
 Æquoris est fallax unda ; sed illa magis .

LYSI.

LYSIMACHUS *frigidaë haustu Regnum  
vendit.*

## EPIGRAMMA XXII.

LYSIMACHUS lymphæ vulgaria munera Regno  
Vendidit: hæc nimis est ambitiosa sitis.  
Quos æstus pariet regali in pectore, qui nunc  
Venalis sedat guttura sicca latex?  
Non opus est sævis diffringere claustra procellis;  
Nec tremat emoto concita terra sinu:  
Ferali ut videas absorpta voragine Regna,  
Insidiantis aquæ sufficit urna brevis.

*Ad Posthumum Medicum: De Prisco  
ægotante.*

## EPIGRAMMA XXIII.

Sanguineas ageret PRISCUS cum naribus undas;  
Et domitus nulla sisteret arte cruor;  
Accitus properè languentem, POSTHUME, visis;  
Et vultu, quo non fædior alter, ades.  
Substitit extemplo vis improba sanguinis, illum  
Corripuit tetro tantus ab ore timor.  
Non alius morbos abigit te doctior: ægris  
Tu non es Medicus, sed medicina tuis.

AD

AD GALLAM, *cum velo undique pellucente  
umeros tegeret.*

## EPIGRAMMA XXIV.

**I**ncustodito dum tu pellucida collo,  
Templa frequens tumida fronte, viasque teris;  
Vis dicam? Miserum bis perdis, GALLA, pudorem;  
Vestibus, & membris exulat ille tuis.  
Quid dicam; vultus, & colla procacia conde:  
O pudor! ipsa petunt jam tegumenta tegi.

A L I U D

## EPIGRAMMA XXV.

**N**olo mamillare, aëreo quod tenuia ductu  
Licia texuerint: crassa Minerva mea est.

A L I U D

## EPIGRAMMA XXVI.

**S**at credis tali frontem prætexere velo:  
Quidni? Juro equidem: Nil mihi frontis habes.

AD



## AD CAROLUM V. CÆSAREM

*Horologium in annulo gestantem.*

## EPIGRAMMA XXVII.

**I**Nclyta bis septem tibi servit Iberia Regnis;  
 Et latè domitis Rhænus, & Ister aquis.  
 Te flavus colit Eridanus; te Scylla, tuetur  
 Littora quæ multo dissociata cane.  
 Cum propè jam videat tua splendens omnia Titan;  
 Seu revehat fessum, seu ferat ille diem.  
 O mirum! negat hoc solum tua jura vereri,  
 Quod tua captivum dextera, tempus, habet.

## A L I U D

## EPIGRAMMA XXVIII.

**N**on tibi chrysolitis; tibi non incensa pyropis,  
 Gestat Erythræi dextera furta maris:  
 Baccarum nec rore nitet; nec jaspide fulva;  
 Nec spoliis Arabum Sardonycata tumet.  
 Annulus articulum decorat, qui divite gyro  
 Inclusum aurato carcere tempus habet:  
 Pace tua, Ganges; gemmâ pretiosior istâ  
 Cæsareâ poterat nulla nitere manu.

B

ALIUD

## ALIUD

## EPIGRAMMA XXIX.

**T**empora dū nūmerās tibi fulgurat annulus auro,  
Tu Dominus gaudes illius; ille tuus.

## AD FRANCISCUM PHILELPHUM

*Timothei Grammatistæ Græci barbam  
vellentem, quam, de unius syllabæ  
natura certantes, mutua sponſione  
oppigneraverant,*

## EPIGRAMMA XXX.

**R**omanæ cōlumen, decusq̃ue linguæ,  
Grajarumq̃ue, PHILELPHE, litterarum;  
Ut verum ingenueq̃ue, candideq̃ue,  
Et palpo procul, aulicisq̃ue fucis,  
Imis, ut latet, extraham medullis;  
Nec pulchrum satis, & parum decorum  
Pelasgam fuit amputare barbam,  
Quam nec Cinyphius gerit Maritus,  
Te Senem rigidum, gravem, severum,  
Et supercilio Catoniano,  
Et qui plus sapiſ Atticis Salinis.  
Namque, ut præteream, bono sodali  
Tot cultam malè Sylyulam per annos,

Et

Et tantum periisse dignitatis:  
 Ut nec commemorem, manus cruentas  
 Non Musis hominem, jociſquē natum,  
 Nec virum decuiſſe liberalem:  
 Illud præcipuē reor ſiniſtrum,  
 Nec famæ tibi commodum futurum;  
 Viris Poſteritas verenda Doctis  
 Quod te, cætera maximum Virorum,  
 Romanæ columen, decuſquē linguæ,  
 Grajarumquē, PHILELPHE, litterarum,  
 Scriptores feret expilaſſe Græcos.

# DIVÆ TERESIÆ

*Pectus ab Angelo telo tranſfigitur.*

## EPIGRAMMA XXXI.

**H**ispana Puer æthereus ſe Virgine vinci  
 Non tulit, & flammis æmula corda ſuis.  
 Ergo petens validis pectus rivale ſagittis,  
 Trajecto Divæ corde ſuperbus ovat.  
 Ne plaudas tibi, blande Puer; tu victus arena  
 Diſcedis; palmam, quæ jacet, illa tulit.  
 Neſciſ, quas habéat leges certamen amoris?  
 Hic, qui plura refert vulnere, victor abit.

## A L I U D

## EPIGRAMMA XXXII.

**V**irgo, quod tantæ vivas post cuspidis ictum,  
 Non ego prodigium, parce, fuisse, puto.  
 Non habuit vires, queis pectora lædere posset,  
 Flammis in cineres versa sagitta tuis.

LYCURGUS *Thraciæ vites jubet excindi.*

## EPIGRAMMA XXXIII.

**P**ampineo vites cernens de Colle LYCURGUS,  
 O Socii, Nobis bella parantur, ait:  
 Procumbat duris excisa bipennibus arbos,  
 Non ullus Patriæ sævior hostis erit.  
 Hebræ fat cautum est, pubes ne Thressa sitiret  
 Sed fallor; Thraci est sanguinis una sitis,

## A L I U D

## EPIGRAMMA XXXIV.

**I**ndomiti Thraces bello, & regnata Gradivo  
 Littora Bacchæo nectare rite carent:  
 Quid faceret multo venas perfusa Lyæo,  
 Sobria si tantum turba furoris habet?

ALIUD

## A L I U D

## EPIGRAMMA XXXV.

IMmemor adductis Bromium qui frangere Nymphis,  
 Excindi vites, germina blanda, jubet;  
 Conjecisse mihi quantum licet; ebrius ille  
 Te mage, quem tendit pellere, Bacche, fuit.

## AD FLORADILLUM BIBLIOPOLAM,

*Cum peteret ab Authore, cur obsoletos libros,  
 & minus bellè compactos præven-  
 stioribus emere soleret.*

## EPIGRAMMA XXXVI.

SI memini, plures, ò FLORADILLE, libelli  
 Sunt tibi, quos miserè pellis ovilla tegit:  
 Sunt etiam culta quos pietius arte politos  
 Dives inaurato margine pellis obit.  
 Sæpè rogas, auro cur recta volumina multùm  
 Non morer: impensè cur malè facta sequar:  
 Dicam equidem; arcanum sed quod tibi grande revelo;  
 Tu patulo caveas effluat ore tibi.  
 Intus habent aurum, malè quæ pecus arida vestit;  
 Intus habent auro recta frequenter ovem.

*Ad*NERONEM, *ardente Roma, Halosin Ilii*  
*decantantem.*

## EPIGRAMMA XXXVII.

**I**Mperii canis Iliaci lacrymabile fatum  
Dum sternit Latios improba flamma lares :  
Trojam Roma; Tybris Xanthum, Simoëntaq; reddit;  
Et Capitolinum Pergama celsa jugum.  
Tam benè Dardanios referant ; cum cætera casus  
Qui Priamum mactet, dic mihi, Pyrrhus ubi est?

*Moïses marmoreus in fonte aquæ Felicis.*

## EPIGRAMMA XXXVIII.

**R**Omanum stupeo ad Fontem, qui Cærula nutu  
Flexi ; cum Pharias mergeret unda rates.  
Clarius at decus hoc: Fonti servire Latino  
Nam præstat ; vasto quam dare jura mari.

## A L I U D

## EPIGRAMMA XXXIX.

**P**erbibe securos latices, Romana Juventus ;  
Nomine nam Felix lympa nocere nequit :  
Ad-

Adstat & excelsus custos tibi vertice Ductor  
Isacides ; pelagi vel metuendus aquis.

GODEFRIDUS A TURRE, LEONE,  
*quem Serpente illigatum solverat ;*  
*Palæstini Belli socio utitur.*

## EPIGRAMMA XL.

**T**Erribili nuper quam solverat angue revinctam,  
Miles habet sociam sæva per arma feram.  
Hæserat ut colubro ; lateri sic militis hæret ;  
Sed non his solvi nexibus illa velit.  
Cum Domino pugnat ; gladium ille, hæc exerit unguis ;  
Ille hastam dextra concutit ; ista jubas.  
Altera lux Domino ; lux altera figitur hosti ;  
Et pavet ; & terret ; sævit ; amatque simul.  
Monstriferam merito te dicimus, Africa ; Monstrum  
Effet & humano in pectore tantus amor :

*Idem Leo prohibitus Domini navim inscen-*  
*dere, dum per undas ad illum tendit,*  
*emoritur.*

## EPIGRAMMA XLI.

**N**Autâ vetat dum vela sequi fugitiva LEONEM,  
Fraudatus votis & jacet ille suis :

## 24 EPIGRAMMATUM

Littoris invisi gemit indignatus arenas;  
 Et socium medias se jacet inter aquas.  
 Pectore curvato se per vada falsa carinat,  
 Vellera pro velis explicat aura frequens:  
 Ille suum, Delphin ceu factus, Ariona querit;  
 Quamque ratis tenuit, sulcat & ipse viam.  
 Rugitusque ciet, ponto nova murmura; euntem  
 Atque anima Dominum deficiente vocat.  
 Jam perit haustus aquis; oculis tamen ille requirit,  
 Quæ rapiunt Dominum candida vela suum.  
 Bellua quod periit, superis ignosco; perire  
 Sed non infido debuit illa mari.  
 Quamvis, quæ tantum terris ostendit amorem,  
 Debuit & Pelagi monstra docere fidem.

## AD FABULLUM POETAM

*mendicum.*

## EPIGRAMMA XLII.

SÆpè, FABULLE, mihi narras, pretiosior auro,  
 Purior argento quod tibi vena fluat.  
 Afferit à lacero cur non centone Poëtam  
 Argenti, atque auri copia tanta? fuit.

FUL-



F U L V I A  
MARCI ANTONII UXOR;

*Extincti C I C E R O N I S linguam  
acu pungit.*

EPIGRAMMA XLIII.

**A**H fuge: non tutum est sævas tractare sagittas;  
Exitiale manu, FULVIA, fulmen habes.  
Si dubitas, misero potius tu crede marito;  
Conjugis hoc periit fulmine fama tui.  
Vanum est, exigua proscindere cuspide linguam;  
Quam nulla ærata tempora falce petant.  
Lingua hæc occiderat: dum livida percutis illam;  
Longius illa tuâ vivet ab invidiâ.

A L I U D

EPIGRAMMA XLIV.

**Q**uid linguam rabiosa petis, qua Cecropis Urbe  
Nulla fuit, Latio nulla priorque foro?  
Ipsa, reor, centum sibi fama revelleret ora,  
Arpini solo posset ut ore loqui:  
FULVIA, lingua silet, quam torques; scripta loquuntur  
Arpinatis; acu, si potes, illa pete.

ALIUD

## A. L. I. U. D.

## EPIGRAMMA XLV.

**T** Hermodoontiacas fileat jam fama Puellas,  
 Antevolat palmas FULVIA Amazonias.  
 Poscitis, invictæ quæ sint miracula dextræ?  
 Extincti linguam FULVIA pungit acu.

## ALEXANDER FARNESIUS,

*Dum obsidet Aldenardam,explosa in tento-  
 rium, ubi prandebat, hostili bombarda;  
 ab hauriendo Vini poculo  
 non deterretur.*

## EPIGRAMMA XLVI.

**E**Vomit infani dum fulminis æmula moles  
 Sulphure vulnificas dissiliente faces;  
 Elatum manibus cyathum FARNESIUS haurit;  
 Debilitat fortem nulla ruina manum.  
 Cor Ducis obsessa degebat in Urbe; timere  
 Hinc ille in Castris nulla pericla potest.

DIVUS GREGORIUS  
THAUMATURGUS*Vocis imperio montem movet.*

## EPIGRAMMA XLVII.

IMmites Alpes medicato solvit aceto  
 Annibal, Alpinis durior ipse jugis:  
 Velificatus Athos: sed inhospita laxa receptis  
 Dura seges chalybum pervia fecit aquis:  
 Torrida si paulum cessaret flamma, moveret  
 Non formidatum Trinacris Æthna latus:  
 Nec lato fluere Simplegades æquore; si non  
 Irati scopulos tunderet unda maris.  
 Non ferrum; non acre merum; non unda, nec ignis;  
 Vox tibi sed montes vincere sola potest.

## G I S C A

*Hereticorum in Boëmia ductor ex detracta  
 sibi pelle tympanum confici supremis  
 tabulis jubet.*

## EPIGRAMMA XLVIII.

NON pulli Arcadici, nec duri tergore tauri;  
 GISCÆ pelliculâ tympana tenta vides:  
 Man-

28 EPIGRAMMATUM

Mandavit moriens ceris hoc ille supemis;  
Atque suam jussit belligerare cutim;  
Amplius ac jussit factum est: nam tympana pèllem  
Desuper; & cerebrum militis intus habent.

AD DYONISIUM  
SYRACUSARUM TYRANNUM,  
*Cum Platonem Hospitem quadrigis  
albis exciperet.*

EPIGRAMMA XLIX.

FRæna Siracusios qui stringere dura docebas;  
Mitia quadrijugos ducere fræna doces:  
Da populis, PRINCEPS, sunt quæ modò fræna ferarum;  
Quæque hominum fuerant vincula, redde feris.

A L I U D

EPIGRAMMA L.

Utinam, vècto cum solves Hospite currum,  
Oppressam discas solvere Trinacriam.  
Quàm bonus in stabulo es; malè tã dominaris in aula;  
Loraque tu melius, quam tua sceptrà geris.  
Censorem obsequio credis mulcere; nitenti  
Et pompa Actæum fallere forte senem.

Albos

Albos jungis equos : capis hac non arte Platonem ;  
 Namque tuos mores exprobrat ille color .  
 Auriga Aurigæ occurris ; tu doctus equorum  
 Infrænos animos noscere ; & ille tuos .

# O T H O I M P E R A T O R

*Ad prælium iturus speculum gestat .*

## EPIGRAMMA LI.

I N Clypeis speculum gestat Mavortia pubes :  
 Projice , sola dedit quæ Venus arma tibi .  
 Fortè times , merito ne fias sæmina ; vultus  
 Consulis hinc , vitro Judice , sæpè tuos .

*Turris à NEMBROT extructa linguarum  
 discordia dilabitur ,*

## EPIGRAMMA LII.

P Ene manu NEMBROT tangebat fidera ; nunquam  
 Et tamen à Cœlo tam procul ille fuit .  
 Insanis lapidum non ardua Turris acervis  
 Nutavit ; scelerum pondere pressa ruit .  
 Si tantam linguæ evertit discordia molem ,  
 Discordes stupeas sternere Regna manus ?

*Ad*

*Ad LUPERCUM Funambulū ad Furcā  
adactam.*

## EPIGRAMMA LIII.

**M**æandro tua colla quod jocosō  
Cingat funiculus, levesque circum  
Cervicem saliens agat choræas;  
Hos dum te didicit docente ludos,  
Non est, quod doleas, reor, LUPERCE.  
Quod nodo premat arctius, jocoque  
Elidat jugulum licentiori;  
Circo plausibus adstrepente, longos  
Illum presseris ipse cum per annos;  
Non est, quod doleas, reor, LUPERCE.  
Quod Funambulus ille sit parumper;  
Tu loco patiaris esse funis;  
Non est, quod doleas, reor, LUPERCE.

## A L I U D

## EPIGRAMMA LIV.

**R**ostratam retulit victor de puppe coronam;  
Gloria servati Civica Civis erat.  
Palladius meruit, qui vicit Olympia, frondes:  
Belligeras ornant laurea ferta comas.  
Ne tensi funis victori præmia desint,  
Funis fit collo digna corona tuo.

*Ad*

*Ad Excellentissimos Dominos*

DOMINICUM, & NICOLAUM  
ROSPIGLIOSOS

ZAGAROLI DUCIS FILIOS,

*Cum in consessu Arcadum elegantissimum  
Carmen Bucolicum recitarent, post re-  
ditum à venatione Maccarenfi,*

EPIGRAMMA LV.

**M**Accarios saltus, operum studiosa Diana,  
Cingebat jaculis ROSPILOSIA phalanx:  
Tela feras poscunt, arcus exosa morantes,  
Et fremitu emissio conscia sylva Cane.  
Ille fugam leporis meditato intercepti ictu;  
Ille reluctantem cuspide figit aprum.  
Quid facerent Pueri grandes, quibus aspera ferro  
Non potis est gracilis tendere tela manus?  
Exanimare feras sed si non annuit ætas;  
Sors iter ad prædã monstrat amica novam.  
Territus errabat per devia Sylvivagus Pan,  
Dum pulsant resonum cornua rauca nemus.  
Dum fugit, effusoque gradu per lustra vagatur,  
Fistula commotis decidit ex humeris:  
Arripiunt Pueri calamos; prædaque potiri  
Non poterant teneræ nobiliore manus,

*Ad*

*Ad Juvenem Cyprio pulvere conspersum.*

## EPIGRAMMA LVI.

**O**Re niger; CYPRIO conspersus pulvere crines;  
Tu mihi cōmemoras: Pulvis, & umbra sumus.

*De frigidissimis Cellis Vmariis  
in Monte Doliolo.*

## EPIGRAMMA LVII.

**C**Livus ubi aggestis testarum surgit acervis,  
Bacchi lautitiis algida servit hyems.  
Isaciæ fuerant olim miracula virgæ,  
Ducere de sicco pumice fontis aquas.  
Arida quod cautes sed nunc Lenæia promat  
Munera; ROMA, tuæ sunt nova monstra gulæ.

*De eodem Monte Urnarum fragminibus  
extructo.*

## EPIGRAMMA LVIII.

**T**Urba sepulchrales quò Romula trāstulit Urnas,  
Doliola æstivus nunc sua Bacchus habet.  
Tam gelidas cellas mirari parce; sepulchri  
Frigidior glacies marmore nulla riger.

*ALIUD*



## A L I U D

## EPIGRAMMA LIX.

U Rnarum testis collis qui crevit, amica  
 Testis conciliat frigora, Bacche, tuis.  
 Ebrietas quo victa cadat medicamine, mentes  
 Si temeto insanas vel Libitina facit?

## A L I U D

## EPIGRAMMA LX.

O Romæ facinus! supremi frigora faxis,  
 Funereumque gelu non timet illa; bibit.

*Ad malos Demones, cum Div. IGNATIUM  
 LOJOLAM verberibus afficerent.*

## EPIGRAMMA LXI.

Q Uod cæsus LOJOLA tuos irrideat ictus,  
 Miraris Stygiæ turba bicornis aquæ.  
 Non tibi sunt vires solitæ; non integra virtus;  
 Quem cædis, malè te contudit ille prius:  
 Nunc quoque, dum placido tolerat tua verbera vultu,  
 Verbere, non sentis? te graviore petit.

BEATUS ALOYSIUS GONZAGA

*Ferreis calcaribus latera  
adstringit.*

## EPIGRAMMA LXII.

STellatos lateri Mantous stringeret Heros  
 Cum stimulos ; segnes queis agitantur equi ;  
 Adstitit ardenti Puero delapsus Olympo ,  
 Divus & hæc placida fronte locutus Amor.  
 Arma, Puer, lateri quid nectis inania ? cursus  
 Quid frustra nitens extimulasque tuos ?  
 Ferrea, que gestas, calcaria projice ; ad astra  
 O pennis solum tendere digne meis.

*De PHARAONE in Erythreæ mari cum Exer-  
 citu Ægyptiorum submerso.*

## EPIGRAMMA LXIII.

ÆRe gravem, scelerum graviorē pondere vindex  
 Merfit ubi Pharium marmoris unda Ducem ,  
 Fama est ingentes scopulos, Syrtisque minantes  
 In præceps imo defiliisse mari.  
 Non Siculi apparet populatrix Virgo profundi ;  
 Non vorat Jonias rauca Malæa rates ;  
 Prætereunt lætæ violenta Ceraunia puppes ;  
 Exercent nullos Nauplia saxa dolos.

Tunc

L I B E R I. 35

Tunc Nereus : scopuli quò quò disceditis? inquit,  
 Quò fugitis Regni gloria prima mei?  
 Respondent : longis satis hic regnavimus annis;  
 Nunc tibi pro scopulis cor Pharaonis erit.

*Ad Cleanthem Zenonis præcepta in Cada-  
 verum ossibus scribentem.*

E P I G R A M M A LXIV.

Q Uæ scribis, quamvis doceant te plurima; mores  
 Instituet melius pagina nuda tuos.  
 Quam calamo sulcas, etiam non scripta juvabit  
 Pagina; ZENONE est doctior illa tuo.  
 Quilibet, haud fallor, doctas superaret Athanas,  
 Si tumuli nobis Bibliotheca forent.

*De potione Sinensi, vulgò Tè.*

E P I G R A M M A LXV.

V Ilis ab Auroræ glebis, & Gange remoto  
 Vellicet ut nostram navigat herba sitim.  
 Vera gulæ Proceres, quibus est & docta saliva,  
 Si memorant; pretium frondis inane putes:  
 Nam palææ, sænive refert tepesacta saporem,  
 Par odor est illi; par & utriqûe color.  
 Non color, olfactusve, sapor non eminet herbæ:  
 Vilibus in foliis India sola placet.

*Ad Ruspum languidi Poëmatís Authorem.*

## EPIGRAMMA LXVI.

CUM legeremiratâ tua carmina scripta Minervâ,  
 Projeci in medios, RUSPE, cremanda focos.  
 Quid factum rogitas? extinxit protinus ignes  
 Frigidior Geticâ pagina jacta nive.

*Divi ALEXII interitus Campano ære sponte  
 resonante detegitur.*

## EPIGRAMMA LXVII.

SUMMO victa gelu Sponsus cum lumina clausit  
 Et procul à testó, nec procul ille suo:  
 Castus Amor sacræ victor fastigia turris  
 Occupat; & tenerâ concutit æra manu:  
 Qui primùm sponsæ velavit, & ora Parentis;  
 Hæc ne progeniem nosceret, illa virum;  
 Ferrea nunc Chalybum Puer ora resolvit; ALEXIN  
 Et jubet extinctum dura metalla loqui.

## IN FUNERE

CHRISTINÆ, ALEXANDRÆ

*Suëcorum, Gothorum, & Vandalorum Regina.*

## EPIGRAMMA LXVIII.

CHRISTINÆ tumulum colens, Viator,  
 Non tu purpureosque, candidosque  
 Fundas tristior, ingerasque flores,  
 Augustæ rudis æstimator urnæ.  
 Non mollis rosa; non tenellus Ajax;  
 Prati non humilis breves Alumni,  
 Pistæ munera nec caduca Floræ  
 Hos ornent cineres: Pudica Pallas  
 Favens Cynthus, & novem sorores;  
 Quin & Relligio, Fidesque vestit  
 Quos vernantibus hinc, & inde lauris;  
 Hæc te florida ferta, adoresque  
 Bis, ter sollicito rigare fletu,  
 Fato pervia si forent, juberem;

*Democritus ut commodius philosophetur sibi  
oculos eruit ; Galilæus invenit  
Telescopium.*

## EPIGRAMMA LXIX.

**A**Bderita oculos vacua de fronte revelat  
Penſet ut amiſſum mens oculata diem :  
Ethruſcus tubulata ſtruit chryſtalla, revelent  
Lumina ſidereas ut geminata vias.  
Æquè naturam lædit, niſi fallor, uterque ;  
Dum videt ille nihil ; dum videt iſte nimis.

*Cinegirus, abſciſſa utraque manu, hoſtilem  
navim retinet, & pugnam  
proſequitur.*

## EPIGRAMMA LXX.

**D**Um tenet hoſtilem CINEGIRI dextera puppim,  
Seſta cruentatâ cuspide dextra cadit.  
Suppletura vices ſtringit manus altera pinum ;  
Alter a ſed parili vulnere ſciſſa manus.  
Arreptam tamen ille, invito Marte, Carinam  
Detinet, & palſam brachia trunca gerunt.  
Quid tantum, Roma, Ethruſca fornace ſuperbis?  
Dimidium tantæ, Scevola, laudis habes.

Dex-

Dextra perit flammis tibi sola; impendit utraq̃ue  
Et Patriæ, & Famæ fortior iste manus.

*Ad Loquacem Philosophum.*

EPIGRAMMA LXXI.

**I**N labiis Socrates tibi plurimus, & Theophrastus;  
In labiis garrit multa Stagira tuis.  
Semper Aristippum loqueris, Zenona, Cleanthem,  
Democritum semper, Crantora, Anaxagoram:  
Cætera tam bene dum calles; quæ sola supersunt,  
Dogmata disce etiam Pythagoræ: tace.

*De Acipensere sæpiùs redonato.*

EPIGRAMMA LXXII.

**R**omulidum salit auratas ACIPENSER in ædes,  
Littore Tyrrheno qui modo præda fuit.  
Erravit totam regalis squama per Urbem,  
Dum sex huc illuc mittitur usque dies.  
Tabidus at demum Tiberinis mergitur undis,  
Funere non, miserum! mortuus ille suo.  
Æquore qui natus; fluviali conditus urna,  
Tibridis hæc mediis dicere visus aquis:  
Sobria cum tantum stupeat tibi, Roma, palatum;  
Inque oculis solum sit gula tota tibi;  
Depictum poteras me circumferre per aulas;  
Et vivum patrio deseruisse mari.

*De Centurione post CHRISTI DOMINI  
obitum resipiscente.*

EPIGRAMMA LXXIII.

**Q**Ui modo, dum tristis penderet robore trunci,  
Numinis immisso foderat ense latus;  
Dum vultus subita condit terrugine Titan,  
Convocat ad fixi Numinis ipse situs.  
Felix, cui tribuit languens Natura vigorem;  
Ipsa salutarem cui parit umbra diem.

*De Luxu Viridariorum.*

EPIGRAMMA LXXIV.

**J**Am nec frigidulo levis susurro,  
Natus pumice fons salit vetusto;  
Musco nec recidit virente pictus:  
Mentitus Siculis Cyclops tabernis  
Sed quæ fulmina mittit, Arcticosque  
Mistæ grandinis æmulatus imbres,  
Torvo sidera territat tonitru,  
Raucos stridulus & laceffit Austros.  
Silva nec temere, leves per auras,  
Fusos porrigit, explicatque ramos;  
Sed coërcita subdit immerentes  
Ferro vindice tonsilis capillos.  
Myrtus, Idaliæ decus parentis,

Quæ.



Quæque olim fuerat novellus ardor,  
 Nunc, Titan, tua sed corona, Daphne;  
 Valtus scetillum gerunt ferarum.  
 Quæ fulvæ fuerant prius, virere  
 Massyli videas jubas Leonis:  
 Et nunc ipse recens virescit arbor,  
 Olim qui fuit arborum satelles,  
 Custosque Hesperidum, superbus anguis!  
 Nullas monstriferis vacare formis  
 Frondes videris: huc superstes omni  
 Cessit Aphrica belluosa partu.  
 Quò Tempe mera? Mœnali recessus  
 Quò gratæ Patribus migraſtis Umbræ?  
 Illis ò utinam frui liceret  
 Hortis! deliciæ, Remi Nepotes,  
 Egent Hercule, Theseoq̃ue vestræ.

*De Grammaticis.*

EPIGRAMMA LXXV.

**R**omanæ decus Historiæ Salustius inquit;  
 Discors haud dubiè labitur Imperium.  
 GRAMMATICOS sed enim secernere debuit, augent  
 Discordes odiis qui sua Regna suis.

MARCHIO AMBROSIUS SPINULA ,

*Dum se Frisiam invasurum evulgat , &  
Hollandi fraudem interpretati reli-  
quas Provincias communiunt ,  
neglectam Frisiam  
occupat .*

EPIGRAMMA LXXVI.

**B**ella palam Frisiis dum SPINULA nunciat , hostes  
Fraude putant Ligurem non caruisse Ducem .  
Protinus Hispanas Zutania , Gheldria turmas  
Expectat : Frisii suspicione vacant .  
Ficta Ducis credunt dum verba minantia ; vero  
Cervicem Frisii supposuere jugo .  
Proditur ars nova fallendi , non fallere ; fraudes  
Et superat Batavas Itala simplicitas .

ARCHIMEDES *locatis ad Solem Speculis  
Romanam Classem incendit .*

EPIGRAMMA LXXVII.

**J**uppiter ignavam , rubris nec sueta lacertis  
Tela ministrantem sollicitabat avem .  
Dic , age , cur Siculis cessant incudibus ignes ?  
Flammea cur sudat parciore arma Cyclops ?

Atto-

Attollens Regale Caput Regina volucrum,  
 Jam non fulmineo reddidit ista Jovi.  
 Desperare potes posthac Cyclopea tela:  
 Otia semper ages; si petis inde faces.  
 Littore nam Siculo meliorem experta Tonantem,  
 Tota Syracusio militat Æthna Fabro.

*In illum Juvenalis veciculum*

Et divina opici rodebant carmina mures.

EPIGRAMMA LXXVIII.

**R**Odebant Opici Græcorum carmina mures;  
 Atque ipsam in primis suspicor Iliada.  
 Pangere quid prodest immensa volumina; libros  
 Perdere si tantos Syllaba sola potest?

DIVA MARIA MAGDALENA

*Ad ceream CHRISTI DOMINI effigiem  
 orat.*

EPIGRAMMA LXXIX.

**C**UM Domini simulacra sui complexa teneret  
 Anxia per noctes MAGDALA, perque dies:  
 Ceratam effigiem fletu manante resolvit;  
 Cordis & ad lentas fluxit Imago faces.

Ille

44 EPIGRAMMATUM

Illa ubi fusa videt ceris simulacra solutis,  
 Quis nec forma vetus, nec decor ullus erat;  
 Quam veniam sperent, dixit, mea crimina; noster  
 Numine deleto si quoque peccat amor?

A L I U D

EPIGRAMMA LXXX.

Pone modum, cæsisque genis, lacerisque capillis,  
 Lætior & lachrymis, MAGDALA, pone modum.  
 Quem cerâ stantem mirâ colis arte Magistrum,  
 Obtentæ pignus dulce salutis habes.  
 Ex adamante fuit qui, dum fera fata subiret,  
 Annuit ad veniam cereus ecce tuam.

MONIMA UXOR MITHRIDATIS

*proprio Diademate se suspendit.*

EPIGRAMMA LXXXI.

Gemmis Zona nitens si regia guttura torquet,  
 Ne stupeas; animum torserat illa prius.  
 Munera fortunæ denudas, Fœmina; viles  
 Dum laqueos Regum fronte nitere doces.  
 Hoc solum errasti; non collo nectere sertum;  
 Debueras pedibus supposuisse tuis.

ENCELADUS *in Fonte Tusculano Villæ  
Aldobrandinæ aquarum turbinem  
evomit.*

## EPIGRAMMA LXXXII.

ENCELADUM meritis torquet cruciatibus ær ;  
Ex alto præceps dum ruit axe Gigas .  
ENCELADUM cruciat tellus non impare pœna ;  
Opprimit insanum dum gravis Æthna caput .  
ENCELADUM sævis plectunt ardoribus ignes ;  
Dum rodit miserum flamma inimica latus .  
Defuerat solùm quæ pœna ; nocere sepulto  
Ipsæ etiam ultrices nunc didicistis aquæ .

*In funere FRANCISCI REDI Medici, Philo-  
logi, & Poëtæ clarissimi, cum inter dor-  
miendum placidissimè mortem  
oppeteret.*

## EPIGRAMMA LXXXIII.

FERALÈM longo non explicat ordine pompam ,  
Obsidet Ethruscum cum Libicina senem .  
Languida non sævis gliscens per viscera flammis ,  
Torsit lethifero tabida membra gelu ; Non

## 46 EPIGRAMMATUM

Non fœdam adduxit maciem ; non ulcera ; venas  
 Infecit tristi nec populata lue:  
 Sed dulces somnos vultu mentita sereno,  
 Non formidatos miscuit illa dolos.  
 Insidiis poterat nimirum vincere solis,  
 Victa palam toties quæ tibi, REDE, fuit.

*In Furem sacrilegum, qui argenteam Cru-  
 cem ex Ara Maxima Basilicæ Principis  
 Apostolorum noctu sustulit.*

## EPIGRAMMA LXXXIV.

T Erruit Augusti nisi te reverentia Templi,  
 Quæque tibi vitæ pignus Imago fuit;  
 Saltem hoc debueras horrescere ; crimine in ipso  
 Supplicii augurium quod tibi tristis erat.  
 Dum raperet tua dextra Crucis venerabile signum,  
 Stulte, crucem poteras tunc timuisse tuam.

SEMIRAMIS ASSYRIORUM REGINA,  
*pexa comarum parte, impexa alterâ,  
 ad Medos à Babylone depellendos  
 exsurgit.*

## EPIGRAMMA LXXXV.

A Udiret Babylona rapi cum Milite Medo,  
 Surgit inornatas fœmina fusa comas:

Tur.

L I B E R I.

47

Turbari non illa suam dolet hostibus Urbem;  
Turbari crines sed dolet illa suos.

A L I U D

EPIGRAMMA LXXXVI.

**F**æmina, quæ galeâ crines involvit, & irâ  
Accendit, minio quæ rubuere, genas;  
Tam bene componet disiectis hostibus Urbem,  
Quam malè compositis surgit ad arma comis.

A L I U D

EPIGRAMMA LXXXVII.

**R**egnatrix hostem ut vidit Babylonia, condit  
Non bene discretam casside Cæsariem.  
Advolat, & pavidos agit extra Mænia Medos;  
Et latos fuso sanguine complet agros.  
Præcipitasse putes pugnam, & properasse triumphum,  
Crinis ad abruptum ut nempè rediret opus.

*JOVIS STATUA à Phidia inchoata  
fulminis ictu perficitur.*

EPIGRAMMA LXXXVIII.

**V**idit ut è Paria spirantem rupe Tonantem  
PHIDIACÆ rarum JUPITER artis opus;  
Æmu.

Æmulus hic, inquit, meus est; & nobile signum  
 Ocyus excussi fulminis igne petit.  
 Perficit effigiem rapidæ strictura sagittæ;  
 Discit & à PHIDIA sculperè dextra Jovis: .

*ZOROASTER magicæ artis Inventor  
 ridendo nascitur.*

## EPIGRAMMA LXXXIX.

**E**Minuit primus magico qui murmure, risu  
 Vix natus solvit Bactrius ora puer.  
 Quid causæ est illi, tantum cur rideat? artem  
 Jam nunc irridet suspicor ipse suam.

## A L I U D

## EPIGRAMMA XC.

**I**Nter fasciolas, Puella, primas  
 Pingues Democriti sapis cachinnos:  
 Sed cum Thessalicos ciere cantus,  
 Marfa & gramina, Colchicasque fraudes  
 Ætas, Auspice te, futura discet;  
 Multis tu morieris Heraclitus.



*Ad Cupidinem ex electro formatum.*

EPIGRAMMA XCI.

**Q**ui te succineis, Puer ò sævissime, guttis  
 Condidit; ingenium calluit ille tuum:  
 Ut paleas, hominū nam corda trahisq̃ue, cremasq̃ue;  
 Et lachrymas, lachrymis cretus & ipse, paris.

*SOCRATES noctem, quæ suam mortem  
 antecessit, altissimè dormit.*

EPIGRAMMA XCII.

**A**ctæum nox alta tenet complexa Magistrum,  
 Cui parat immitis nigra venena manus:  
 Contra nulla quies oculis, animoque Tyranni,  
 Qui struit illustri toxica dira reo.  
 Cecropiæ gentis probrum cognoscite: solus  
 In tanta rectè judicat Urbe sopor.

*DAVID Organi Psaltici sonitu Saulis  
 Regis furias mitigat.*

EPIGRAMMA XCIII.

**P**ulsat ebur, fundam quæ strinxit dextra, Gigantes  
 Sic quoque sed pergit sternere docta manus.  
 D Iram,

## 50 EPIGRAMMATUM

Iram, proh quantum regali in pectore monstrum,  
 MAGNE PUER, resonant dum tua fila, domas.  
 Exoptant alii placidos in Principe vultus;  
 Laudibus ut faveat, sæviat iste, tuis.

*Ad Græcum Adolescentem ex Alcippi  
 cineribus pulvereum Horologium  
 conflantem.*

## EPIGRAMMA XCIV.

**B**Is erras, vitreâ socium qui contegis urnâ:  
 Dilectos cineres namque agitare ferum est:  
 Et, cum dissilient in vitrea claustra favillæ,  
 Permissas cineri quas latitare reor,  
 Corruet ingrati moles effracta sepulchri;  
 Et cinis iste tibi rursus humandus erit.

## A L I U D

## EPIGRAMMA XCV.

**P**one urnam cineri solido de marmore; condi  
 Non meruit fragili tegmine tanta fides.  
 Nulla quies misero fuerat, dum vita manebat;  
 Inque ipsa tumuli nulla quiete quies.  
 Das cineri motum; potis es nisi reddere vitam:  
 Nescio quid vitæ, dumque movetur, habet.  
 In-

Ingeniosus amor nova dat tibi præmia: soli  
 Nota tibi incertæ tempora mortis erunt:  
 Namque ubi suspensos cineres hære videbis,  
 Instare extremum tunc tibi crede diem:  
 Illam metiri nam jure gravabitur horam,  
 Qui te sic etiam novit amare, cinis.

## SANCTUS MARTINUS

*mendico stipem petenti sagum tradit,  
 quo eidem CHRISTUS DOMINUS  
 indutus apparuit.*

## EPIGRAMMA XCVI.

ARS nova bellandi: Clypei, galeæque recedant;  
 Nobilior nudo à milite palma venit.  
 Ut vincant alii, ferroque, armisque tegantur;  
 Et super imposita casside colla gravent:  
 Dum Martis spolia hic cedit; spolia ampla reportat;  
 Et denudato pectore victor abit.  
 Mos fuerat, spoliis ornari Tempia Deorum;  
 Ornatur spoliis sed Deus ipse tuis.

## A L I U D

## EPIGRAMMA XCVII.

VIRgo olim dederat corpus mortale Tonanti;  
 Ex te nunc vestem, qua tegeretur, habet  
 D 2 Ad

*Ad INSULSUM Poëtam.*

## EPIGRAMMA XCVIII.

**I**NSULSOS multi dicunt te scribere versus;  
 Sed nulla obijciunt hoc ratione tibi.  
 Cū scombros, pinguesq; tegant tua carmina thynnos,  
 Innumeros illis quis neget esse sales?

*ARGO Prima Navis in Cœlum relata.*

## EPIGRAMMA XCIX.

**P**UBIS Jafoniæ gremio dum robora claudens,  
 Finderet Ismarias Pelias arbor aquas,  
 Infremuit qui Regna domat spumantia nutu,  
 Undisonosq; ferox extimulavit equos.  
 Nec mora; tergemino, quæ temperat æquora ponti,  
 Impulit audacem fuscina dente ratem:  
 Illa gemens excussa vadis, dum fertur in altum,  
 Sidereis hæsit non reditura plagis.  
 Damna vel ipsa juvant: Velis dant sidera sedem;  
 Hospitium implacidæ si prohibetis aquæ.  
 Hospes erat Pelagi; Cœli est nunc hospita; Typhis  
 Quodq; optare illi non potuisset, habet.

*ALIUD*

ALIUD

EPIGRAMMA C.

**F**lectit in astra viam, Pelagi quam debuit undis;  
Huc, illuc agitur dum Pagaseæ ratis.  
Si sine lege vagans transcendit sidera: Cymbæ  
Parcite inexpertæ: prima carina fuit.

ALIUD

EPIGRAMMA CI.

**D**icite, cur sævis Pelagi jactata procellis,  
Sidereum tenuit Thessala puppis iter?  
Peliaco quod nata jugo, descendere ad imas  
Non renuit, magnæ sobria fortis, aquas.

GALILÆUS *Tubi Optici Inventor cæcus  
moritur.*

EPIGRAMMA CII.

**J**udicis astrorum vitri fabricator Ethruscus  
Lumine obit summum captus utroque diem;  
Perpetuum gratæ nam posteritatis in usum,  
In tubulos oculos transtulit ille suos,

## PUERUM JESUM

*Recens natum.*

## EPIGRAMMA CIII.

**P**Upe blandule, delicate, tantas  
 Unde habes, rogo, quas jadis sagittas?  
 Non tu Tyndaridas supra, & micantem  
 Arcturum, Erigonemque, Atlantidesque,  
 Axes astriferos sonante curru  
 Lustras; & gelidos metus trifulcis  
 Minax inferis, imprimisque flammis:  
 Duro stramine sed cubas, tenellos  
 Fœno culcita farta dum rigenti  
 Et lædit simul, & tuetur artus;  
 Igni sulphureo pares ferendo,  
 Nec illi tibi, Pupe, sunt lacerti,  
 Quos olim jaculator ille magnus,  
 Et vindex scelerum, palam solebas  
 Elisas super explicare nubes.  
 Nam quod est tibi nunc lacertulorum  
 Mater fasciolis suis revincit;  
 Sævæ morsibus asseritque brumæ:  
 Non his brachiolis, PUER, ferire;  
 Nec attollere tu potes sagittas.  
 An, quæ me miserum petunt, cremantque,  
 Vibrant luciduli facies ocelli?

Sed

Sed quod est tibi nunc ocellulorum,  
 Aut in candidulis Parentis ulnis  
 Componit sopor obsequente penna;  
 Aut, quæ lactea decidunt per ora,  
 Contristant lachrymæ, repente nimbo.  
 Cum nec tot jaculis pares lacerti;  
 Infirmæ malè congruantque vires;  
 Cum nec lacrymulis graves ocelli  
 Certo spicula moliantur ictu;  
 Pupe blandule, delicate, rursus  
 Unde habes, rogo, quas jacies sagittas?  
 Istud noscere non licet: misellus  
 Hoc tantum scio; cor perivit omne  
 A tuis mihi quod, PUER, sagittis.

CLEOPATRA *morsu Aspidis vitam absolvit.*

## EPIGRAMMA CIV.

**D**UM mortis Regina viam Nilotica; fallor,  
 Dum libertatis quærit ab angue viam;  
 Non miror, tenero tractatos ungue colubros  
 Tabificam venis implicuisse luem;  
 ASPIDA sed miror subito non funere pressam,  
 Hausit ubi impuri sanguinis illuviem.

## A L I U D

## EPIGRAMMA CV.

**S**Ponfa virum, Regnum perdis Regina; nocenti  
 A Libya & pestes, ut moriari, petis?  
 Serum est, Marmaricis morituram eguisse venenis,  
 Quàm Sponsi, & Regni funera perdiderant.

*De memorabili Turcarum clade ad Tibi-  
 scum edita, Duce EUGENIO Principe  
 à Sabaudia.*

## EPIGRAMMA CVI.

**D**Um tot Miltiades Italus dat stragis acervos,  
 Non Marathon letho millia quanta dedit:  
 Quàm metuo, haud uno vigilanda Themistocle, curas  
 Dura per insomnes tempora noctis eant.

*Adeundem Principem, cum, post relatam  
 Victoriâ, gladio gemmato à LEOPOLDO  
 CÆSARE donaretur.*

## EPIGRAMMA CVII.

**C**Um Thetis Æaciden Ætnæ fatalibus armis  
 Indueret; Phrygium cum Cytheræ Ducem;  
 Vi-



Victor uterque fuit: sed & arma impervia laudis  
 Dimidium poterant asseruisse sibi.  
 Te solùm superante cadunt tot Bistones, hausit  
 Quos ferrum; rapidis quosque Tibiscus aquis.  
 Namq; tibi Austriacus tunc Juppiter arma ministrat;  
 Cum latè cæso victor ab hoste redis.

*De Romanis Aqueductibus.*

EPIGRAMMA CVIII.

**M**Armorum per iter, pulchro deducta triumpho  
 Fertur, Romanam quæ levat unda sitim:  
 Immanes arcus, suspensa que tramite longo  
 Marmora; delicias & stupet ipsa suas.  
 Tempia, Theatra, Domos quanto molimine credas  
 Surgere; si tanti Martia turba bibit?

*Ad Impostorem à Romana Plebe lapidibus  
 cæsum.*

EPIGRAMMA CIX.

**U**ndique contusus lapidosa grandine; clamas  
 Te male pro meritis ista referre tuis.  
 Falleris; ut dignos referat tibi laudis honores,  
 Nunc omnem lapidem Romula turba movet.

*De*

*De Marmore Etbrusco, variis Regionum  
prospectibus mirè colorato.*

## EPIGRAMMA CX.

**L**ittora, prospectus varios, montesque, lacusque  
MARMORA nativo TUSCA colore notant.  
Inseruit lapidum venis quæ tanta figuras  
Dextera, quo Pictor tempore nullus erat?  
Cum varios rerum partus Natura pararet,  
Hoc modulos pinxit marmore forte suos.

# EPIGRAMMATUM

## LIBER II.

*Ad Zoilum.*

### EPIGRAMMA I.

**R**ingaris licet usque, & usque clames,  
Quantum raucisonæ strepunt cicadæ;  
Quantum stagnicolæ crepantque ranæ:  
Merces non humilis meos libellos,  
Magni & præmia Numinis manebunt:  
Phæbi ni poterunt merere laurus;  
Doctas Palladis imbuent olivas.

*In Ara D. IGNATIO LOJOLÆ erecta in  
Templo Romano nominis Jesu Cælestis  
Puer argenteus cor aureum manu  
gestat, prope statuam argen-  
team ejusdem Divi  
IGNATII.*

### EPIGRAMMA II.

**L**OJOLÆ nullis unquam superabile flammis  
Aligeri in nivea cor flagrat ecce manu.  
Ille sed argenti solido de pondere ductus  
Si, quid adhuc faciat, forte requiris; amat.  
Bra-

60 EPIGRAMMATUM

Brachia nam Cœlo sublata fatentur amantem,  
 Oraque, & incensæ, lumina bitta, faces.  
 Quid LOJOLA mihi de te fas dicere; amore  
 Fervere qui tanto, vel sine corde, potes?

*Ad ChrySTALLINOS lapides, qui in eadem Ara  
 Venerabilis Nominis Jesu litteras  
 formant.*

EPIGRAMMA III.

FÆlices gemmæ, metuendum nomen Averno  
 Promere quas nitido jussit in ære faber!  
 Non equidem miror, post longæ frigora brumæ,  
 Vestra laborato si riget unda gelu;  
 Tam prope LOJOLÆ miror quod ab igne solutæ,  
 In patrias iterum non redeatis aquas.

*De Marmoreis quatuor speculis ex Alaba-  
 strite in eadem Ara.*

EPIGRAMMA IV.

HInc, illinc claram reddunt specularia lucem;  
 Marmora perspicuos nempè oculata suos.  
 Mirarisne novam Populos concurrere ad Aram?  
 Ipsa oculos acuunt marmora; ut hæc videant.

*Ad*

*Ad Divum IGNATIUM ; cujus Aram  
maxima copia Sapphirus illuminat.*

## EPIGRAMMA V.

**T**OT lectos inter lapides cur largius ornat  
Sapphirus tumulum, nobilitatque tuum?  
Non temere luit Pietas generosa Tuorum,  
Prodiga cæruleas dum tibi fudit opes.  
Hærebant Cælo tua lumina; gratior illo,  
Dum tibi vita fuit, non color ullus erat:  
Extinctum color ille etiam, sequiturque sepultum;  
Quodque potest, cineres recreat ille tuos.

*In eadem Ara, Religio ex marmore  
Hæresim fulminat.*

## EPIGRAMMA VI.

**U**T Terris abigat monstrum exitiale, protervum,  
RELLIGIO forti sustinet arma manu.  
Jam rapido attollit qui fulgurat igne lacertum;  
Jam petit anguiferum flamma trisulca caput.  
RELLIGIO, suspende facem: si dicere fas est,  
Hæresis haud meruit tam pretiosa mori.

*In Simulacrum Divinae Fidei, cum Principe à superstitione vindicato, ad Cælum erecta fronte, in eadem Ara.*

## EPIGRAMMA VII.

**P**Uro pura Fides habet hic de marmore vultus;  
 Victa superstitio sub pedibusque jacer.  
 Assertum tenebris Heroa inducere Cælo  
 Dum parat, & celsum læta capeffit iter,  
 Substitit hic: perculsa sacræ splendoribus Aræ,  
 Namque hic Cælicolis credidit esse locum.

*Patris Divini in eadem Ara orbem Sapphirinum sustinentis Allocutio ad Atheum.*

## EPIGRAMMA VIII.

**H**Uc adsit, nullum Cælo regnare Tonantem,  
 Et fatuo irasci qui putat igne polos.  
 Tu pelagum, terrasque putas authore carere,  
 Sideraque, & quidquid Maximus Orbis habet;  
 Orbiculum, quem ficta regit mea dextera, credas  
 Cum propè divinas composuisse manus?

De

*De ejusdem Aræ gradu subpedaneo , ex  
Emblemate vermiculato elegantissimi  
Operis .*

## EPIGRAMMA IX.

**D**Ædalei flores piæ hic flexibus errant ;  
Chloris & in secto marmore multa niter,  
Forma , decensque color commendat Veriſ alumnos ;  
Deficit unus odor ; cætera floris habent :  
An dulces auras spirant fortasse ; sed illas ,  
Lojolæ cineres quæ tegit , urna bibit ?

*D. IGNATII simulacrum argenteum in  
localamento pretiosis lapidibus incrustato  
ibidem erectum .*

## EPIGRAMMA X.

**L**OJOLÆ solido argento simulacra coruscant ,  
Promit ubi largas splendidus arcus opes ;  
Ille tamen flexæ curvamine conditur Aræ ;  
Interius fugiens atque latere cupit .  
Non est , cur ultra speres , LOJOLA , latere ;  
Jam tibi pro loculo nec satis Orbis erit .

*Cœlestes Pueri Argentei ad eandem Aram  
prægrandes quatuor Lychnos  
manu sustinent.*

## EPIGRAMMA XI.

**C**UM sit tantus honos lychnis; delapsa quæ Cœlo  
Sustineat nitidas cum pia turba faces;  
Astra reor, LOJOLA, tuo lucere sepulchro:  
Astra solent illæ sustinuisse manus.

*Apostolorum Principis D.IGNATIUM  
à lethali vulnere liberantis historia ibidem  
expressa opere Anaglyptico.*

## EPIGRAMMA XII.

**C**LAVIGER accepto LOJOLAM liberat ictu,  
Languidus aurato dum jacet ille thoro;  
Incolumis thalamo consurgeret ille relicto;  
Eminet excelsa tantus in ore vigor.  
Decumbit docto cur stratus in ære? superbus  
Artificis pereat ne labor, ille jacet.



*Ad D. IGNATIUM: De eadem Ara.*

EPIGRAMMA XIII.

**Q**UOD face Dianæ sacras Herostratus Ædes  
Diruerit; meritam sustinet ille necem:  
Sed contra; igne tuo quod totum incenderis Orbem;  
Nunc, LOJOLA, nitent aurea testa tibi.

*De eadem Ara.*

EPIGRAMMA XIV.

**S**plendida cum radiet fulgentibus Ara metallis;  
Cum niteant varios marmora sculpta sinus;  
Picturæ pars nulla vacat; molisque superbæ  
Inter opes tantas non habet illa locum.  
Sed fallor: quicumque oculis hæc aspicit æquis,  
Cuncta, vel Invidia iudice, picta videt.

*Ad SYMMACHUM obscure philosophantem.*

EPIGRAMMA XV.

**I**Nvolvit miseros cæca caligine sensus  
SYMMACHUS, ambages congerit atque meras.  
Diceret huic frustra Sapiens, quem dira cicuta  
Sustulit: ut videam, SYMMACHE, te; loquere.  
E MIL.

MILTIADES *Victoria Themistoclem dormire  
non sinunt.*

## EPIGRAMMA XVI.

MILTIADES animo victor dum sæpè recurrit,  
Nulla Neocliden otia noctis habent.

MILTIADES, Persas jam parce lacescere : Athenis  
Non tanti est Xersem vincere; ut hic vigilet.

## A L I U D

## EPIGRAMMA XVII.

DUM fugat hic hostes, magnus mihi Ductor ha-<sup>(betur;</sup>  
Majorem, somnum dum fugat, esse reor.

*Ad AULUM Anagrammatistam.*

## EPIGRAMMA XVIII.

NOS panem legimus panem; ut docuere Priores  
Scilicet; atque scapham dicimus, AULE, scapham,  
Lectio delectat sed te præpostera, vel quæ  
Surgit inexplicitis Mystica sæpè notis.  
Litterulas propria nimirum sede revellens,  
Alteram in alterius cogis abire locum.

Mollia

Mollia quid miserè crucias elementa? nigellas  
 Cadmi cur torques, improbe, filiolas?  
 Credo, tibi nocuit nigrarum nulla sororum:  
 Non animos tantos turba modesta gerit.  
 Immo illam quamvis vexes noctesque, diesque;  
 Noscere nec vultus dejerat illa tuos.

## A L I U D

## EPIGRAMMA XIX.

**O**bvius Exquiliis recitas Anagrammata centum;  
 Et totidem Thermis obvius, AULE, mihi.  
 Inter vina soles Anagrammata dicere semper;  
 Nec vacat à nugis Aula, forumque tuis.  
 Parce tuo lateri, dicebam, parce cerebro;  
 Parcere si jugulo non tibi cura meo est:  
 Hiscentum mihi pro monitis Anagrammata reddis;  
 Hoc mihi & immensum fœnore crescit opus.  
 Semper ego Auditor tantum? nunc accipe contra  
 Hoc Anagramma: Ohe, est jam satis; AULE, Vale.

**DIOGENES**, *Corinthis obsidioni depellendæ  
 laborantibus, Dolium versat, nè ma-  
 leferiatus videatur.*

## EPIGRAMMA XX.

**H**uc, illuc Domiporta rotat versatile testum,  
 Vappa Corinthiaci, ludibriumque Fori.

## 68 EPIGRAMMATUM

Futile præsidium quid rides inscia turba?

Quid rides Cynicâ Dolia pulsa manu?

Defendunt jaculis alii sua recta; Corinthum

Ut servet; propriam negligit iste Domum.

Qui sua, seque docet patriis impendere muris,

Sat bene judicio dimicat ille meo.

Hæc reputa; & breve Doliolum, quod carpis ineptè,

Imperii clypeum noveris esse tui.

*Fistulator Lusitanus in Indico Bello, ferreis  
globulis deficientibus, sclopum convul-  
sulis dentibus onerat.*

## EPIGRAMMA XXI.

Missilibus rabidam qui dentibus egerit iram,

Cædere non hostes ille; vorare cupit:

Spartano Duce dignuserat; qui, Xerse propinquo,

Edixit fociis prandia dura suis.

India Lusiacos olim terrebat alumnos,

Carnibus humanis pellere sueta famem.

Ut mutant mores populorum bella! tremiscit

Nunc Antropophagos India Lusiacos.

## A L I U D

## EPIGRAMMA XXII.

Dentibus Europam Ganges ditabat eburnis,

Queis Indæ canent ora superba feræ;

Fœ-

Fœnore jam multo sua munera reddimus Indis ;  
Dum servat dentes Indica terra tuos .

A L I U D

EPIGRAMMA XXIII.

**L**ONGA dies quamvis terat omnia dente voraci ;  
Imminuet dentes dentibus illa tuis .

NABUCHUS *divinos honores affectans*  
*mutatur in bovem .*

EPIGRAMMA XXIV.

**N**ABUCHUM vasti capiunt fastidia Regni ;  
Et gestit superos inter habere locum :  
Annuit æthereæ subridens Arbiter Aulæ ,  
Et, Deus, Ægypto Judice, dixit, eris :  
Utque magis possis merito clarescere cultu ,  
Aram te dignam Numine habebis, haram :

ARISTOTELES *æstus Chalcidici maris cau-*  
*sam non assequens, in eodem mergitur .*

EPIGRAMMA XXV.

**D**UM refluxas Sophiæ cultor videt anxius undas ;  
Par pelago, ingenio fluctuat ipse suo .

## 70 EPIGRAMMATUM

Undis ut pelagus; curisjactatur & ipse,  
Extra quod frustra quæritat; intus habet.

Quærere parce tamen subita nunc mole tumentis,  
Nunc iterum pelagi deficientis iter:

Digna, Stagirite, quæ te scelerata peremit,  
Ingenio nosci non erat unda tuo.

## A L I U D

## EPIGRAMMA XXVI.

**L**Æva Stagiræo ne detrahe Fama Magistro;  
Quod cadat arcani nescius ille freti.

Divinum ingenium est; quamvis non noverit æstum;  
Hunc quoque si poterat nosse, quid ille foret?

## A L I U D

## EPIGRAMMA XXVII.

**D**Um vagus erraret pelagi secreta requirens  
Littore Nicomachi filius Euboico;

Hostem, dixit, aquæ, rixosum perditæ, Nereus;  
Qui potis est Regni vertere jura mei.

Si ventis addat stridentibus iste Lycæi  
Irrequieta sui murmura; disperii:

Et, qui Pythagoræ pisces nunc sacra frequentant,  
Quam vereor, fiant ne Peripatetici.

*Ad CHARIDEMUM, ut Alcibimicorum  
consuetudinem vitet.*

## EPIGRAMMA XXVIII.

**U**T fugias avidos cane pejus, & angue Chymistas;  
Auriculas iterum vello, iterumque tibi:  
Conficiunt nullum vacuis fornacibus aurum;  
Conficiunt aurum sed, CHARIDEME, tuum:

*Nobilis Aulicus ad CINNAM  
Parasitastrum.*

## EPIGRAMMA XXIX.

**C**Um jentacula, cœnulas, merendas,  
Et convivia lautiora captas;  
Dicis, CINNAME, me bonum sodalem;  
Lambis cruscula cum lepusculorum,  
Picenas anates, aprum Sabinum,  
Vel, Bononia quod creat, minuta:  
Aut cum per medias, stupende sector,  
Cultro, & fuscinula furis palumbes;  
Dicis, CINNAME, me bonum sodalem;  
Et, quò pulcriculas magis liguris;  
Multa & guttura proluis culina,  
Nil passus reliquum cupediarum;  
Hoc tu candidius, frequentiusque  
Dicis, CINNAME, me bonum sodalem:

72 EPIGRAMMATUM

Non te de tenuique, sordidaque  
Amicos pudet æstimare pulpâ?  
Noſti, regula quos vetuſta fines  
Honeſtæ poſuit ſodalitati?  
Prſcum eſt, CINNAME: Amicus uſque ad Aram.  
Tuum eſt, CINNAME; Amicus uſque ad ollam.

STASICRATES *Statuarius Montem Atho  
in Alexandri Macedonis effigiem  
conformare contendit.*

EPIGRAMMA XXX.

ORbis ALEXANDRI fuerat prius; incipit arte  
Orbis ALEXANDER nunc, Faber, eſſe tuâ.  
Jam doctâ cruciata manu ſonat horrida rupes;  
Nefcio quid Regis jamque habet Æmathii.  
Poſcitis, effigiem cur non perfecit Author?  
Parvum pro tanto Rege putavit opus.

A L I U D

EPIGRAMMA XXXI.

EFFigies opere in medio quòd tanta relicta eſt,  
Non minor eſt operis gratia; major honos:  
Erueret ſimulacrum ingens annola vetuſtas;  
Dum non perfecit; tempora nulla timet.

ALIUD



## ALIUD

## EPIGRAMMA XXXII.

**I**Nclyte, sculpendo, Faber, audacissimus esses;  
 Si non vincendo fortior ille foret:  
 Tu scalpro montem; sed totum jam prius Orbem  
 In statuam gladio verterat ille suam.  
 Magna est effigies, Sculptor, qua corpora fingis:  
 Pone animum: minimum, crede, putabis Atho.

*DEIPARÆ ad Infanтем JESUM in Stabulo  
 jacentem querimonia.*

## EPIGRAMMA XXXIII.

**E**Rravistis proprios, ignes qui dixit, amores,  
 Dum meus est, heu! tam frigidus ignis, amor:  
 Vel nemora appositæ norunt consumere flammæ;  
 Sed, pudet, una meas vincit Arista faces.  
 Utque mei non ipsa ignes complectar amoris,  
 Ignis prædatur parvulus iste meos:  
 MATER, amans, quamvis direptis ignibus, ardet;  
 Est inter geminas frigidus iste faces:  
 Nate, tibi proprio nisi nascitur ardor ab igne;  
 Nunc saltem flammis discite flagrare meis.

MIDAS *Phrygiæ Rex, cibis in aurum  
versis, fame moritur.*

## EPIGRAMMA XXXIV.

**M**æonium miserè perdunt sua vota Tyrannum,  
Auri quem cruciat pernicioſa fames.  
Aurum tacta Ceres; Liquor est Lenejus aurum;  
Aurum sunt trepidâ fercula tacta manu.  
Cuncta aurum ut referant; subito dum funere pallet,  
Aureus ipſe etiam cogitur eſſe MIDAS.

*Ad CINNAM Astrologum.*

## EPIGRAMMA XXXV.

**D**li male te perdant: ægro mihi ſapè vocatus,  
Tricas cauſatus mille, venire negas.  
Ah ten' tam durum languenti, CINNA? tuique  
Qui deſiderio conficitur miſerè?  
Dum triſtes actum de me dixere medentes,  
Depositum deſlet jam prope tota domus:  
Hoc idem inſpecto ſi me tu dixeris ægro,  
Conualeam haud dubiè; protinus ergo veni.

*Ad*

*Ad OLLUM.*

## EPIGRAMMA XXXVI.

**Q**ui mea scripta capit Lector, carpitque modestè;  
 Non leviter Lector proderit ille mihi:  
 Me rudis oblectas sed tu; loligine nigra  
 Qui libros carpis, nec capis, OLLE, meos.

*De Vita moderatè agenda: ad SABINUM.*

## EPIGRAMMA XXXVII.

**S**i Tartessiaci jubar metalli,  
 Fasces Attalicique, Lidiique;  
 Si Cyri chlamys, & tiara Cræsi  
 Possent vincere tetricas Sorores,  
 Cessant præcipitis, SABINE, nunquam  
 Quæ vertigine nos rotare fusi;  
 Parcus non ego Mempheos superbæ  
 Turres astriferas, graves & aulæ  
 Laudarem Babylonicæ labores:  
 Laudarem Phidiæ, Scopæque signis  
 Latas gliscere porticus; vetustas  
 Et vix atria sustinere ceras.  
 Quod si proxima nubibus, columnis  
 Et latè domus impedita centum  
 Non mortis celeres moratur alas;  
 Nec curas animo graves, catenis

Affi.

## 76 EPIGRAMMATUM

Affixas adamantinis resolvit ;  
 Curto fornice me satis beatum  
 Angusti teneant Lares : frequenti  
 Hic gratos prece Cœlites fatigans ;  
 Aut ætas relegens vetusta quidquid  
 Doctis inseruit benigna chartis ,  
 Utar appositâ , fruarque vitâ ;  
 Ritè quam Sapiens vocavit ille ,  
 Commentariolum Necessitatis .

*Ad BASSUM podagra laborantem .*

## EPIGRAMMA XXXVIII.

**M**ORBIBUS è podagræ ventos dignoscis , & imbres ;  
 Illustrem morbus te facit Astrologum .  
 Accusas validis dum tu clamoribus illum ;  
 Rauca Fori discis jurgia Causidicus .  
 Dum vocem questu attollis , dum tendis acuto ,  
 A morbo discis Musicus esse tuo .  
 Quid cerebrum vexare juvat ; te BASSE, Magistri  
 Encyclopædiam si docuere pedes ?

*In funere VIRGILII MARONIS.*

## EPIGRAMMA XXXIX.

**M**ÆNIA quòd Graiis jaceant Priameja flammis ,  
 Regnorum instabiles novimus esse vices :  
 Sed

Sed lapsæ superant Trojæ tua funera ; lapsa  
 Si dici tua post carmina Troja potest .  
 Troja habuit , caneret Trojæ qui fata , MARONEM ;  
 Virgilium nullum fata MARONIS habent .  
 Post Trojam in Latio nata est Troja altera ; nullus  
 Natus VIRGILII è pulvere VIRGILIUS .

*In funere MARCELLI, MALPIGHI Medici  
 præstantissimi, editis de Plantarum  
 Anatome doctissimis Commenta-  
 riis, de re Litteraria optimè  
 meriti .*

## EPIGRAMMA XL.

ARTIS Pæoniæ postquam columenque , decusque ;  
 Invida Felsineum fata tulere senem .  
 Incomptis viduæ Dryades flevere capillis ;  
 Mæstarumque chorus flevit Hamadryadum .  
 Non dulces auræ nemora inter frondea ludunt ;  
 Aut filet ; aut iterat flebile carmen avis :  
 Jam neque Sylvicolas delectat fistula Panes ,  
 Nec choreas Fauni , Numina ruris , amant .  
 Omnes continuo plantis excussit honores ;  
 Stamina , MALPIGHI , dum tua Parca metit .  
 Sylva tamen cunctis servat tua nomina truncis ,  
 Nympharum niveâ nomina scripta manu .  
 Lenta salix , rugosa abies , crinita cupressus  
 Hoc memori impressum cortice carmen habent .  
 Ut

78 EPIGRAMMATUM

Ut multum his truncis crescant tua nomina ; crescet  
Plus tamen è chartis gloria nostra tuis.

*Ad RULLUM Mortales, ut vocant,  
saltus edentem.*

EPIGRAMMA XLI.

**V**ertice, RULLE, pedes bis ter revolutus ad imos,  
Dum retilis nuda, ceu redivivus, humo ;  
MORTALES meritò te jactas edere saltus ;  
Plus quoque, quam reris, perditè, mortis habent.  
Defiliunt multi ad Stygias sic. protinus undas :  
MORTALÈM hunc saltum dicere jure potes.

MARTIUM CORIOLANUM  
*à Romæ oppugnatione. Veturia  
Mater avertit.*

EPIGRAMMA XLII.

**M**ARTIUS ingratae muros hinc obsidet Urbis ;  
Obsidet hinc nati pectora mœsta parens :  
Hæc placidis sobolem cingit complexa lacertis ;  
Armata Patriam cingit at ille manu.  
Tela petunt Romam exanimem quo t ferrea ; Mater  
Tot lacrymis nati ferrea corda petit :  
Ille minis Patriam ; natum ferit ista querelis :  
Alternantque suas terror, amorque vices.

Dux

Dux victâ tandem matrem complectitur irâ ;  
 Et , Patriæ his lacrymis vincula solvis , ait ;  
 Quæ fuerat vincenda mihi , tibi Roma relicta est ;  
 Pro Româ , Matrem sat tenuisse mihi :  
 Ingratam Patriam plectens ultriùs armis ,  
 Ingratus Matri non ferar esse meæ .

## A L I U D

## E P I G R A M M A XLIII.

C Rinibus ut vidit Matrem properare solutis  
 MARTIUS ; & riguas intepuisse genas ;  
 Pone metum , dixit ; pudor est jam vincere Romam :  
 Vilescit Mater , te sine , Roma mihi .  
 Hæc ait ; obfessaque simul procul Urbe recedit ;  
 Quam si cœpisset , fecerat ille minus .

*Ad GALLAM gemmis ornatam .*

## E P I G R A M M A XLIV.

P Rædioli pretium baccato in pectore gestas ;  
 Distracti pretium Ruris inauris habet .  
 In digitos abiit Dotis tibi summa ; micatque  
 E collo , Emptori tradita parva domus .  
 GALLA , Prienzæ sequeris documenta Biantis :  
 Jam tua tu tecum nam bona cuncta geris .

SAN-

SANCTUS FELIX NOLANUS

*araneorum telis occultatus fallit  
insequentes hostes.*

## EPIGRAMMA XLV.

**O**ccupat annosi dum FELIX rudera saxi,  
Militis ad certam quem vocat ira necem;  
Continuò cæcâ fabricator araneus effert.  
Se caveâ; haud celerem ferre moratus opem.  
Ut vallo, telis Myſten defendit; & hostes  
Retibus, ut muscas, implicat ille suis.

*In Funere Hermocratis Medici.*

## EPIGRAMMA XLVI.

**C**um, lascivîa Funerariorum,  
Lictor Persephoneſque cum togatus,  
Nigras Hermocrates subisset umbras;  
Navarchus Stygiæ Senex Paludis,  
Ad ripam recubans arundinosam,  
Somno languidulos fovebat artus;  
Dum cessant animæ; recens nec urget  
Avarum vaga turba Portitorem:  
Stratum gramine quem virente, virga  
Tangit Mercurius, feritque: Nauta  
Ignavissime, cur laboris expers,  
Cessas, justitiumque, feriasque

Segni



Segni indicare non pudet phaselo?  
 Erectus, caput aggravante somno,  
 Senex in cubitum; ergo solus, inquit,  
 Cilleni, Hermocratem perisse nescis?

*Obsessum à Gallis Capitolium stridentes  
 Anseres servant.*

## EPIGRAMMA XLVII.

**I**Rrequiete ales, Romanæ consule Famæ;  
 Degeneres Aquilas dum sopor altus habet.  
 Clamitat; & GALLIS jam proxima funera cantu  
 Præfagit, novus ex anserè factus olor.  
 Scilicet haud aliis servari debuit armis,  
 Alite quæ fausto condita Roma fuit.  
 Dum silet, ut noceat, nocturno tempore GALLUS;  
 Ritè canit diræ confcia fraudis avis.

## A L I U D

## EPIGRAMMA XLVIII.

**S**Tridule grex volucrum, toto nunc pectore clama,  
 Atque strepens Latias suppleat ala tubas.  
 Jam mihi nec numeris Pandione nata canoris;  
 Nec sero placeat carmine tristis olor:  
 Quantula laus vanum modulari gutture cantum;  
 Argutâque leves voce ferire Notos?  
 Hostibus obsessas servare potentibus Urbes,  
 Hoc est, Luscinia parcite, dulce melos.

F

ALIUD

## A L I U D

## EPIGRAMMA XLIX.

**S**UMMUS honos Romę est, hanc quod servaverit (Anser,  
 Quo nulla est pictas vilior inter aves.  
 Nam servasse Deos tanto est manifestius Urbem,  
 Ales despectus quo magis ille fuit.

*In Tragedias ineptè scribentem.*

## EPIGRAMMA L.

**S**CENA Sophocleo cum Syrmate Gręca faceſſat;  
 Nescio quid majus nascitur Euripide;  
 Quę TRAGICI scribunt alii, sunt digna cothurno;  
 Hic ocreis etiam carmina digna facit.

*Flabellum ex palea.*

## EPIGRAMMA LI.

**Æ**STIVUM, paleę, Solem in fera bella cietis;  
 An quia vos patriis ille cremavit agris?  
 Si Zephiros pariunt, steriles malè vulgus aristas  
 Dicit; non adeo fertilis ipsa Ceres.  
 Nil levius paleā cum sit, stipulęque volanti;  
 Non miror, ventos si parit illa leves.

Quon-

Quondam ignis, paleæ, fueratis preda; flagrantés  
Discitis ac contra nunc superare faces.

*Ad ARTEMIDORUM Nanum.*

EPIGRAMMA LII.

**P**Umiluses, cubito non altior, ARTEMIDORE;  
Longius atque ipso corpore nomen habes.  
Aulæ delictum tamen es; Dominiq; voluptas:  
Delicias hominum nunc liquet esse breves.

*De Y, littera Pitbagoræ.*

EPIGRAMMA LIII.

**S**Trymoniaæ volucres quam formant axe figuram,  
Hac auxit Samius prima Elementa Senex.  
Læva Voluptatis; Virtutis dextera callem  
Signat, ut est bifidâ littera secta viâ.  
Sed longam producta trahit cur dextera caudam?  
Cur mutilata suo symmate læva caret?  
Debuit hæc potius productior esse: sinistrum  
Nam longe plures ingrediuntur iter.

LOTHI *Uxor in Statuam Salis*  
*convertitur.*

## EPIGRAMMA LIV.

**L**UMINA flagrantē in Patriā male cauta retorques:  
Ausa hoc de profugā fœmina sola domo es.  
SAL fatuam serò condit: quo colla, lacerti,  
Quo riguere manus; quo riguere pedes.  
Cum SALIS hæc mulier modios exhauferit omnes,  
Nil mirum, multas desipuisse, fuit.  
Hoc est fœminei fatum lacrymabile sexus:  
Vel sapere nimis, vel sapere nihil.

*Ad COTTAM Astrologum.*

## EPIGRAMMA LV.

**R**Ura petis, sudo nequidquam credule Cœlo:  
Horridus insanis cum ruit imber aquis.  
Palliolum, collare, togam perfunderis. Artem  
Fallacem liquido noscere, COTTA, potes.

*Ad ALEXANDRUM MACEDONEM, excisis  
Thæbis, Pindari Vatis domum inde-  
mnem esse jubentem.*

## EPIGRAMMA LVI.

**N**obile deletâ nomen tibi surgit ab Urbe:  
Major inoffensâ sed tibi fama domo;  
Urbis nimirum, vastâ quæ strage fatiscit,  
Commendat stantès ipsa ruina Lares.  
Quamvis nec Bacchi cecidistis gloria, **THÆBÆ:**  
Nil actum est odiis, Ductor acerbe, tuis.  
Dircæi **VATIS** nam sede superstite, Cadmi  
Diruta qui dicat mœnia, nullus erit.

## A L I U D

## EPIGRAMMA LVII.

**D**ebueras, domui qui parcis, parcere, & Urbi:  
Mœnia nobilior Pindarus ista colit.  
Quam ferro deles, domus ampla Amphionis, Urbes est:  
An nescis Tyriâ saxa vocata Iyrâ?  
Condidit Amphion; tu mœnia diruïs ista:  
Pindare, nunc Thæbas restituisse tuum est.  
Redde solum Alcide patrium; cunabula Baccho;  
Ultor ades geminis, major utroque, Deis.

Ut Bromio major celebretur, & Hercule; muros  
 Herculis, & Bromii diruit iste Puer:  
 Ut tu dulcisono fias Amphione major,  
 Redde iterum fidibus mœnia lapsa tuis.

## A L I U D

## EPIGRAMMA LVIII.

P Indaricos, Pellæa phalanx, everte Penates;  
 Atque ingrata tui munera tolle Ducis.  
 Quo meruit Vates tam sævam crimine pœnam;  
 Stare suam, patriâ præcipitante, Domum?

*De Gemino Fonte ante Ædem  
 Vaticanam.*

## EPIGRAMMA LIX.

N On huc, quas cernis, Neptunus transtulit undas;  
 Nec salit occultâ Tibridis unda viâ.  
 Æternos Petri facerent ut lumina luctus,  
 Suspicio hic fontes progenuisse ducs.  
 Ne stupeas, læto dum turbine profilit unda,  
 Lumina mœstitiam dedidicisse suam:  
 Cum veniam peterent pro crimine, mœsta fluebant;  
 Læta hodie; veniam nam meruere; fluunt.

*Filiæ*

*Filia Herodiadis D. JOANNIS BAPTISTÆ  
Caput Choreæ pretium obtinet.*

## EPIGRAMMA LX.

**E**Rgo, hilarat fontes dum saltatrix mensas,  
Grande CAPUT, choreæ præmia tristis habet?  
Mira sed argutas commendat gratia plantas,  
Dum movet ad certos ludicra membra modos:  
Quidni Virgo procax belle saltaret; ad imos  
Cui dudum cerebrum fluxerat omne pedes?

*Eadem Choreas agens in Amne glaciato  
dissecto capite interiit.*

## EPIGRAMMA LXI.

**S**anguineæ pretium Choreæ, dum ludit in aula,  
Poscit adoratum sæva puella CAPUT.  
Protinus at glacie sectum, dum ludit in unda,  
Amisit proprium merfa puella caput:  
Si benè utrumque caput reputas; nil poscere Virgo  
Nobilius; levius perdere nil potuit.

*De Libris omnigenæ eruditionis P. JOANNIS  
PAULI OLIVÆ Præpositi Generalis  
Societatis Jesu, & quatuor  
Summorum Pontificum  
Concionatoris.*

EPIGRAMMA LXII.

**S**ALVETE aureoli mihi libelli,  
Manus nectareas quibus pudicæ  
Laverunt Charites; Medulla Pithus  
Quos Grajæ beat, & beat Latinæ:  
Melle quos Saturos, comantiumque  
Refertos genus omne flosculorum  
Chloris Cœlicolum sacris in hortis  
Puro largiter educavit imbre.  
Immò quos jaculis ubique centum,  
Centum missilibusque, lanceisque  
Armat Relligio; quibus frequentes  
Clades Tænaris Hydra, Cerberusque,  
Et pestes domiti ferunt Averni.  
Nam quantus Stygiis timor Tyrannis,  
Celsis Martigenæ jugis Quirini,  
Sagittas acuit Ligur Pericles,  
Incensæ face fulguratque linguæ,  
Sacro dum gravis ore, purpurati  
Frœna splendida temperat theatri;  
Noxasque, & scelerum lues nocentes  
Purgatis jubet exulare terris?

Tunc



Tunc septem geminis canora plausus  
 Reddit collibus Hospitalis echo :  
 Flavus tunc, maris immemor, viæque,  
 Suspensas Tiberis coërcet undas.  
 Ergo ter merito, quaterque, multum  
 Salvete Aureoli mihi Libelli.

*Ad NÆVOLUM speculum consulentem.*

## EPIGRAMMA LXIII.

**O**Ra reformidas dum turpia, NÆVOLE; frangis  
 Iratâ speculum, comminuisque manu.  
 Stulta manus, quid frustra exempla innoxia pulsas?  
 Ipsum quin potius percutis Archetypon?

## A L I U D

## EPIGRAMMA LXIV.

**N**Equidquam cædis, redigisque in frustra fidellem  
 Censorem vultus, ingenuumque tui.  
 En nova Censurum sobolescunt agmina; testes  
 Et te deformem, NÆVOLÆ, mille probant.

METIUS SUFFETIUS, *Seditionis inter Romanos, & Albanos author, citatis curribus discerpitur.*

## EPIGRAMMA LXV.

SCindere quod socias voluit SUFFETIUS Urbes,  
 Distractus rapidis scinditur ipse rotis: —  
 Cum Marius; cum Sylla; paricum crimine Cæsar  
 : Grassetur, pœnâ cur caruere pari?  
 Scilicet aut dormit Roma; aut insomnia narrat  
 in Mendax Romanâ Livius Historiâ.

*Ad INNOCENTIUM XII. Centum Cellarum  
 Portum instaurantem.*

## EPIGRAMMA LXVI.

JUngimus externis iteratâ commercia terris,  
 Explicat & portus terra Latina novos:  
 Non ut præruptæ pendent nova fœnora cautes;  
 Non ut nostrâ novâ littora merce fremant.  
 Excitæ fervent, PRINCEPS, te visere gentes,  
 Dum vulgat laudes undique Fama tuas:  
 Major honos Urbis; major, te PRINCIPE, Roma;  
 Pluraque, suspiciat quæ novus hospes, habet.  
 Urbis dum crescunt miracula; semita in Urbem  
 Debuerat lato crescere & ipsa mari.

AD

## A D E U N D E M

*De eodem Portu uberibus aquis ditato, &  
restituto Aqueductu Trajani.*

## E P I G R A M M A LXVII.

**O**lim Trajani jussu decurrere Portu,  
Dicite cur longum delituistis aquæ?  
Dic, age; cur iterum cœcis rediviva latebris,  
Lætæque festivo murmure lympa salis?  
Credibile est, te sponte diu latuisse; superbum  
Sub tanto ut caperes Principe rursus iter.

## A D E U N D E M

*Pro Aedibus Lateranensibus in Egenorum  
Hospitium commutatis.*

## E P I G R A M M A LXVIII.

**E**Ffera sanguineis Capitolia Roma triumphis  
Extulit; & cello fixa trophæa jugo.  
At sua nunc Pietas pandit Capitolia; vassa  
Quâ Lateranensis mole coruscat apex.  
Si conferre licet gemini miracula collis;  
Ultra se victum Martius ille feret.

Ille

## 92 EPIGRAMMATUM

Ille ferox miseris populorum cladibus horret ;  
 Augusto miseros colligit iste sinu :  
 Olli sola placet terroris Imagine pompa ;  
 Solus in adverso Colle triumphat amor.  
 Sed nullæ hic Statuæ Heroum ; nec nobile vulgus ,  
 Phidiacæ vitam cui peperere manus .  
 Nobiliora vides inopes simulacra receptos :  
 Illa homines referunt signa ; sed ista Deum .

## A D E U N D E M

*Quod Sepulcrum sibi minimo sumptu  
 vivus extruxerit .*

## EPIGRAMMA LXIX.

**F**Alleris , exiguum credis si forte sepulchrum ,  
 Quod statuit cineri sobria cura tuo .  
 Parva licet ; nimis ampla locas Insignia mortis ,  
 In tua cui certum est facta licere nihil .

## A L I U D

## EPIGRAMMA LXX.

**N**Ulla tuos decorant cineres spirantia signa ;  
 Nobile nec promit tessera sculpta genus ;  
 Non elata super fulgentes explicat alas ;  
 Mentitur resonam Fama nec ære tubam .  
 Nulla

Nulla sinu laudesque tuas, Titulosque Tuorum  
 Auratis referunt Lydia saxa notis.  
 Marmor adest, pelagi quod nulla pericula laudant;  
 Et retinent nomen saxa modesta tuum.  
 Nomen habent hæc saxa tuū? mihi crede; sepulchrum  
 Clarius ambitio ponere nulla potest.

DIVÆ MARIÆ MAGDALENÆ *effigies*  
*Corallina.*

EPIGRAMMA LXXI.

ET decus, & pretium rubicundi viminis æquat  
 MAGDALA, durities cui pretiosa riger.  
 Cætera concordēs; hoc solum triste gementis  
 Ingenio Divæ dissidet ille lapis:  
 Virgula durefcit nam protinus æthere viso,  
 Quæ latuit patrias mollior inter aquas:  
 Sed contra; mollis luget dum crimina vitæ  
 MAGDALA, bina inter flumina dirigit.

*Ad CINNAMMUM Stillatitii Vini Propolam*  
*circumforaneum.*

EPIGRAMMA LXXII.

DUM mihi vix demum componit lumina, primo  
 Grator Eoo quæ solet esse, quies;  
 CINNAME, continuò venali gutture sævis;  
 Et resonant toto vina cremata Foro,  
 Cri.

## 94 EPIGRAMMATUM

Cristatus nondum pennis plaudentibus ales  
 Arguto reducem nunciat ore diem:  
 Nondum, nuda pedes, foculos, prunasque relictas  
 Excitat, haud longi parca laboris, anus:  
 Cum tu præcinctus totam, nexuque tabernam,  
 Mobilis & mensæ turgidus uræcolis,  
 Undique circumfers vinosam sordidus alvum;  
 Stillati nectar triste crepasque meri.  
 Ardentem Ambrosiam laturis occurrere Cœnis,  
 Et robur venis addere nempè putas;  
 Non equidem abnuërim: sed nos insomnia tollat,  
 An stomachus, quidquam tunc referre putas?  
 Mensa mihi frugi est; nec me pituita laceffit,  
 Nox malè cœnatum quem vigil omnis habet.  
 Quid mihi cum latice ignito? medicamina crudis  
 Ista feras: somnum, CINNAME, vende mihi.

AD COSMUM III. MAGNUM DUCEM  
 ETRURIAE cum Anno Sæculari Romam  
 petens ad Antii Portum appelleret.  
 Ejusdem Constantia celebratur.

## EPIGRAMMA LXXIII.

QUI didicit, tutus Virtutis robore, Princeps  
 Obvia Fortunæ pectora ferre minis;  
 Nunc subit illustrem Fortunæ nomine Portum,  
 Nomine; nam victor cætera pontus habet.  
 Prisca superstes adhuc quòd si Dea Tempia teneret,  
 Diruta quæ vasto procubuerunt mari;  
 Splen-

Splendidiore cadens iterum convulsa ruina,  
Victores peteret sponte terenda pedes.

BACCHI *Statua ad Fontem.*

## EPIGRAMMA LXXIV.

UT curas animi, spectatrix turba, levares,  
Dona tibi nostri nectaris ante dabam:  
Ebria sed postquam facta es tu munere postro;  
Largitur medicas jam tibi BACCHUS aquas.

## A L I U D

## EPIGRAMMA LXXV.

DELicias nitidi fontis quicumque tueris,  
Exemplo discas sobrius esse meo.

## A L I U D

## EPIGRAMMA LXXVI.

LENæus puras dispensat prodigus undas:  
Nulla sed, heu! gratum dat mihi Nympha merum.

ENCELADUS *sub Ætnâ Monte sepultus  
flammas evomit.*

## EPIGRAMMA LXXVII.

**T**Rinacriis hunc tota premat licet Ætna cavernis;  
Impar pro tantâ mole recumbit onus.  
Dum furit, & moto juga discutit ardua tergo,  
Mons superimpositus creditur urna levis.  
Saxa ferox, multamque humeris immanibus Ætnam  
Projicit; & pœnam fulminat ipse suam.  
Vindictæ Instrumenta novæ pœna ipsa ministrat:  
Quæ patitur, faciunt fulmina fulmineum.

## A L I U D

## EPIGRAMMA LXXVIII.

**E**Rrat, qui fauces hic pandere credidit Orcum,  
Et Stygium Siculo Monte tonare Jovem.  
ENCELADUS furit his Campis; non ficta minantur  
Tartara; namque Erebi mitior ira foret.



ORONTA *Virgo Cypria, cum Bizantium  
deferretur; incensâ navi, occumbit  
Victima Castitatis.*

## EPIGRAMMA LXXIX.

**C**ollige Virgineos cineres, castamque favillam,  
- Virginis exemplo facta pudica, Cyprus.  
Insula si Venerem coluit mollissima; Virgo  
Expiat antiqui criminis ista notas.  
Non satis est forti terras purgasse Puellæ;  
Æquoreas proprio funere purgat aquas.  
Nam si fœdarunt Veneris cunabula Pontum;  
Eluit obscœnum, dum perit ista, salum.  
Quæ superant solum sedes, pete Tartara; terris  
Pulsa Venus Cypriâ Virgine; pulsa mari.

*Ad Posthumum ridiculè avarum.*

## EPIGRAMMA LXXX.

**U**t parcas oleo, dum carmina, POSTHUME, scribis,  
Pro Lychno, vigilis lumina felis habes.  
Magnus honos feli est, chartis succurrere: muri,  
Illas cum rodet, gloria major erit.

CAJUS CALIGULA IMPERATOR  
*Equum sibi Collegam in Consulatu  
 pronunciat.*

## EPIGRAMMA LXXXI.

**J**ura viris celso dispensat vertice ; primum  
 Qui patiens hominum fræna inomordit Equus.  
 Ipsa, nefas ! furor est, jam monstra invertere : saltem  
 Centauros rectos Thessala terra dedit.

## A L I U D

## EPIGRAMMA LXXXII.

**O**lim si duro venit Dictator aratro ;  
 E stabulo fasces nunc quoque Consul habet.  
 Do CAJO veniam : non possum parcere Rómæ :  
 Unum CAJUS Equum nam colit ; ista duos.

## A L I U D

## EPIGRAMMA LXXXIII.

**T**Rojani fileantur Equi miracula : magnum  
 Hic regit ; ille olim perdidit Imperium.

## Ad ANGELUM CUSTODEM.

## EPIGRAMMA LXXXIV.

**O** Qui me deciesque, centiesque,  
 DUX FIDISSIME, singulas in horas,  
 Anguis Tartarei revellis ore,  
 Longæ faucibus eripisque mortis:  
 Occultus clypeo negante frangi,  
 Occultus radiis micantis hastæ,  
 Dies pervigil usque, & usque noctes,  
 Tutas excubias agis, potensque  
 Luctator Scygios tenebriones  
 Ingrato procul exigis duello;  
 Et cladis renovas probrum vetustæ.  
 Tu me per juga, deviosque saltus  
 Gressus heu male providos ferentem,  
 Achates, Pyladesque sospitator,  
 Certo restituis gradu; dolosum  
 Et crebris iter explicas periclis:  
 Tu clavo Palinurus, & trementem  
 Dextro sidere dirigis phaselum;  
 Euripos, Maleasque, vorticôsæ  
 Vitare & rabiem doces Charybdis.  
 Emenso atque utinam satis viarum  
 Fas sit, sidereos tenere portus;  
 Acti te socium, Ducemque cursus  
 Votivo & liceat sacrare pleæro.

*Ad S. FRANCISCUM BORGIAM,*  
*cum, emaciato jejuniis corpore, ulna-*  
*re spatium exhaustę pellis in ad-*  
*versum latus complicaret.*

## EPIGRAMMA LXXXV.

**I**N tenues collecta sinus cutis arida vires,  
 BORGIA, non minuit; suggerit illa tibi.  
 Spicula Tartareus si noxia diriget hostis;  
 Si Ditis coëant agmina tota simul.  
 Non opus est corium æratum; taurinaque stringas  
 Tergora; pro clypeo pellis inanis erit.

## A D E U N D E M

*Cum inter venandum, aves adoriente*  
*Accipitre, oculos in Terram*  
*dejiceret.*

## EPIGRAMMA LXXXVI.

**A**Rdea dum prædam plaudentibus occupat alis,  
 BORGIA, cur nudæ lumina figis humò?  
 Nempe novus forti de Venatore Sacerdos,  
 Accipiter trepidam dum ferus urget avem;  
 Acci-

Accipitrem, prædamque simul tu cordis in ara  
 Dona litas Domino, libaque grata, tuo.  
 Ut novus es Mystes; nova sic est victima; cæsa est  
 Nam prius illa Deo, quam cadat icta solo.

*BARCINO post diuturnam obsidionem, sub  
 ipsum tempus conciliatæ Pacis inter  
 Europæ Principes, Gallis  
 deditur.*

## EPIGRAMMA LXXXVII.

**B**ARCINO Sequanici diuturno verbere Martis.  
 Respiret nullis cum lacerata moris;  
 Non tamen Hesperidum nutant ingentia corda,  
 Corda Saguntinam vincere docta fidem:  
 Ergo cum latè fuso non cederet hosti;  
 Cederet obfesso cum neque clausa mari;  
 Æthere lapsa nitens Virgo fulgentibus armis,  
 Et celsum galeâ tecta micantè caput,  
 Impulit indomitos muros, postesque refregit;  
 Et locat in medio Gallica signa foro;  
 Hæc effata super: dextrâ procumbere Troja  
 Hesperia hâc solùm, parce Gradive, potest.  
 Diriguere omnes, ignoto Numine Divæ;  
 Sed pandit pulchros cassis aperta dolos.  
 Bellonæ poteras vultum expectare ferocem;  
 Ora remigrantis mitia Pacis erant.

SCIPIO AFRICANUS *Linterni in Arc's  
similitudinem Villam extruit.*

## EPIGRAMMA LXXXVIII.

**H**Anc Libyæ terror Campano in lixtore molem  
Condidit, invidiam cum fugeret Patriæ.  
It Cælo turritus apex; & fronte minaci  
Bellum astris, tellus si vacat hoste, movet.  
Valla super quoties cum luderet umbra rosarum;  
Palluit ad durum purpura mollis iter:  
Rivulus expavit quoties; ne, Marte propinquo,  
Læderet ingenuas sanguinis unda nives.  
Delicias suus horror habet: ne crede virenti  
Eductam clivo luxuriare domum:  
Scipiadæ nisi testæ forent; hæc, lixtore Thracum  
Posthabito, Mavors incoluisse velit.

## A L I U D

## EPIGRAMMA LXXXIX.

**H**erbida prata super qui tales extruit arces,  
Ille arces meruit vincere, Pæne, tuas.  
Transtulit hic Libycæ muros, non diruit, Urbis;  
Scis quo transtulerit? Martia rura vides.

## A L I U D

## EPIGRAMMA XC.

**R**omani, Libycique anceps sit gloria Martis;  
 Romano at cedas Africa Ruricolæ.  
 Otia dum coluit, defloruit Annibal; augent  
 Otia Romani robur at ista Ducis.

*Ad CINNAM Pædagogum bene nummatum.*

## EPIGRAMMA XCI.

**I**nsimulat te Turba Remi nescire Latinè,  
 CINNA, capillati Gymnasiarcha Chori.  
 Trojugenæ fatui! cum sit Lucretius illi  
 In digitis; callet verba Latina satis.

## A L I U D

## A D E U N D E M

## EPIGRAMMA XCII.

**Q**uod solido nil mense legas; doctissime CINNA,  
 Objicit immeritò fama sinistra tibi:  
 Non legis; ignavum cum decoquit alea pernox;  
 Aut unctâ farcit blanda culina dape:

SCIPIO AFRICANUS *Linterni in Arc's  
similitudinem Villam extruit.*

## EPIGRAMMA LXXXVIII.

**H**anc Libyæ terror Campano in littore molem  
Condidit, invidiam cum fugeret Patriæ.  
It Cælo turritus apex; & fronte minaci  
Bellum astris, tellus si vacat hoste, mover.  
Valla super quoties cum luderet umbra rosarum;  
Palluit ad durum purpura mollis iter:  
Rivulus expavit quoties; ne, Marte propinquo,  
Læderet ingenuas sanguinis unda nives.  
Delicias suus horror habet: ne crede virenti  
Eductam clivo luxuriare domum:  
Scipiadæ nisi tecta forent; hæc, littore Thracum  
Posthabito, Mavors incoluisse velit.

## A L I U D

## EPIGRAMMA LXXXIX.

**H**erbida prata super qui tales extruit arces,  
Ille arces meruit vincere, Pæne, tuas.  
Transtulit hic Libycæ muros, non diruit, Urbis;  
Scis quo transfulerit? Martia rura vides.

ALIUD



## A L I U D

## EPIGRAMMA XC.

**R**omani, Libycique anceps sit gloria Martis;  
 Romano at cedas Africa Ruricolæ.  
 Otia dum coluit, defloruit Annibal; augent  
 Otia Romani robur at ista Ducis.

*Ad CINNAM Pædagogum bene nummatum.*

## EPIGRAMMA XCI.

**I**nsimulat te Turba Remi nescire Latine,  
 CINNA, capillati Gymnasiarcha Chori.  
 Trojugenæ fatui! cum sit Lucretius illi  
 In digitis; callet verba Latina satis.

## A L I U D

## A D E U N D E M

## EPIGRAMMA XCII.

**Q**uod solido nil mense legas; doctissime CINNA,  
 Objicit immerito fama sinistra tibi:  
 Non legis; ignavum cum decoquit alca pernox;  
 Aut unctâ facit blanda culina dape:

Non legis; hybernos cum, pulpâ stratus inerti,  
 In medium somnôs protrahis usque diem:  
 Turba papyraceos sed cum studiosa cucullos  
 Porrigit ære graves; tunc bene, CINNA, legis.

PISANDER *proprii Corporis umbrâ conterri-  
 tus, eandem insequitur.*

## EPIGRAMMA XCIII.

PISANDRUM rides, quodd se se fugerit hostem?  
 Hostes te melius comperit ille suos.  
 Se novisse bonum est; doctis si credis Athenis;  
 Addit PISANDER; se metuisse, bonum est.

## A L I U D

## EPIGRAMMA XCIV.

DUM frustra hic sequitur fugientem corporis um-  
 (bram,  
 Dum rudis occurfus, quos creat ipse, pavet;  
 Ridiculum est, dices, vanas sectarier umbras:  
 Et qui Regna petit, dic mihi, quid sequitur?  
 Umbra fugax; celeri sunt Regna fugacia cursu:  
 Fallax umbra; suos Regna teguntque dolos.  
 Reges PISANDRI pugnas imitantur inanes;  
 Regibus hoc solum discolor ille fuit.  
 Umbras dum peterent, aliis nocuere Tyranni:  
 Umbram dum sequitur, sed nocet iste sibi.

*In illa verba DIVI JOANNIS BAPTISTÆ:  
Ego vox clamantis in deserto.*

## EPIGRAMMA XCV.

**Q**Uæ nova; Nestoreo quæ dulcior ore, per umbras  
Deserti nemoris lingua diserta sonat?  
Vox sonat hæc Verbum: Vocem vox ista revelat;  
Sed vox nulla tamen dicere plura potest.  
Uno nam veluti dixit Pater omnia Verbo;  
Unâ ZACCHARIDES omnia voce refert.

*De lancibus fictilibus à RAPHAELE URBI-  
NATE depictis.*

## EPIGRAMMA XCVI.

**T**Alia si præstat fortunæ oblita prioris,  
Docta Saguntinâ currere testa rotâ;  
Fastidire potest gemmantia pocula luxus;  
Invideat Samio splendida mensa luto.  
Scilicet ipsa tibi, PICTOR, miracula fordent;  
Quæ furor est patinis perdere fictilibus.  
Cœlesti ingenium, Cœlesti nomine dignum  
Esse tibi, RAPHAEL, Terra vel ipsa probat.

ALIUD

## A L I U D

## EPIGRAMMA XCVII.

**P**istor eras; novus es mirâ nunc arte Prometheus;  
 Sic animas vili dum simulacra luto:  
 Hoc dispar: merito te Gloria figit Olympo;  
 Illum Caucaſeis debita pœna jugis.

## A L I U D

## EPIGRAMMA XCVIII.

**Q**uæ tua debuerant æternis ſigna metallis  
 Vivere, cur Figuli labile monſtrat opus?  
 In pretio eſt operis facilis jactura caduci;  
 Pars vitæ, ſubito poſſe perire, fuit.

*Ad FABULLUM Poëtam.*

## EPIGRAMMA XCIX.

**T**antam non equidem, FABULLE, rebar  
 In naſum tibi me ciere bilem,  
 Cum te verſiculos parum pudicos  
 Dixi ſcribere: nunc palam retexo  
 Si quid ruſticius, ſeveriusque  
 Cenſor commonui minus benignus.

Et

Et qui te modulos procaciores,  
 Et dixi mera lustrare lustra;  
 Testatum facio, tuis libellis,  
 Et juro, Veneres adesse nullas.

HERCULES LINUM *Musicæ Præceptorem,*  
*injectâ in caput cytharâ,*  
*interficit.*

## EPIGRAMMA C.

CUM rudis erraret per nervos dextera, nullæ  
 Errare impunes quâ potuere feræ;  
 Robore dejecto, lentisque ingloria nodis,  
 Otia carpebat segnia clava minax:  
 Erubuit generosa manus; cessare lacertos  
 Impigra nec fortes sustinet ira diu.  
 Torquet in artificem buxum vocale; necatque  
 Vel Cythara, Herculeo pollice facta nocens:  
 Æmula quæ clavæ, sua sternere monstra superbit;  
 Ipse suæ monstrum nam LINUS artis erat.

## A L I U D

## EPIGRAMMA CI.

PATRATAS forti nunc credimus Hercule clades;  
 Clavæ namque fides asseruere fidem.

CHRISTUS DOMINUS *in Horto, sanguineo  
sudore perfunditur.*

## EPIGRAMMA CII.

**R**Itè fluit madido sudor tibi corpore ; longum  
Scilicet es Cœli è vertice mensus iter :  
Vix pugnam ingressus manas sudore cruento ;  
Pugna ubi desierit , quis tibi sudor erit ?

## A L I U D

## EPIGRAMMA CIII.

**C**Riminis hic vindex Hortus , si criminis alter  
Causa olim , eversâ posteritate , fuit.  
Germina ne quæras Horti ; cruor irrigat illum :  
Heu tantum pœnas irrigat iste liquor .  
Efferat terribiles fideat Calvaria pœnas ;  
Nec tumeat magno funere tristis apex :  
Si rupis diræ pœnas æquaveris istis ;  
Illum homines dices ; hunc cruciasse DEUM.

*Aves ad Uvas advolant à ZEUXIDE  
depictas.*

EPIGRAMMA CIV.

**I**Gnaro, mirum ! spumat vindemia Baccho ;  
Purpurat, Autumno nec generante, merum,  
Picta coloratos decerpit turba racemos,  
Subdola dum longam provocat esca famem.  
Sed postquam telis illusa recessit ; ad uvas  
Illam nec veras approperasse putem.  
Nam, quæ crediderat veras, à ZEUSIDE pictas,  
Jure putat pictas, quas sua gignit humus.

*De BARRA Multo mero se ingurgitante.*

EPIGRAMMA CV.

**I**Nvitat positâ dum sese BARRA diotâ,  
Et trahit è madido mustea vina lacu,  
Dicta Salus Sponsæ decies, ter dicta Sorori,  
Dicta quater Patruo, dicta quaterque Patri.  
Lena tulit multas, absens & amica Salutes,  
Et congerronum de grege quisquiliæ.  
Emoritur tandem plus mille Salutibus hauflis,  
Et vina ad Stygias pota refundit aquas.  
Miraris ? prodesse solent ut bina venena ;  
Sic homines potis est perdere multa Salus.

*Somnium de Poësi.*

## EPIGRAMMA CVI.

**E**Xternam mihi visa per quietem ,  
 Noctis candida dispulit tenebras  
 Phœbi Filia ; quæ , soluta curis ,  
 Umbras Castalii colit recessus :  
 Dotalis lyra , cælibesque tota  
 Cui Laurus , Ederæque sunt supellex .  
 Reginæ latus hinc , & hinc tegebant  
 Arguti modulaminum Ministri ,  
 Nexæque Artifices , Fabrique vocis ,  
 Felices Genii : quibus nec una ,  
 Nec dispar facies , amore junctos  
 Sed qualis decet ; arguitque Fratres .  
 Adstabat bicolor , bifrons Jambus ,  
 Qui canos Hecubæ ferit capillos ,  
 Grajas sanguine polluitque Mensas ;  
 Idem bellicrepos potens Thraſones ,  
 Et Davos hilari citare focco .  
 Heroos aderat ciere cantus  
 Pollens alter , ahenæumque Martem :  
 Et tristes Elegi ; Modi que , Sappho  
 Quos primum reperit parum pudica ,  
 Celsæ Pindarus & Pater Camenæ ;  
 Et quos Stesichorus , Simonidesque ,  
 Et quos , percita grandiore pleſtro ,  
 Creavit numeros canora Lesbos .  
 Leves nectare delibute pennas ,

Nec



Nec te præteream, jocosæ Scæzon;  
Nec vos suaviloquo filens Phalæco  
Omittam genitos, bonos sodales,  
Blandos, Juppiter, integellulosque,  
Quos Graji Hendecasyllabos vocarunt.  
Cum Divæ speciem, sacrosque vultus  
Mirarer, geminum jubarque frontis;  
Subrisit Dea paululum, sonosque  
Tales dulcifluo remisit ore.  
Quæ me subsequitur, decora turba,  
Illustres Genii, Modique; formæ  
Dum primos cupidi petunt honores,  
Non cessant avidâ calere rixâ.  
Nunc te juncta caterva Cognitorem,  
Nunc te convenit Arbitrumque; Fratrum  
Tu litem dirimas. pudore victus,  
Dejectis oculis parumper hæsi;  
Vix tandem hæc humilis, tremensque dixi.  
Merè ut Judice tristior recedat  
Quisquam de Sociis, amore longo  
Quos notos mihi suspicor, fideque?  
Sed ne morigerum parum queraris,  
Quem tanto reputas honore dignum;  
Et suffragia quò feram pudenter,  
Sic nostram licet explicare mentem.  
Novis haud dubiè canenda donis  
Tu nobis venies, sopore functis:  
Quo te Carmine tunc feram, colamque,  
Probatos mihi, noverisque visos  
Illos tu modulos venustiores.

*De TUCCA Astrologo.*

## EPIGRAMMA CVIL

**Q**ui sortes varias, vicesque rerum,  
 Qui casus dubios, sepulta sacris  
 Et arcana laceffitis futuris;  
 Alta Dindyma, Delphicaque lauros  
 Non est, cur Salaminias per undas,  
 Et viso Maleæ petatis æstu.  
 Unum, si sapitis, frequenter unum  
 Consultum faciles adite TUCCAM.  
 Malarumque tot arduos viarum  
 Compendifacite, & maris labores.  
 TUCCA verius est nihil monente;  
 Nil est firmitus annuente TUCCA.  
 Non oracula certiora cæco  
 Dabit Deiphobe furens in antro;  
 Non responsa feret verenda tantum,  
 Quem Pelusiaci colunt, Serapin:  
 A Fauno monitus rudes Latini  
 Nec tales referent; licet juvencos  
 Bis centum feriant; tepentiumque  
 Stratis pellibus incubent bidentum.  
 Ille, Marmaricis potens arenis,  
 Jam nobis valeat bicornis Ammon;  
 Dodonæ & valeat Columba duplex:  
 Ad TUCCÆ tripodes, domesticamque  
 Cortinam potius gradus feramus.  
 Qui si nubila fœda, præscioque

In-

Informes hyemes notabit ore ;  
 Innubem faciem Poli , diesque  
 Ipsos Halcyonum scias futuros.  
 Quod si perspicuos , comaque signet  
 Lætos affore puriore Soles ;  
 Rauca fulmina , turbineſque , & omnes  
 Expectes licet imbrium ruinas.  
 Promisit Boreas ? malignus illam  
 Anni particulam tenebit Auster :  
 Prædixit Zephirus ? minax Eois  
 Eurus fluctibus efferet jugales.  
 Nullus sanguineo magis Gradivo ,  
 Diris cædibus & vacabit annus ;  
 Quam discordibus ille præliarem  
 Quem Regum fore prædicabit armis .  
 Sic præpoſtera cuncta nuncianti  
 Certa in oppoſitum , tenaxque ſemper  
 Conſtabit ratio , fideſque Vati .  
 Hac mendax ratione , tam diſertè  
 Eventus dubios , reconditoſque  
 Caſus nos poterit docere TUCCA ;  
 Quam ſi Tireſias , ſciensque Protheus ;  
 Aut verax Lyciſque , Delphiciſque  
 Phœbus ex adytis loquatur ipſe .

*De Ollandis , ferratis Soleis , glaciatum  
 Rhenum trajicientibus .*

# EPIGRAMMA CVIII.

Rheni prognatas Alpino fonte jocosus  
 Trajiceret celeri cum pede Paſtor Aquas ,  
 H Ira-

114 EPIGRAMMATUM

Iratus fremuit, nivibusque, atque amnis amnis;  
 Turgidior pavidos obsidet amnis agros.  
 Illum, sed geminis dum faucibus exit in æquor,  
 Alligat ingrato frigida bruma gelu.  
 Extremosque sinus, & pinguis culta tenentem  
 Transmeat ærato Turba Batava pede.  
 Obstupet Ille novos, glacie cedente, volatus;  
 Alas dum pedibus sufficit ipse chalybs.  
 Perque tuum jurat sceptrum, Neptune; nec ipsum  
 Alatum pedibus tam bene Mercurium.  
 Ocyus & sese, adductis huc omnibus undis,  
 Trajectum, modicas quam prope Fontis aquas.  
 Hæc memorat; tantis poteratque rigescere monstris,  
 Lenta prius rapidum ni glaciasset hyems.

*De XANTIPPE Socratis Uxore rixosa.*

EPIGRAMMA CIX.

CUM Socrates Sponsæ mores non ferret acerbos,  
 Non quidquam monitis proficeretque suis;  
 Ad Superos tandem versus; da, CONJUGE, dixit,  
 Juppiter, ut possim commodiore frui:  
 Subrisit placido Proles Saturnia vultu;  
 Atque apage hinc stultas, dixit, inepte, preces.  
 A Jove tunc petis, quod non sibi Juppiter ipse  
 Tradere, depromat robur ut omne, potest?  
 Quas non emendare licet, toleremus uterque:  
 Ut tibi XANTIPPE, sic mihi Juno domi est.

*Puer*

*Puer ex AMBRACIA Platonis Phædonem  
manutenens, desiderio Immortalitatis,  
è Turri se jactit præcipitem.*

EPIGRAMMA CX.

**D**EFILIE, æternæ captus dulcedine vitæ,  
E Turri præcepti AMBRACIOTA Puer.  
Sic Plato perpetuum populos transmittis in ævum?  
Ne pereant, homines atque perire doces?  
Assertor vitæ qui debuit esse perennis,  
Phædon Carnificem se stupet esse tuus.

*CENTAURI Statua in Tusculanâ Villâ  
Aldobrandinâ contentissimum  
sonum cornu ciet.*

EPIGRAMMA CXI.

**T**Elegoni Colles cornu resonante fatigat  
Semivir Æmonio natus in axe Gigas.  
Hyleum, Nessumve putes, Rhætumve, Pholumve;  
Excipe Chironem; quilibet alter erit.  
Pelides torvi nam si Custodis in antro  
Vel semel audisset, quos agit iste, sonos;  
Hoc hortante, Puer Xanthum petiisset; Ulißes,  
Expectare tuam nollet & ille tubam.

*Ad RUFUM Ludimagistrum !*

## EPIGRAMMA CXII.

**D**UM RUFUS ventrem vitulo lactente saginat;  
 Immori, ait, chartis quid juvat Hermogenis?  
 Enge: Papæ; sunt res salvæ; sic itur ad astra:  
 Jam mihi nec betas, Quintiliane, sapis.  
 Helluo librorum sit Festus, Valla, Strebæus;  
 Helluo librarum tu mihi RUFUS eris.

# EPIGRAMMATUM

## LIBER III.

*Ad Fluvium Lethen.*

### EPIGRAMMA I.

**C**Armina, quæ lusi Sebethi natus ad undas;  
 Dum colerem ripas, Tibri superbe, tuas;  
 Si neque Sebetho veniunt, nec Tibride digna,  
 Mergere soporatis, lethifer amnis, aquis:  
 Quòd tua non curem, quin spontè obliviam poscam;  
 Hoc volo post cineres sed superesse meos.

*CYRI Regis Caput à TOMIRI Regina  
 Scytharum in utre sanguine oppleto  
 contumulatur.*

### EPIGRAMMA II.

**S**anguineo tegitur caput exitiale sepulchro;  
 Quas solùm sitiit, mergitur inter aquas.  
 Non illud tellus, non condunt æquora; servat  
 Sola sed extincto sanguinis unda fidem.  
 Quin etiam hic gratos potet licet usque liquores;  
 Poscis sanguineo quid facit utre? sitiit.

*Ad NATTAM Circulatorem.*

## EPIGRAMMA III.

**I**mplicitos humeris angues, & brachia circum  
 Serta velut florum, fasciculosque geris.  
 Tu globulos ternâ versas dum pixide, fallunt  
 Lyncea Dedalæ lumina sæpe manus.  
 Pharmaca tu vendis, cataplasma, emplastra, trochiscos;  
 Ampullis fatuam conciliaſque fidem.  
 Tu cantus avium varios; tu barbica calles,  
 Tympana, Sambucam, Cymbala, Sistra, Lyram.  
 Grandia sæpe levi transmittis dolia saltu;  
 Illa licet saltu tu brevior bibas.  
 Ore Venafranum, Rhodiumque refundis eodem;  
 Cœcuba tu regeris, Chia, Falerna simul.  
 Malobathrum, nardum, balanum, myropolia tota  
 Spirat inexploto qui fluit ore liquor.  
 Ingeris innocuas in hiantia guttura prunās;  
 Trajicis infonti sæpius ense manus.  
 Prothea, Mercurium superas: & Apolline major  
 Es fidicen, Vates, Clinicus, Arcitenens.  
 Quæsieris tantas cum tot sudoribus artes;  
 Omnes miramur, NATTA; quod esurias.



*De Imagine CHRISTI DOMINI à Laurentio  
Bernino carbone delineata in suburbano  
Patrum Societatis Jesu.*

## EPIGRAMMA IV.

**H**UMANOS docili cretâ cum fingeret artus  
Cœlicolum DOMINUS, se probat esse DEUM.  
Plusquam hominem præstas, Pictor, qui celsa Tonâtis  
Ora vel extincto torre nitere jubes.  
Ille opifex hominem cretâ formaverat albâ,  
Signavit faustum scilicet illa diem:  
Numinis ora nigro sed tu carbone figuras;  
Nempe doles DOMINI funera sæva tui.

*Testudo ex Aquilæ unguibus decidens  
Æschilum Poëtam occidit.*

## EPIGRAMMA V.

**F**ULMINE posthabito, testudine Regius ales  
Armatur: fallor; sic quoque fulmen habet.  
Et regit, & torquet fatalia spicula; majus  
Nescio quid Domino tentat & ille suo.  
Laurigeris parcit nam frontibus ira Tonantis;  
Quod non auderet Juppiter, ille ferit.

## A L I U D

## EPIGRAMMA VI.

**O**lim Mercurius reperit testudinis usum ;  
Testudo invenit sed modò Mercurium.

## A L I U D

## EPIGRAMMA VII.

**P**one leves arcus ; pharetram nec , inutile pondus ,  
Attollas humeris , ò Libitina , tuis.  
Induis insani nequidquam fulminis alas ;  
Si testudineo sic ruis acta gradu .

*Ad P. A*THANASIIUM KIRKERUM è *Societate*  
*Jesu Mathematicis disciplinis , &*  
*linguarum peritiâ eximiè doctum ;*  
*moribus autem candidissimis.*

## EPIGRAMMA VIII.

**N**aturæ ingenio non impare detegis ipsi  
Quod promit magno , vel tegit illa sinu.  
Quot

Quot Cœlum condat rerum miracula ; formas  
 Induat arcanâ quas vapor arte, doces :  
 Obstruâtas acies perrumpit Lyncea terras ;  
 Non tardant curas Æquoris ima tuas.  
 Te Latii decorat facundia , & Attica Pitho ;  
 Quæque sacro Ifacidum fluxit ab ore Patrum :  
 Non Arabum defunt moduli ; Nilotica saxa  
 Cogis Romanâ solus in Urbe loqui.  
 Punica lingua deest tibi solum ; ea jure relicta est ;  
 Non facit ad mores lingua dolosa tuos .

*In Funere CAROLI V. Lotharingiæ  
 Ducis.*

EPIGRAMMA IX.

QUas rapere à CAROLO exuvias, Fortuna, putasti,  
 Extorrem Regno cum paterere suo ?  
 Pannonicus, Dacus, Slavus, Germanicus ille est ;  
 Ille Othomannigenum terror , & Orbis amor .  
 Non potes irato tantum tu demere vultu ;  
 Quantum illi virtus addere sola potest .

*Ad Marcianum ab exercitu Imperatorem  
 salutatum, cum dormientis ad Solem  
 caput Aquila tegeret .*

EPIGRAMMA X.

ALes sacra Jovi pennis umbracula textit ;  
 Dum tibi odoratum sufficit herba thorum.  
 Quid

## 122 EPIGRAMMATUM

Quid faciet, vigil, & Cæsar cum fulmina posces;  
 Tam benè si somno militat illa tuo?

## A L I U D

## EPIGRAMMA XI.

**D**Um Clypeo somnū cōmendat Martius Heros,  
 Mollis & armatum sustinet herba latus;  
 Advolat, expansisque tegit Jovis armiger alis  
 Nudatum galeā versicolore caput.  
 Cur jubar armorum, & sævum non fugerit ensen,  
 Quærere desistas: credidit esse Jovem.

*Ad CINNAM comptulè vestitum.*

## EPIGRAMMA XII.

**M**igdonios deceat, Lidos, Phrygiosque Tyrannos  
 Quæ te vestit acu divite picta chlamys:  
 In longos dicunt sed te jejunia soles  
 Ducere, dum nullo fumat ab igne focus:  
 Nonne pudet sedare sitim te Najade purâ,  
 Ut bibat intextam culta lacerna Tyrum?  
 Non quero, an tenuis pellat tibi frigora vestis:  
 Hoc scio; te cogit, CINNA, perire fame.

*Acuta*

*Acuta responsio FERDINANDI TOLETANI Albae  
Ducis ad Galliae Regem super divulgato  
rumore suspensi Solis, dum Hispanica Legio Albim  
trajiceret.*

## EPIGRAMMA XIII.

**G**Loria Francigenum, Rhodani moderator, Iberi  
Vocibus his fertur sollicitasse DUCEM:  
Verane suspensum vulgavit Fama per orbem,  
Attonitas Phæbum detinuisse rotas,  
Cum gladiis armata phalanx HISPANICA, nudo  
Pectore transnaret, quas agit ALBIS, aquas?  
Sensit ludentes laudes HISPANUS, & astus;  
Cautus & hos patriâ reddidit arte sonos:  
Tanta daret cum terra mihi spectacula; Cælum  
Otia ut aspicerem nulla fuere mihi.

*Ad Ponticum Poëtam duriusculum.*

## EPIGRAMMA XIV.

**Q**UOD tu, dum modulos cics canoros,  
Asper perpetuis fluas salebris,  
Duris horridiorque senticetis,  
Non est, PONTICE, quod feras molestè:  
Nam te crediderim parum morari,

Dura

## 124 EPIGRAMMATUM

Duro carmina duriora ferro  
 Morosus nimium, severiorque  
 Auris ni legat Atticæque Lector:  
 Non huc tendere te fatemur omnes;  
 Illuc tendere te fatemur omnes,  
 Consutos numeros rigente venâ  
 Suis ut Chalybes cānant in oris;  
 Aut convivia lauta ut inde possis  
 Vel centum dare Struthiocamelis.

*De Gladio* SCIPIONIS.

## EPIGRAMMA XV.

**S**I gladius nitet iste, licet nox invida surgat,  
 Servat inoffensum maxima Roma diem:  
 Sol medio licet axe micet; si projicit umbras  
 Hic gladius, tenebras Africa semper habet.

*De Calamo* CIGERONIS.

## EPIGRAMMA XVI.

**I**Mprobitas clades; frænos vesania; Vitam  
 Hinc Patria, & laudis dona perennis habet.  
 E ferro statuant alii munimina Regnis;  
 Romanum calamo nititur Imperium.

*In vocem illam* CHRISTI DOMINI *morientis :*  
SITIO.

## EPIGRAMMA XVII.

QUI nuper fontem se dixerat esse perennem,  
Cur, dum triste subit funus; ait, SITIO?  
Credite, vox illa ænigma est; qui soluerit illud,  
Digna reor tanto PRINCIPE dona feret.  
Quid peteret DOMINI exanguis SITIS ægra, latronum  
Novit qui pœna proximus alter erat.  
Ergo murus aquæ supremâ in morte petenti,  
Quod potuit, lachrymas obtulit ille suas.  
Grassator felix; ænigmate perge soluto  
Victor; mercedem si petis; astra tenes.

*Ad* COTTAM *crasso ingenio*  
*contemptissimum.*

## EPIGRAMMA XVIII.

COTTA, tibi Lethes oblivia nulla nocebunt,  
Te piger obscurâ cum vehet amnis aquâ.  
Unde datum poscis? cum tu nil noveris unquam,  
Immemori numquam fas erit esse tibi.

*Ad*

*Ad Illustrissimam, & Excellentissimam*

ZAGAROLI DUCEM,

*cum eidem Calcuti seditione feliciter  
cessisset.*

EPIGRAMMA XIX.

**A** Sfriam effigiem, æquabat quæ regna metalis,  
Dicitur avulsus comminuisse lapis:  
Sed tibi, qui Reges animo, & virtutibus æquas,  
Restituunt longos eruta saxa dies:  
Procubuit meritò generoso victa lapillo  
Moles, quæ tumidâ fronte superba fuit:  
Et meritò divulsa tibi dant saxa salutem,  
Qui decus, & Latiae diceris Urbis amor.

*XERSES Platanum perditè amat.*

EPIGRAMMA XX.

**P**ersarum ductor, cymbâ cum victus in undâ  
Duceret irato languida vela mari;  
Forte animum subiit Platanî gentilis imago,  
Dicitur & tales ore dedisse sonos.  
Hei mihi; quam longum colui maleficus amator,  
Non Platanus, mendax planta; Cupressus erat.



CATO CENSORIUS *Statuam respuit  
in Capitolio.*

## EPIGRAMMA XXI.

**A**rcis apex, Tarpeja, tuæ quæ tollitur, hospes  
Miratur Latios marmora sculpta Duces;  
Sed rigidi frustra quærit simulacra CATONIS;  
Attonitus, dum non invenit, ipse facit.  
Romanum referunt mores, si marmora cessant,  
CENSOREM; & recti, fit Polyclethus, amor.  
Ingenuâ vitæ, qui libertate superbit,  
Jure vetat formam fingere saxa suam.

*Ad Lapidatorem.*

## EPIGRAMMA XXII.

**C**rediderim claro te Deucalione creatum;  
Ni solàm hoc illi discolor ipse fores:  
Post multas projecit aquas ille horrida saxa;  
Sed tu post multum projecis illa merum.

*De Nerone, & Æde Vaticanâ.*

## EPIGRAMMA XXIII.

**A**ura Palatinis ubi garrula ludit in Hortis,  
Aureaque immixtis tecta NERONIS erant,  
Clau-

## 128 - EPIGRAMMATUM

Claudius obscuri se faucibus extulit Orci,  
 Tibri, tuas iterum visere iussus aquas.  
 Sed non attonitis cernit quæ sustulit astris,  
 Clara superfuso surgere testâ Tago.  
 Non testos noscit ramis Sylvestribus arcus;  
 Atria collapsâ nec male fulta Paro;  
 Olli, dum laceros lapidum miratur acervos,  
 Atque parem Romæ procubuisse domum,  
 Ultrix Tisiphone sacram procul innuit ÆDEM,  
 Quæ VATICANO Sidera colle petit:  
 Aëreum ostendit lapidosæ cycladis orbem,  
 Et picturatum luxuriare tholum:  
 Mox ait: has sedes vilis Piscator Idumes,  
 Fœda tulit qui, te Principe, fata, tenet.  
 Ille refert: Erebum, & Cocitia Regna petamus;  
 Sævius hac specie nam nihil Orcus habet.

*De Rosarum fasciculo excerâ.*

## EPIGRAMMA XXIV.

Mellea turba, rosis quam nutrit sedula Chloris,  
 Instituit Dominæ dona referre suæ.  
 Assimilant ceris Cythereja germina; reddunt  
 Floribus & succos, quos rapuere prius.  
 Vera putes: unus color est obscurior illis;  
 Eductis ceris qualis inesse solet.  
 Hæc igitur Floræ volucres munuscula mittunt;  
 Quæ gestat niveâ casta Melissa manu.  
 Germina Diva suo reputans è cespite nata,  
 Naribus admovit protinus illa suis:

De-

Decepta erubuit : quod solum defuit illis,  
Numinis è vultu tunc rubuere rosæ.

*De Fure suspenso.*

EPIGRAMMA XXV.

Littera suspenso de te longissima facta est:  
Causa fuit mortis littera terna tuæ.  
Litterulæ parcent tua funera tollere nunquam:  
Vir bone, vis dicam? Mercurialis homo es.

A D E U N D E M

*Cum ad ejus Cadaver Vultures  
advolassent.*

EPIGRAMMA XXVI.

Porcj Latronis natus de sanguine, totos  
Vixisti Furius, Falcidiusque dies.  
Torquatus moreris: carpunt demum ossa volucres  
Dum tua, Corvini nobile nomen habes.

*In effigiem Jude CHRISTUM DOMINUM  
osculantis : Ad Pictorem.*

## EPIGRAMMA XXVI.

**A**Rs tua Naturam sequitur si, PICTOR; in arte  
A te peccatum largiter esse puto.  
Proditor hic figit cur oscula vera Magistro,  
Cui dederat vivens oscula ficta, suo?

*PERSÆ Solem Orientem contortis in  
ipsum sagittis, adorant.*

## EPIGRAMMA XXVII.

**T**Itani genus insolens, novumque  
Cultus Arsacidæ ferunt, in ipsum  
Jactas, dum pelago redit, sagittas.  
Hoc ignavus Arabs, Syriæque molles,  
Hoc usti Æthiopes, levæque Parthi,  
Hoc Phœnix imitetur, & Gelonus;  
Cultores fatui, rudæque quotquot  
Vultus monstriferos colunt Deorum.  
Adnisi jaculisque, lanceisque  
Perdant Numina fabulosa, perdant;  
Sic fœdosque greges colant Deorum.

*De ALCIMO inepto Oratore Historiola.*

EPIGRAMMA XXVIII.

**A**LCIMUS Aufidium solans, jam morte propinquâ,  
 Elyfios lætus, dixit, adire potes:  
 Persolvēt nam lauta tibi cum iusta Sacerdos,  
 Orator laudes prosequar ipse tuas.  
 O me felicem! respondit protinus æger,  
 ALCIME, dicenti qui tibi non adero.

*Ad PANDARUM Rus proficiscentem.*

EPIGRAMMA XXIX.

**D**Um petis imbriferum, rediturus vespere, Tibur;  
 Me socium longæ non finis esse viæ:  
 Res subita est, inquis; solum tractandaque poscit:  
 Sportula sed solum te tamen ire negat.  
 Tecum infarta probè gallina, nivosaque perdix  
 Comseat; & pingues, PANDARE, ficedulæ;  
 Non est, quòd dubites tibi Tibure fausta futura  
 Omnia; namque bonæ te comitantur aves.

DIVA CATARINA, *rotâ divinitus commi-  
nutâ, non leditur.*

## EPIGRAMMA XXX.

**M**obile supplicium se sponte in frustra resolvit;  
Ne Divæ noceat, jam sibi pœna nocet:  
Detrahe Fortunæ Insignis revolubilis Orbem;  
Hoc posthac Virtus ambiat ipsa vehi.  
Debile nec fulcrum reputes; non firmior illi  
Æquato fuerit tessera prisca cubo.  
Non vitiosa rota est, quæ sidera celsa petentem  
Sustinuit DOMINAM vel lacerata suam.

CATILINA, *ad acuendam Sociorum feri-  
tatem, humanum sanguinem ad  
potandum circumferri  
jubet.*

## EPIGRAMMA XXXI.

**S**ulte, quid humano crudefcere corda tuorum,  
Massica mentitus dona, cruore doces?  
Falleris: humani quo plus tu sanguinis illis  
Ingeris, humanos feceris esse magis.  
O Fera; tunc odium in Patriam cruor iste doceret,  
Elicitus venis si foret ille tuis.

ALIUD

## A L I U D

## EPIGRAMMA XXXII.

**S**Ævior Annibale hic Civis, Roma; ille cruorem  
 Effudit Latium; sed CATILINA bibit.  
 O portenta! minus Romani sanguinis iste,  
 Quo plus Romani sanguinis haurit, habet.

## A L I U D

## EPIGRAMMA XXXIII.

**Q**ualem propinet Patriæ CATILINA salutem,  
 Pallenti Cyatho quæ tepet unda, docet.

*In* DEMOCRITUM, & HERACLITUM.

## EPIGRAMMA XXXIV.

**D**EMOCRITUM vixisse nego, cui lachryma nulla  
 Excidit; hæc lachrymis vita carere nequit.  
 Nec vixit, nunquam quod riserit, æmulus alter;  
 Rifu stulta hominum vita carere nequit.

*De obitu DEIPARÆ VIRGINIS.*

## EPIGRAMMA XXXV.

**V**IRCINIS ut pectus peteret Libitina, rigenti  
 Torquebat frustra spicula multa manu;  
 Nam procul in tenues abeunt aut irrita ventos,  
 Authori redeunt vel nocitura suo.  
 Ridebat vano conantem plurima jactu  
 Qui propè Divinus fortè latebat Amor:  
 Non ignes aderant Puero, non tela, nec arcus;  
 Omnia Virgineo perdidit arma sinu:  
 Prodiit; & verbis mortem compellat amaris:  
 Æmula, nunc vires experiamur, ait:  
 E Lachesis pharetrâ jaculum simul arripit; istu,  
 Nec mora, fatifero saucia Virgo cadit.  
 Obstupuit; fregitque omnes Libitina sagittas;  
 Veraque qui poscit funera, dixit, amet.

*De ligneis adibus Burghestianis in agro Romano  
 positis, ad excipiendum INNOCENTIUM*

*XII. Pont. Max., cum ad Antii  
 Portum diverteret.*

## EPIGRAMMA XXXVI.

**R**Omula Tyrrhenas ubi semita ducit ad undas,  
 Surgebant viridi rustica testâ solo:

*Sed*



Sed brevis ædiculæ fines distendit iniquos,  
Regius augustâ mole niterque labor.  
Miratur pastor splendescere divite pompâ,  
Et stupet agrestem degenerare domum.  
Nempe novo hæc surgunt Pastori limina; talem  
Debuit & talis Pastor habere Casam.

*Ad NATTAM Vinosum.*

## EPIGRAMMA XXXVII.

**V**ale Polype, NATTA, doliaris,  
Et cellæ barathrum Thyonianæ.  
Nocturnos Triviâ citante currus,  
Ad frugi mihi cænulam vocatus,  
Quà ripam prope murmurantis undæ,  
Alludens platanisque, populisque,  
Auræ sibilat error hospitalis;  
Non tu, sobria quod rubrica sanxit,  
Potasti Charites modestiores;  
Nec, quod norma benignior remittit,  
Æqualli numerum novem Sororum;  
Sed, ò diluvium voraginosam!  
Bis senis Rhodiique, Massicique  
Perfundis jecur amphoris Lyæi;  
Atque omnes bibis Herculis labores.  
O factum illepide, atque ineleganter:  
Portentum vale gutturale, semper;  
Vale Polype, NATTA, doliaris,  
Et cellæ barathrum Thyonianæ.

JOANNES AUSTRIACUS CAROLI V. CÆSARIS  
 FILIUS, *febrili æstu à mente dejectus,*  
*de rebus Divinis verba faciens*  
*moritur.*

## EPIGRAMMA XXXVIII.

**M**Item te furia faciunt; insania sanum;  
 Et rationis inops mens, opulenta Deo est.  
 Solùm hoc Posteritas tanto de Principe jactet;  
 Nobilius CAROLO quòd genitore cadit:  
 Laus ingens CAROLI est, sine Regnis claudere vitam;  
 Hic CAROLUM superat, dum sine mente perit.

A L I U D

## EPIGRAMMA XXXIX.

**T**urba caret numero stulcorum maxima: stultus  
 Ut satus AUSTRIADUM sanguine, rarus erit

A L I U D

## EPIGRAMMA XL.

**N**avigat Anticyram, qui mentis perdidit usum;  
 Sed qui sic perdit, navigat Empireum.  
 DEI.

DEIPARÆ VIRGINIS *effigies ad Circum  
maximum à Judæo Sycophanta  
lapide percussa sanguinem  
effundit.*

EPIGRAMMA XLI.

EXcusso temeras saxo qui VIRGINIS ora ;  
Carnifices nati , perditæ , vincis avos.  
Crimine spes veniæ non decidit omnis in illo ,  
Dum superest nullo vulnere læsa parens :  
Sed dum sacrilego matrem tu verberare cædis ,  
Quis tibi apud natum deinde sequester erit ?

*Ad Eminentissimum Principem*

PETRUM CARDINALEM OTTHOBONI  
*cum Neapolim inviseret.*

EPIGRAMMA XLII.

DUM , PRINCEPS , tu Regna petis , dilecta feruntur  
Quæ tibi , Bacche Pater ; quæ tibi , flava Ceres ;  
Parthenope Romæ tanto tumet Hospite major ,  
Æmula Dardaniæ quæ prius Urbis erat.  
Celsior assurgit septenâ Vesuvius arce ;  
Sebethus titulos , Tibri , præitque tuos.  
Tolle-

## 138 EPIGRAMMATUM

Tolleret arguto Siren tua nomina cantu ;  
 Magnaque Thyrrenas gesta doceret aquas :  
 Diceret Adriacæ clarum Telluris Alumnum ;  
 In Latia primum diceret Urbe jubar :  
 Ter conata tuas verum depromere laudes,  
 Delituit medio ter pudibunda mari :  
 Et meritò: nam fraudis amans timet ora tueri ,  
 Fixit ubi solium non temerata Fides,

*Ad Gibbosum simul, & Claudum.*

## EPIGRAMMA XLIII.

T Ubera te gibbi faciunt immania claudum ;  
 Gibbosumque simul tibia læsa facit ;  
 Ardua nam tergo surgat cum sarcina ; magnum  
 Cruscula non miror si labefactat onus :  
 Nec miror, tua si domus inclinata procumbit ,  
 Illam sustineat cum vitiosa basis.

*Ad ARTEMISIAM Mausoli Carie Regis  
 Conjugem, cum Viri extincti cineres  
 vino dilutos hauriret.*

## EPIGRAMMA XLIV.

M Ausolea licet ponas immania, vivat  
 Splendidus & longâ posteritate dolor,  
 Re-

Reliquias cinerum dum sorbes, pectore in isto

Nobilior Sponso sternitur urna tuo:

Marmoreum tollis Regi Regina sepulchrum:

Sed vivum in proprio pectore Sponsa viro:

Solus amor tumulum fecit tua viscera; dici

Molibus at celsis ambitiosa potes.

SEJANI *Simulacrum in patellas vertitur  
à Romanis.*

## EPIGRAMMA XLV.

SEJANI effigies, fœdis damnata culinis,  
Stridet Romanis digna patella focus.

Ne stupeas, denso effigiem nigrescere fumo;  
Fumosum referunt nam simulacra caput.

Ambitio speculum si quærat vana, patellâ  
Hâc poterit vultus consuluisse suos.

*In Gorgonium Poëtam Maledicum.*

## EPIGRAMMA XLVI.

Non laudat; pungit semper Gorgonius; illum  
Non lauro; urticâ cingite, Pierides.

*De Marmoreo Horologio arenario ad ventorum Indicem posito in Ædibus Curia Romanæ, ad Montem Citatorium .*

## EPIGRAMMA XLVII.

**M**Armore qui solido fluxas simulavit arenas,  
 Temporis & tacitum ludificavit iter,  
 Fallitur; ille flix, qui nunc durissimus obstat,  
 Ille leves poterit dinumerare dies:  
 Commūnet cautes illas longiqua Vetustas;  
 Et tunc, quæ modo sunt marmora, pulvis erunt

*Temporis aë geminæ ex laminâ ferreâ pro  
 ventorum Indice in speculâ earundem  
 Ædiam posita .*

## EPIGRAMMA XLVIII.

**S**urgere legifero Themidis Prætoria Clivo,  
 Marmoreamque novâ luce nitere Domum,  
 Vidit ubi, occulto numerans qui sæcula cursu,  
 Cuncta vorat vasto falcifer ore Senex,  
 Infremuit; quatiensque caput venerabile, debes  
 Hæc etiam, dixit, Roma superba, mihi?

A

Cum

# LIBER III. 141

Cum Circos, Thermaſque, trucidum teſta Neronis  
 Videris ante meos procubuiſſe pedes;  
 Amphiteatra putri ſenio cum victa fatiſcant,  
 Hâc iterum indomitum tollis ab arce caput?  
 Vincere ſueta alios vici Capitolia; noſtras,  
 Exuvias orbis, fecimus exuvias;  
 Nunc pudeat, nova bella movent Citoræa ſaxa;  
 Hos animos Collis deſpiciendus habet.  
 Hæc fatus, falcem adducto bis, terque lacerto,  
 Torvus in adverſi marmora Collis agit:  
 Involat in dextram, ferrumque Aſtræa coercet;  
 Et, Domus hæc, dixit, prædo ſuperbe, mea eſt.  
 Temporis agnoſcant, nil demoror, omnia leges;  
 Te decet at noſtro ſubdere colla jugo.  
 Hæc ubi fata, ſenem terrâ reſupinat inermem;  
 Excusâ jacuit languida falce manus.  
 Illa minax geminas à tergo diripit alas,  
 Excelsaque ſui Collis in arce locat.  
 Servat adhuc Turris, jaſtatque illuſtre Trophæum;  
 Mobile dum ſpolium mobilis aura rotat.

## *Ad OLLUM Aleatorem.*

### EPIGRAMMA XLIX.

**P**elliculam ancipitis ſchedulæ tua dextera pernox  
 Dum terit, & vetitum legibus urget opus;  
 Prima Suburbanum nox abſtulit; altera jaſtu  
 Prædia præcipiti Tranſtiberina rapit:  
 Tertia nox fundos raſit vigilata Sabinos;  
 Cætera ſed quartâ diſperiſſe doles:

Non

## 142 EPIGRAMMATUM

Non benè dinumeras, malus es Tabularius, OLLE;  
 Calculus haud scitè ponitur iste tibi:  
 Quid quartam vocitas? quæ funditus omnia merfit,  
 Non ea quarta tibi; sed decumana fuit.

DIVÆ MARIÆ MAGDALENÆ *effigies*  
*in speluncâ.*

## EPIGRAMMA L.

MAGDALA, Apellââ spiras inculca tabellâ;  
 Incultam si te reddere pœna potest;  
 Verbera torqueres; tacitis sed vocibus inquis,  
 Non hæc est flagris digna tabella peti:  
 Lachryma quin etiam flueret tibi multa; colores  
 Verum ne lædat lubrica gutta, times.  
 Cæderis an quoque sic, & luges? sed tegit iustus;  
 Et lachrymas tergit callida rela tuas.

## A L I U D

## EPIGRAMMA LI.

MAGDALA, quæ pinxit te dextera triste gementem,  
 Illa dedit pœnis sæcula longa tuis:  
 Abstulerunt veras lachrymas tua funera; pictus  
 Sed nullâ poterit morte perire dolor.

ALIUD



## A L I U D

## EPIGRAMMA LII.

SORbet MAGDALIDOS lachrymas hic scrupea rupes,  
 Anxia dum lentâ liquitur illa face:  
 Ad fletus veræ possent mansuescere cautes;  
 Cur non mollitur, dic age, picta silex?  
 Pictori hoc debes; nimirum finxerat ille  
 Dura magis veris marmora marmoribus.

SCIPIO AFRICANUS *in Ennii Vatis*  
*Sepulchro tumulari jubet.*

## EPIGRAMMA LIII.

SCIPIO non auro radiantem postulat urnam;  
 Cycnus ubi Calaber conditur, ipse jacet.  
 Quid Cineres duris opus est munire metallis,  
 Et breve marmoribus dissimulare lutum?  
 Æra vel ipsa ruunt demum; sed, Vate propinquo,  
 Possidet æternum fictilis urna jubar.

## A L I U D

## EPIGRAMMA LIV.

QUEm sacer arguto commendat carmine Vates,  
 Censetur felix ille jacere cinis:  
 Quàm

144 EPIGRAMMATUM

Quàm tua, summe Ducum, feliciter ossa quiescent,  
Dum tibi cum toto Vate jacere licet?

*De Causidico, & Astrologo.*

EPIGRAMMA LV.

**N**on te vana pudet fatuo dare verba popello?  
Causidicus claro dixerat Astrologo.  
Ille refert: sit turpe licet dare verba; clienti  
Vendere verba tamen turpius esse puto.

*In importunum Aurigam noctu dormientes  
rotarum strepitu excitantem.*

EPIGRAMMA LVI.

**Q**uis ò præcipitum fragor rotarum  
Dulcem luminibus fugare somnum,  
Et totam furit excitare Romam?  
Num stridentia contumeliosi  
Urbem plaustra perambulant bubulci?  
Nocturni medicator an duelli,  
Chirurgus myrothecium reportans,  
Strigofum scuticâ ciet veredum?  
Sed vobis male sit, quietis hostes,  
Somni incommoda, pessimæ quadrigæ;  
Centum vos male conterant salebræ,  
Et cautes, foveæque, semitasque  
Claudunt obvia tigna quæ resartas.

Nam

Nam te, qui riguum, strepente curru,  
 Fessis artubus invides soporem,  
 Vel Glauci manet execrata finis;  
 Vel calles, silicesque profluenti  
 Tinges Hyppolitus recens cerebro.  
 Verum hac lege nigrum subibis Orcum;  
 Ut te nec stygiis Diana ducat,  
 Nec Senex Epidaurius cavernis.

*In funere P. DANIELIS BARTOLI SOC. JESU  
 Scriptoris Etruscæ linguæ  
 celeberrimi.*

## EPIGRAMMA LVII.

**T**ristior æquoreascum tenderet Arnus ad undas;  
 Edidit hæc celso spumeus ore Pater.  
 Siccinæ, vernantes nec floribus obsite ripas;  
 Ut prius, ambrosiâ nec satur, Arne, venis?  
 Ille refert: Cœlum rapuit quo florea semper  
 Ripa mihi, & rigui nectaris unda fuit.  
 Ingrato cineri flores nunc sparsimus omnes;  
 Cladis amarities sola relicta mihi est.

*Ad CRISPULUM Petrarcaæ stylum  
 fastidientem.*

## EPIGRAMMA LVIII.

**I**Ratis natum Musis, & Apolline lævo,  
 CRISPULE, Petrarcam nempe nitere negas.  
 K Ss

146. EPIGRAMMATUM

Semodium misero tu pulveris excute ; tantâ  
 An niteat Vates obsitus illuvie ?  
 Ter decies lectus si sordeat ungue frequenti,  
 Tunc sordere liber desinet ille tibi.

*XERSES ventos, quòd Pontem Hellespon-  
 tiacum disjecerint, verberari jubet.*

EPIGRAMMA LIX.

**R** Eddidit has Boreas rabida inter murmura voces,  
 Cum virgæ streperent per latus Arfaciæ.  
 Non ego, quòd valido disjeci robore molem  
 Pontis Achemenii, verbera nunc patior :  
 Verbera nunc patior ; quòd non temeraria classis  
 Collisa est medio per freta cæca mari.  
 Verbera nunc patior ; quòd non mihi diruta primùm  
 Fluxerit insanis machina Pontis aquis.  
 Quòd placidus, quòd mitis eram, cum turpe pararet  
 Ille jugum pelago, verbera nunc patior :  
 Sed tu non longum nostrâ lætabere pœnâ ;  
 Ira diu felix nec tua, Ductor, erit ;  
 Addere namque meis robur tua flagra lacertis,  
 Spero equidem nosces, cum Salamina petes.

CATO UTICENSIS, exercitu in Africâ  
*sitiente oblatam sibi aquam in terram  
 effundit: alluditur ad illud  
 Lucani*

Excussit galeam, suffecitque omnibus unda:

EPIGRAMMA LX.

QUOD Populi projecta sitim restinxerit unda,  
 Laus mihi pro tanto Principe visa levis:  
 Africa, credo equidem, non amplius ipsa sitivit,  
 Ex quo dejectæ cassidis hausit aquas.  
 Flumina decrescant Libyæ, fontesque dehiscant,  
 Nec tellus pluvio supplicet usta Jovi:  
 Nulla sitis posthac Libycas torquebit arenas;  
 Pro Jove, pro fluviiis unda CATONIS erit.

MANLIUS CAPITOLINUS, jactis in hostes  
*panibus, inopiam arcis dissimulat,  
 & liberat Capitolium.*

Alluditur ad eundem Lucani de Catone versiculum.

EPIGRAMMA LXI.

DUm Cato perdit aquâ; Cerealem MANLIUS escâ,  
 Ille sitim tollit militis; iste famem.

K 2

ALIUD

## A L I U D

*De eodem MANLIO.*

## EPIGRAMMA LXII.

**T**riticeos orbes largè dum torquet in hostes,  
 Vindicat obsessum Martia turba Jovem:  
 Quid, Miles, vano Martem sudore fatigas,  
 Tela rotat victrix si meliora Ceres?

*In Tumulo CHRISTI DOMINI.*

## EPIGRAMMA LXIII.

**H**ospes, qui DOMINI CINERES, urnamq; requirens,  
 Vestigal tumulo triste, paras lacrymas;  
 Hic situs est, tectus privato marmore; verùm  
 Dum loquimur, jam non amplius hic situs est.

*Ad ATTALUM Senem versiculos  
 scripturientem.*

## EPIGRAMMA LXIV.

**I**Nvitis, quis credat? adhuc canis, ATTALE, canis;  
 Nec prohibet molles tarda senecta jocos.  
 Sed

# LIBER III. 149

Sed quamvis Pylio scribas tu Nestore major;  
Nemo tamen Vatem te putat esse Senem:  
Non anceps monitrix clamat nam pagina contra;  
Carminibusque Puer nosceris esse tuis.

*SAMPSON Columnas excindit, & cum  
hostibus opprimitur.*

## EPIGRAMMA LXV.

**D**isjectos latè lapidum, quos cernis, acervos;  
Arduaëque Herculeâ saxa revulsa manu,  
Condidit hoc cineri SAMPSON illustre sepulchrum;  
Ipsa quod invidet Caria sponsa, suo.  
Utque magis stupeas, ictu non amplius uno,  
Nulla quod æquarint secla, peregit opus.  
Integra disruptæ testantur robora cautes,  
Spondet & æternos ipsa ruina dies.  
Frangite Praxiteles, jam frangite scalptra Myrones;  
Si SAMPSON, vel dum diruit, ista facit.

## A L I U D

## EPIGRAMMA LXVI.

**S**ensit ubi veteres cum crine redire lacertos;  
Scurra Philistæ qui modo plebis erat;  
Impulit immanes toto SAMPSONE Columnas;  
Præcipientesque solo testâ, virosque trahit.

## 150 EPIGRAMMATUM

I nunc ; & cæcum jubeas saltare Cyclopem :

I nunc ; & raso fide capillitio :

Solè carens , adimit Solem tot millibus ; & , quæ  
Cæsa cadunt , nōrunt agmina Cæsariem .

DEMOSTHENES *Fabri filius* .

## EPIGRAMMA LXVII.

Q Uamodò stridenti ferrum molliverat igne ,  
Corda hominum doctâ nunc regit arte FABER :  
O FABER , in pejus mutas tua munera ; namque  
Cor hominis ferro dufius esse reor .

*Pisana Mulier Gemellos indivisos parit ,  
sub quorum duplici pectore Cor unum  
repertum est .*

## EPIGRAMMA LXVIII.

D Icite , candidulos artus quo glutine tandem ,  
Qui potuit solus jūgere , jūxit amor ?  
Serò alii fiunt ; verū hi nascuntur amantes ;  
Ante & amare Puer quàm bene posset , amat .  
Debita pectoribus desunt sed corda duobus ;  
Quominus hi Cordis , plus at amoris habent ;  
Corda etenim , cœpit quæ primū jungere , in unum  
Quâ pollet felix arte coëgit amor :  
Corpora dum nectit , vetuit Lucina , peracto  
Tempore , ne pulchrum continuaret opus .

ALIUD



## A L I U D

## EPIGRAMMA LXIX.

**Q**Uæ tales generat fortunatissima Matrum;  
 Et parit illa duos; nec parit illa duos.  
 Illico sed pereunt; meritò: videre gigantem  
 Quem cunæ, haud potuit crescere prolis amor.

## A L I U D

## EPIGRAMMA LXX.

**P**ECTORA quòd gemino fraudavit corde, malignanti  
 Naturæ parcas increpuisse manum:  
 Naturæ haud crimen; furtum sed crede Parentis;  
 Cor aliud matrem nam rapuisse reor.  
 Inspice, si dubitas, Genitricis pectus; in illo  
 Pectore cor geminum, si bene noscis, erit.

*Ad GAURICUM cantus avium absurde  
 imitantem.*

## EPIGRAMMA LXXI.

**A**LITUM módulos tibi flexile guttur in omnes;  
 Omnes mentitis delicias nemorum;

## 152 EPIGRAMMATUM

Tu simulas cantus deserti turturis, & quos  
 Insula Fortunæ nomine dives alit;  
 Errantem rigidis tu reddis acanthida dumis;  
 Pellicis Ismaricæ prisca querela tua est:  
 Psittacon alterno simulas imitamine; vocis  
 Ille tuæ primùm nam simulator erat.  
 Tu simulas volucrum modulamina cuncta; cicadas,  
 Pace tuâ, solùm, GAURICE, non simulas.

PASQUILLI *Statua*.

## EPIGRAMMA LXXII.

**M**Armureus gladiator eram; fatalia tela  
 Tendere sed postquam dextera trunca negat,  
 Me jubet esse novum vindex Rhamnusia Momum;  
 Cogit & arguto carpere cuncta joco.  
 Longa dies misero membra abstulit omnia; solam  
 E saxo linguam vellere non potuit.

*De eadem*

## EPIGRAMMA LXXIII.

**N**on est, quòd stupeas mutilo si corpore surgit;  
 Truncaque marmoreus brachia Momus habet.  
 Nam, velut in sublime jacit qui spicula Cœlum,  
 Soli, dum recidunt, officit ille sibi;  
 Non secus hunc mulcant, mutilantque cadentia tela,  
 In cellos frustra quæ jacit ipse viros.

*Ad*

*Ad DECIANUM lauté bibentem.*

EPIGRAMMA LXXIV.

**A**Lbanis, DECIANE, dum racemis  
Jungis Lesbiacum, potensque Chium,  
Haustus ducere credis eruditè.  
Quidni pocula ducat eruditè,  
Miscet tam bene Græca qui Latinis?

*Ad DIVUM PETRUM cum militis in Christi  
stum Dominum irruentis aurem  
gladio amputaret.*

EPIGRAMMA LXXV.

**M**ilitis in charum cum peccet dextra Magistrum;  
Cur auris pœnas vulnere secta luit?  
Auris crimē habet; namque illa apprehendere Verbum,  
Impia non stricto debuit ense manus.

*Salmoneus, dum tonitrua imitatur;  
fulmine percutitur.*

EPIGRAMMA LXXVI.

**D**Um mentiris iter rutilæ per nubila flammæ;  
Altisonumque refert biga citata Jovem;  
In

## 154 EPIGRAMMATUM

In socium Regni jam te stellantis adoptat  
 Juppiter; & medio cedit in axe locum;  
 Quin etiam læto te fulminis igne salutat;  
 Plaudit, dum festâ te petit ille face:  
 Ne querere, immisso pereas quod fulminis igne;  
 Fulmina nanque aliter plaudere non poterant;

*In scriptorem ampullosum.*

## EPIGRAMMA LXXVII.

**N**ON te præterit, Atticas vocasse  
 Noctes nomine Gellium modesto,  
 Opus multigenâ scatens Minervâ,  
 Ætas quod sinet interire nulla.  
 Tu contra memorabilis, novæque  
 Apellas Pharon eruditionis,  
 Quos centonibus hinc, & inde centum  
 Infercis plagiaris libellos,  
 Quî debent piperi leves cucullos,  
 Qui fellas redolent Patroclianas.  
 Pharos sed tua tam nitoris experts,  
 Tam Pharos tenebris inhorret illa;  
 Quam sunt perspicuæque, candidæque,  
 Noctes, nomine quas bonus modesto  
 Olim Gellius Atticas vocavit.

*Pegasus ex silice ungulâ percusso fontem  
educit.*

EPIGRAMMA LXXVIII.

**O**lim Neptuni tellus percussa tridente  
Fortem de scisso pectore fudit equum;  
Nunc contra; volitantis equi dum cæditur ungue;  
Neptuni puras terra ministrat aquas.  
Si satus iste foret terras quo tempore flammis  
Vastarunt, Phaëton, te Duce, Solis equi;  
Tabida non liquidos tellus arefcere fontes;  
Non uftas igni conquererere comas.  
Bellorophontis Equum Phaëtoni opponere poffes;  
Quot daret hic flammæ, tot daret alter aquas.

*DUX CLARENTIÆ ab Eduardo Angliæ  
Rege juffus mortem eligere, mergi  
voluit in dolio vini Cretensis.*

EPIGRAMMA LXXIX.

**D**olia fant carcer; verum mortalibus ægris  
Libertas illo è carcere multa venit;  
Dolia fant tumulus; fed Bacchus vivit in illis;  
Non vitam Bromius, ni tumuletur, habet:  
Ergo qui condi fic flagitat, atque perire;  
Vincula nec voluit ferre, nec ille mori:

ALIUD

A L I U D

A D E U N D E M

EPIGRAMMA LXXX.

**N**on gladium, laqueumque petis, nō toxica; condi  
 Poscis Cretenſi, Magne Britanne, cado.  
 Cætera ſæpe animos irritant vina rebelles;  
 Algeat hoc rabies ſeditioſa mero.

*De marmoreis quatuor annibus in Fonte  
 Fori Agonalis.*

EPIGRAMMA LXXXI.

**Q**uam bene, quæ docto ducunt de marmore vitam,  
 Romanum diſcunt flumina ferre jugum.  
 Cur modicis labantur aquis, ſi quæritis; Urbem  
 Ne Dominam mergant, parcius illa fluunt.  
 An nova quæ cernit Romæ miracula, luſtrat  
 Commodius, lento dum fluit unda pede?  
 Tibridis an frænat reverentia? namque ſuperbis  
 In Domini aſpectu non licet eſſe ſui.

ALIUD

## A L I U D

## EPIGRAMMA LXXXII.

**N**Ascuntur reliqui propriis de fontibus amnes;  
Sed contra è fluviis fons habet iste caput.

## A L I U D

## EPIGRAMMA LXXXIII.

**Q**uis dubitet claudi Romanis mœnibus Orbem;  
Maxima si Latîâ flumina in Urbe fluunt?

*Ad Hæredipetam, qui pro pecuniâ baculum  
in arcû extincti senis invenit.*

## EPIGRAMMA LXXXIV.

**H**Æres quòd baculi fias pro divite gazâ,  
Iratum nullâ te ratione puto:  
Præclara an nescis querni medicamina succi?  
An nescis quantum sæva moneta nocet?  
Si morbum optanti senior tibi pharmaca liquit,  
Non potuit melius consuluisse tibi.

JULIUS CÆSAR; *Alexandriâ profugus,  
 mari Ægyptio Commentarios  
 manu præferens feliciter  
 enatat.*

## EPIGRAMMA LXXXV.

Cognati cineres, & Magni plaudite Manes;  
 Plaudite Romanus, Thessala Regna, rogus;  
 Naufragium Phario bellum Civile profundo  
 Sustinet, & Memphis vindicat Æmathiam:  
 Sed monumenta Ducis Thetis obsequiosa veretur;  
 Pectora vel nudi CÆSARIS illa timet.  
 Ille mari magno vulgat Civilia bella;  
 Thessala Cæruleas & docet arma Deas.  
 Divisit Fortuna Ducum quoque Numina ponti;  
 Hæc genero; socero sed magis illa favent.  
 Cæsaris illa studet fontes servare libellos;  
 Hæc tendit toto perdere turba mari:  
 Ille micat, summâ pendetque immobilis undâ;  
 Victa nec adversis brachia flectit aquis.  
 Littora jamque tenet Victor. Deterrime livor,  
 Magnanimum posthac carpere parce Ducem.  
 Numina tot contra tenuit quæ grande volumen,  
 Illa orbem meruit sustinuisse manus.

ALIUD



A L I U D

A D E U N D E M

EPIGRAMMA LXXXVI.

**P**rojice Civiles dictura volumina clades;  
 Hæc vindex totis obruat æquor aquis:  
 Innocuos nescire velis hæc bella Nepotes;  
 Sarciat & famam pagina mersa tuam.  
 O pudor! affuso posses cum perdere ponto,  
 Tollis inoffensâ scripta cruenta manu:  
 Nosco truces animos; nec abactos corde Philippos;  
 Si potes; excusa nunc Rubiconis aquas.

*In Ganimedem Scabiosum.*

EPIGRAMMA LXXXVII.

**C**um tu comptulus elegante vultu,  
 Mentitus saguloque, penulâque  
 Meras munditias Columbulorum,  
 Intentam rapis hinc, & inde Romam,  
 Suspensam nitido & tenes capillo;  
 Bonos dicere quid putas Quirites?  
 Argutos digitos Ibera pellis  
 Succis perlita dum regit, beati  
 Quos legunt Arabes, Syriâque molles;

Far.

## 160 EPIGRAMMATUM

Furtivum jubar interimque prodit  
 Inde conscia rima dum Lapilli;  
 Bonos dicere quid putas Quirites?  
 Dum bombicina spissiore filo,  
 Acus Belgica quæ vigil paravit,  
 Ostentas humeris; & undulatum  
 Summis textile ventilas lacertis:  
 Multis Seplassæ madens tabernis,  
 Et Milesia tota delibutus,  
 Vultus dum simulas, amica quales  
 Jovi sustulit unguibus volucris;  
 Quales Tyndaris aut secuta longo  
 Ingens perdidit Ilion duello,  
 Bonos dicere quid putas Quirites?  
 Hoc tu discere si cupis, docebo:  
 Apud te scabiem nimis beatè  
 Omnes degere prædicant Quirites.

## DIVUS FRANCISCUS XAVERIUS

*Indicum Gigantem per somnium  
 bumeris attollit.*

## EPIGRAMMA LXXXVIII.

**X**Averius nondum terras lustraverat, effert  
 Unde caput nigri Memnonis alba parens;  
 Et tamen Eoum attollit, fulcitque Gigantem;  
 Sopitosque artus India multa premit.  
 Post etiam, pede cum rapido tot littora obibit,  
 Dum solvet Stygio maxima Regna jugo;  
 Tot

LIBER III. 161

Tot referet prædas tam parvo tempore; ut Indos  
Victos, XAVERII somnia sola putes.

ALIUD

AD EUNDEM

EPIGRAMMA LXXXIX.

**L**Arva laborantes humeros premit Indica, dura  
Dum tua componit lumina nocte sopor.  
Vires attollenda tuas probat India; misso  
Exploratque humeros illa Gigante tuos:  
India ne perdas posthac immania monstra;  
XAVERIO exiguum tu quoque pondus eris.

ALIUD

EPIGRAMMA XC.

**X**AVERIUS visi non sudat pondere monstri,  
Cum primùm somnum dispulit orta dies:  
Uritur, exactæ noctis quem sustulit umbris,  
Ficta quòd Eoi forma Gigantis erat.

## A L I U D

## EPIGRAMMA XCI.

**T**urba Deo vigiles impendat cætera curas;  
 XAVERII Cælo militat ipsa quies:  
 Expectare ratem seruum est, quâ solvat ad Indos:  
 Lintea sunt lecti vela; Carina, thorus.

*Ad Absalonem ex Arbore comâ suspensum.*

## EPIGRAMMA XCII.

**S**tulte Puer, gladio viscato scinde capillos,  
 A trunco ut redimas insidiante caput.  
 Maluit, ò demens! abrumpere stamina vitæ;  
 Quam refecare suæ stamina flava comæ:  
 Implicitus ramis malè culto crine pependit;  
 Occupat & vindex hostica tela liber.  
 Scilicet, ut cesset Lictor cum cannabe; gestat  
 Aurea frons laqueos; mens mala Carnifices.

## A L I U D

## EPIGRAMMA XCIII.

**Q**ui stupidum flavente comâ suspenderat Orbẽ,  
 Quàm benè suspensâ nunc perit ipse comâ  
 Despi.

Despice nunc alios elatâ fronte superbus;  
 Altum Cæsaries te tua rite facit.

*Milites Sybaritici, Equis ad tibiærum  
 modulos flexis, choræas agunt  
 in Prælio.*

## EPIGRAMMA XCIV.

**P**Rælia dum pubes miscet Sybaritica, mollis  
 Ad numerum dociles tibia hæc Equos:  
 Succedunt plectri post vulnera, vulnera ferri;  
 Et modulos sequitur quæ caret ira modo.  
 Divino præstanda fides si certa Platoni;  
 Musicus est, Orbem qui moderatur, Amor:  
 Dum regit argutas citharæ modulamine pugnas,  
 Incipit ipse etiam Musicus esse furor.

## A L I U D

## EPIGRAMMA XCV.

**D**UM vitæ reputat Sybarita incommoda, lætus  
 Fit meritò fidicem funeris ipse sui:

*Ad AMILLUM Poëtam extemporaneum.*

## EPIGRAMMA XCVI.

**N**OCTE laboratum Carmen non amplius unâ  
 Juratus narras terque, quaterque mihi:  
 Jures usque licet; nemo periisse tot horas  
 Talia scribenti credet, AMILLE, tibi.

## A L I U D

## EPIGRAMMA XCVII.

**U**T jugulent homines, surgunt de nocte latrones,  
 Romanæ fidicen dixit, amorque Lyræ:  
 Ut jugulent homines, vigilant de nocte Poëtæ,  
 Qui versus audit, dicit, AMILLE, tuos.

CAROLO V. CÆSARE HISPANIARUM REGE,  
*Navis Victoria, Duce Ferdinando  
 Cortesio, in Hispalensem Portum  
 redit, emenso Orbe Terrarum.*

## EPIGRAMMA XCVIII.

**P**AR CAROLI fatis, velis victricibus implet  
 Jam Navis Portus, Bætica terra, tuos.

CA-

# LIBER III. 165

CAROLUS Imperio ; rapido Victoria cursu,  
 Terrarum hæc Orbem circuit ; ille regit:  
 Non CAROLUM vultu fregit fortuna sinistro ;  
 Barbâra nec fortem terruit unda ratem:  
 Non hostes CAROLUS, domitas non illa procellas ;  
 Non numerat palmas ille ; nec ista suas:  
 Altera dum pelago, dum terris dimicat alter,  
 Hic Terris major visus, & illa mari.  
 Orbe pererrato tumet hæc ; tumet ille relicto ;  
 Hæc Ponti ; Regni est fluctibus ille procul:  
 CAROLUS obscuro nitidos in fornice Soles  
 Dum ducit, tutam quærit ad astra viam ;  
 Emerita emeritum ut Regem ratis ista sequatur ;  
 Quod superest ; Cæli jam meditatur iter.

## A L I U D

### EPIGRAMMA XCIX.

**O** Felix, cum sole ratis quæ dimicat ; Orbem  
 Circuit ille polo ; circuit ista mari.  
 Grandem à Sole viam didicit ratis æmula ; sed nunc  
 Ferre diem ex illâ discere, Phœbe, potes.

DOMITIANUS IMPERATOR *muscas venatur.*

### EPIGRAMMA C.

**Q**UOD muscas Cæsar Latîâ venatur in aulâ,  
 Degenerem carpit fama sinistra manum.

## 166 EPIGRAMMATUM

Improbe debueras tamen illi parcere Livor,  
 Gesta forent fatui si tibi nota Ducis:  
 Nil nisi dum telas, ut aranea, textit inanes;  
 Has vaga ne lædat bellua, jure timet.

*Ad LINUM Deceptorem.*

## EPIGRAMMA CI.

**A**stus turpiculos, malasque fraudes  
 Amicis struis, & struis propinquis;  
 Et, cum tendiculas dolosus omnes  
 Tecnarum jasis, ingerisque plaustra  
 Quotquot sunt, LINE, Sycophantiarum,  
 Bellè ludere te putas facetum.  
 Non vivam; nisi tu vices superbas  
 Persolves aliquando tot dolorum,  
 Taurinis redolatus ossa loris:  
 Parum, suspicor, hoc erit facetum.

*Ad Philomusum, cum Potionem Ægyptiam, vulgò, Caffè, Cocolati præferret.*

## EPIGRAMMA CII.

**N**unc etiam portenta colit Nilotica tellus,  
 Pocula dum tristi mittit amara fimo;

Scù



Seu liquor ingratus rabidi sit fudor Anubis;  
 Seu fex Niliaci, colluviesque luti.  
 Quidquid id est; tibi quid dicam, PHILOMUSE; liquores  
 Posthabito austeros qui cocolate bibis?  
 Ingenuis prius auriculis præfatus honorem,  
 Dicam: Hæbrea tibi est aut soror, aut avia:  
 Cui sapiunt cepæ Ægypti, cui roscida mella  
 Desipiunt, illi non recutita gula est?

DIVUS FRANCISCUS *inter glaciatas  
 aquas corpore volutato malum  
 Cupidinem bebetat.*

## EPIGRAMMA CIII.

Magnanimos artus rigido dum gurgite versas,  
 Comprimat ut Cypriæ algida lymphæ faces,  
 Dive, tibi è glacie duplex victoria surgit:  
 Namque Venus gelidis pulsa recessit aquis;  
 Et, propè collato cordis candore pudici,  
 Crediderim victas erubuisse nives.

MARCI TULLII CICERONIS *caput  
 Rostris præfigitur.*

## EPIGRAMMA CIV.

Tenderet excessum Rostris cum figere Lictor;  
 Quod modo barbarico messuit ense, caput;  
 L 4 Hoc

168 EPIGRAMMATUM

Hoc caput est, TULLI vellet cum dicere; clamans  
Mentiris, dixit Roma, scelestè; meum est.

FERDINANDUS PORTUCARRERUS *Hispano-  
rum in Belgio Ductor, effusis pomorum,  
nucumque sacculis, occupat  
Ambianum.*

EPIGRAMMA CV.

EXplicat HISPANUS Victor vexilla per Urbem,  
Poma legit celeri dum vaga turba manu.  
Quid rides captam pomis fallacibus Urbem?  
Orbis non aliâ perditus arte fuit.

*Ad Flaccum Maledicum.*

EPIGRAMMA CVI.

OMnes usque licet carpas, non proficis hilum;  
Quosque magis laudas, sunt in honore magis.  
Arrige nunc aures; & porrige strenuus assem;  
Nequitiam ostendo dum tibi, Flacce, novam:  
Haud dubiè, quoscumque velis, damnaveris; illos  
Laudibus incipias si celebrare tuis.

*De*

*De Cereis Numismatis Pontificiis.*

## EPIGRAMMA CVII.

CAndida posthabitis referat cur cera metallis  
 Servatorem Agnum, noscere forte cupis.  
 Prætereo, quòd sæpe sacras liquefacta per aras;  
 Hæc ferat ardoris præmia digna sui.  
 Hic nobis Agnus Cœli commercia reddit;  
 Ceraque, quæ fuerant dissociata, ligat:  
 Sunt Agni molles; etiam mollißima cera est;  
 Et nive candidior surgit utrique color.  
 Cera imitata nives crebro tamen igne liquefcit;  
 Hic etiam flammæ, suspicor, Agnus habet:  
 Dant flores ceris vitæ præludia; & Agnus  
 Hic quoque, sum læti flos ego, dixit, agri.  
 Demum Cælestis de Virgine prodiit Agnus;  
 Virgineæ ceras & genuistis apes.

*Ad Mustafum Turcici Exercitus Ducem Supre-*  
 *mum, cum Viennam obsidens Pavones,*  
*Cycnos, & Psittacos ad ostentationem*  
*in Castris haberet.*

## EPIGRAMMA CVIII.

P Ars quota Pannonici veniunt, quæ sarcina belli,  
 Quæ tua barbaricæ Castra sequuntur aves?  
 Sci-

# 170: EPIGRAMMATUM

Scilicet ingruerit cum vis inopina Gradivi,  
 Impiger & fortes Sarmata flectet equos,  
 Tunc tibi in hostiles turmas fortissimus umbō  
 Picta coloratæ cauda volucris erit:  
 Tunc carmen tibi tristis olor, meditataque verba  
 Ales pollicitam proferet Indus opem.  
 Splendida quid sequeris volucrum portenta? sinister  
 Vindicat en bubo teque, tuosque sibi.

## A L I U D

### A D E U N D E M

#### EPIGRAMMA CIX.

**S**imonius Avium varios, atque omnia servas,  
 A priscis ritus qui tibi fluxit Avis;  
 Dic, age; dulcisonas, & summâ pelle decoras  
 Quid facient Aquilæ Cæsaris inter Aves?  
 Segnia dum volucrum ferres examina; Ductor  
 Nec, Mustase, bonus; nec bonus Augur eras.

# EPIGRAMMATUM

## LIBER IV.

AD LECTOREM.

### EPIGRAMMA I.

**U**Ndis adfita littoralis ora  
 Jucundam facit ambulationem:  
 Facit, dum legitur propinqua tellus,  
 Jucundam mare navigationem:  
 Dum præsentiſſibus affuit vêtusta,  
 Jociſſima Carminum libellus,  
 Jucundam facit ille lectiſſimam.  
 Cum nec delicias facetiarum,  
 Nec puras Veneres, sales venuſtiſſimos;  
 Cum nec Dædalei laborioſos  
 Hic præſtet liber ingenij volatus;  
 Saltem copia diſcolor moleſtæ  
 Partem detrahet, auferetque curæ.  
 Hoc te præmonitum, benigne Lector,  
 Æqui conſule: nunc lege; aut quieſce.

*Uvæ acinus. Anacreontem Poëtam  
suffocat.*

## EPIGRAMMA II.

**D**Um multo satur ipse mero Leneja laudat  
Pocula dulcisono Tejus ore senex,  
Vocem, animamque simul concreto nectare granum  
Abstulit; heu duras restituitque vices.  
Substitit ad modulos acinus dum dulce canentis,  
Elisit longâ guttura pressa morâ.

A L I U D

A D E U N D E M

## EPIGRAMMA III.

**O**Ccidis infelix tenerorum lusor Amorum,  
Obstruit angustum dum tibi Bacchus iter:  
Sævit atrox acinus, vinosaque guttura torquens,  
Plus mille exhaustos gestiit ultra cados.

PERILLUS *Ænei Tauri Inventor, in illum  
primus conjicitur.*

## EPIGRAMMA IV.

**A**Uthor inexpertum primus mugire Juvencom  
Edocet, & pœnas erudit ipse suas.  
Ingemit infrendens, Tauroque inclusus aheni  
Promit, quos aliis struxerat, ore sonos:  
Ejulet usque licet ferali murmure; nulla  
Vox, Astræa, tibi dulcior esse potest.

## A L I U D

## EPIGRAMMA V.

**T**Artara cum peteret Tauri fabricator aheni,  
Imbuere ipse suum primus adaustus opus;  
Contremuisse ferunt vulgus lachrymabile; Diti  
Suggereret pœnas nè Faber ille novas.

DIVA MARIA MAGDALENA DE PAZZIS  
*Christi Domini effigiem è sublimi loco  
 pendentem à sensibus alienata  
 divellit.*

## EPIGRAMMA VI.

Rapta rapit sculptum Virgo sublimis amorem,  
 Præda, & prædatrix Numinis ipsa sui.  
 Edidicit Virgo tales ab amore rapinas;  
 Pectora diripuit Virginis ille prius.

A L I U D

De eadem

AD D. MARIAM MAGDALENAM  
*Christi Domini Alumnam.*

## EPIGRAMMA VII.

MAGDALA, sanguineos cum funderet undiq; rivos  
 Quadrifido fixus robore Divus Amor,  
 Fronte percussâ fusos tibi scindere crines  
 Sat fuit; & mæstas imbre rigare genas:  
 Sed tristi præsens letho si Tusca fuisset  
 MAGDALA; plus aliquid, suspicor, ausa foret.  
 Fla-



Flammis illa suis elata, refrigeret altâ  
 Numinis amplectens pendula membra trabs.  
 Quæ potuit celsis pictum divellere muris;  
 Segnior ad verum non foret illa manus.

*Ad EUNUM Ludimagistrum.*

### EPIGRAMMA VIII.

**V**ergilium, non Virgilium scripsisse Priores,  
 Pro patriis pugnas scilicet, Eune, focis:  
 Palliolum, & Cynicam spondes pro pignore barbam,  
 Atque flagelliferæ sceptrâ severa manus.  
 Hoc sancire putas antiqua numismata centum;  
 Juras, non aliter saxa vetusta loqui.  
 Plurima dum scribis super hæc: farcimine multo  
 In manibus vastum jam tibi crescit opus.  
 Parce, precor, chartis: scripsit jam tanta nec ipse,  
 De cujus certas nomine, Virgilius.

*SISIGAMBIS Darii Mater, Alexandri  
 Macedonis Captiva, post hujus mor-  
 tem, dolori impar exstinguitur.*

### EPIGRAMMA IX.

**M**ajor Alexander domito male creditur Orbe:  
 Major Alexandro Persica mater erat.  
 Dum proprias regalis amat Captiva catenas,  
 Victorem meruit vincere victa suum.

Alter

## 176 EPIGRAMMATUM

Alter dum gladio; dumque altera certat amando,  
 Hostes ille suos subjicit; ista suum.  
 Vincula sustinuit Victoris femina fortis;  
 Victoris sed non sustinet illa necem:  
 Victa dolore parat Regi comes ire sepulto;  
 Misceri & clari Manibus illa Ducis.  
 Pellæus Juvenis frontem tunc extulit urnâ:  
 Spectator magni funeris esse cupit.  
 Græcia, nunc plaudas; nunc omnia vicimus, inquit,  
 Dum Regina meo funere victa cadit:  
 Vicimus Heroes reliquos, dum vita manebat;  
 Captivam invictam vicimus è tumulo.

*Ad Rudem Tonforem.*

## EPIGRAMMA X.

**A**Superior limâ, fungo callosior, horret  
 Et tibi scruposo pumice dura manus.  
 Parcere saponi, cultros & vendere posses;  
 Nam te Tonforem dextera sola facit.

*De XENOPHONTIS Cyropædiâ, &  
 Republicâ Platonis.*

## EPIGRAMMA XI.

**E**Gregium XENOPHON magno molimine Regem  
 Instituit; Sapiens optima Regna Plato:  
 Quem

Quem statuit Regem XENOPHON, nō vidimus unquā:

Celsa nec exemplum Regna Platonis habent.

Non defecturis nimium sublimia captat

Dum chartis; operam lusit uterque suam;

Pro meritisque ferunt convicia: fabula Cyrus

Vulgo est; sunt Graji frigida Regna senis:

Quæ non assequimur, vetus est damnare libido:

Ardua quàm virtus, plus sibi quisque placet.

*Ad SENEM ficto Capillitio ornatum.*

## EPIGRAMMA XII.

**D**istimulas flavo tua proxima fata capillo;  
Ridet inauratos sed Libitina dolos:

Iste tuis crinis facile est antiquior annis;

Quod minimè reris, te probat esse senem;

Quamque suis tegit exuviis, pede sæva superbo,

Non ne vides? Frontem mors premit atra tuam.

*Ad Apes in spineo CHRISTI DOMINI serto  
nidificantes.*

Alluditur ad illud Quintiliani:

*Quid non Divinum est apibus, nisi quòd moriuntur?*

## EPIGRAMMA XIII.

**I**ncautæ fugite hinc volucres; quæ Numina fixit,  
Non parcat parvis spina proterva feris:

M

Ver-

## 178 EPIGRAMMATUM

Vertice non isto Pæstana rosaria florent;  
 Aut rosa si rubet hac fronte, cruenta rubet;  
 Agmine sed denso perrumpit spinea castra,  
 Et pulchram in mortem mellea turba ruit.  
 O utinam, dicunt, jaculis moriamur in istis;  
 Quis tunc Divinas esse negabit apes?  
 Quid non Divinum est apibus, nisi funera? sed nunc  
 Hoc quoque Divinum, quòd moriuntur, habent.

## De Crystallinâ Mortis effigie.

## EPIGRAMMA XIV.

**P**erspiciuam Mors jure capit crystallina formam;  
 Omnia clarescunt, quâ properante, magis.

**JOSUE Ductor Hebræorum vocis imperio  
 Solem sistit.**

## EPIGRAMMA XV.

**P**lenior ut JOSUE, surgat Victoria, Titan  
 Attonito jussas servat in axe moras.  
 Non equidem stupeo, Isacidum fortissime Ductor,  
 Defixum validâ voce sterisse diem:  
 Ut tanto cursum suspenderet ille triumpho,  
 Debuerat jussu non eguisse tuo.

AD PATREM BARTHOLOMÆUM CAREGNO  
*in Theologicis disciplinis Præceptorem  
 meum, ut doctissimorum Operum  
 editionem maturet.*

## EPIGRAMMA XVI.

**E**Dere quid parcis, quo postera doctius ætas  
 Nil videat, Tiberis grande, Tagique decus?  
 Ni facias; vereor totum sparsura per Orbem  
 Posteritas tantas ut populetur opes.  
 Relligio exoret nunc saltem vota morantem  
 Publica; nam furtum te prohibere decet.  
 Annue, sint ævi munus, non præda futuri,  
 Quæ tegis ingenii tu monumenta tui.

PORCIA *haustis Carbonibus moritur.*

## EPIGRAMMA XVII.

**B**Ruti Uxor, magni soboles generosa Catonis,  
 Æquavit Patrem Filia; Sponsa Virum.  
 Arma negata videt sibi dum moritura, jugalem  
 Hausto nobilius consecrat igne fidem.  
 Extinguat si forte facem; Carbonibus istis,  
 Unde illam reparet, castus habebit Amor.

*Ad Muscam Carmina scripturienti importunè moleſtam .*

## EPIGRAMMA XVIII.

FUMOSÆ laridum petas culinæ,  
 Ales sordidulo proterva roſtro;  
 Quam crebro juvat incitare morſu,  
 Semperque inſtabili reſuſſione  
 Libris implicitum malis Poëtam.  
 Sic te nec Boreæ rigor, nec altâ  
 December nive torridus, geluque  
 Contractis adigat latere pennis;  
 Sic ſturni nigra guttura, & malorum  
 Incurſus fugias araneorum;  
 Thracum Conjuge rapta nec Tyranni  
 Pullis pabula des hirundininis.  
 Sed nec turriculas puer jocoſas  
 Ineptâ tibi complicitet papyro;  
 Leves improbus aut revellat alas,  
 Et longo jubeat volare filo.  
 Cunctis denique ſic legatur oris  
 Veſtræ gloria Lallius Catervæ,  
 Veſtri buccina Lallius laboris;  
 Qui vos Caſtaliſio ſacravit æſtu,  
 Supra Mæonias tulitque ranas,  
 Et ſupra Culicem Maronianum,  
 Paſſerem ſuper & Cattullianum.  
 Ergo pulſa mihi, repulſa fruſtra  
 Gyros improba pone Circulatrix;

Tolle,

Tolle, stridula, tolle murmurillum;  
 Quod me Palladiis vacare curis  
 Scribentem vetat, & vetat legentem.  
 Vaftris ocyus hinc facesse pennis;  
 Cicindela nitens amas vocari,  
 Seu tu ludicra noctiluca dici,  
 Seu nitedula, per vepreta saltus  
 Quæ ciet, brevibus corusca flammis.  
 Ut hinc te celer auferas; reposcunt  
 Mites Hendecasyllabi; feroci  
 Quos si despicias superba fastu;  
 Stringam, væ tibi, felleos Jambos.

*De Pulvere Cyprio.*

E P I G R A M M A XIX.

**Q**Uæ fatis humanos reprimant medicamina fastus;  
 Si vires ipso è pulvere luxus habet?

A L I U D

E P I G R A M M A XX.

**P**Arcite odorato conspergere pulvere crines;  
 Nam Cyprio Cyprius non caret igne cinis.

*Nealces, spongiâ in Tabulam jactâ, spu-  
mam Equi, quam delineare arte  
non potuit, casu perficit.*

## EPIGRAMMA XXI.

**A**Rtem sub tanto discit Fortuna Magistro;  
Tunc quoque cum nolles pingere, Pictor eras.  
Quadrupedem pinxit tua dextra; sed impete cæco  
Projecta in tabulam spongia fecit Equum.  
Classica si circum streperent, lituique minaces,  
Clangeret & rauco bellicus ære fragor,  
Scilicet in pugnam rueret; telâque relictâ,  
Hinnitum auditis redderet ille tubis:  
Præstat Dædaleâ mutum sed vivere telâ,  
Quàm subitâ Martem sollicitare fugâ;  
Clarius & ducit, quàm centum vincere turmas,  
In tabulâ Invidiam vincere posse tuâ.

*Eunomi Locrensis Citharædi Chordam ab-  
ruptam Cicada supplet, & moritur.*

## EPIGRAMMA XXII.

**S**Tridula vox nemorū postquam modulamine dulci  
Supplevit doctæ fila recisa Lyræ,  
Hic demum vitam posuit, cantumque; canoræ  
Ne mortis titulos solus haberet olor;

Hoc



Hoc major ; Cycinum per longa silentia vitæ  
 Credibile est serum nam didicisse melos ;  
 Hæc contra, stridens cum vixerit ante cicada,  
 Funeribus facta est nunc Philomela suis.

*Ad Auri Fossorem ruinâ oppressum.*

EPIGRAMMA XXIII.

**I**Pse manu cæcum scissâ tibi rupe sepulchrum  
 Construis ; atque diem projicis ante diem :  
 Demum avulsa ruens immani pondere cautes  
 Opprimis insanum, comminuitque caput :  
 Forsitan & tempus veniet, concreta corusco  
 Cum tua longa dies interet ossa luto :  
 Tunc pro pallenti glebâ, discrimine nullo,  
 Effodient cineres sarcula avara tuos.

A L I U D

EPIGRAMMA XXIV.

**D**icere nemo potest hic te post fata sepultum :  
 Vita tibi tumulus nil nisi tota fuit.

## A L I U D

## EPIGRAMMA XXV.

**E**ffosso de Monte petis qui Tartara, ripas  
Ire viâ ad stygias non brevior potes.

*Ad Furem, qui ex Arâ Deiparæ pensilem  
lychnum argenteum sustulit.*

## EPIGRAMMA XXVI.

**I**mmerito carpis non æqui Judicis iram,  
Quod, furti pretium, sustineas laqueum:  
Cum lychnum raperes, fugisti, fune relicta;  
Nunc bonus hanc etiam præbuit ille tibi.

## A D E U N D E M

*Post erepta ex Arâ DIVI FRANCISCI XAVERII  
argentea vasa ad Ælium Pontem  
suspensum.*

## EPIGRAMMA XXVII.

**C**onvasas: igitur properas discedere; sed quo?  
Dic, age, facundi per sacra Mercurii:  
Nem-

Nempe triumphalem festinas visere Pontem,  
Ælius imposuit quem, Tiberine, tibi.

ABRAMUS *Filium Isac immolaturus montem ascendit.*

## EPIGRAMMA XXVIII.

**A**Rma manu novus attollit de Patre Sacerdos,  
Deprimit & soboles victima facta caput.  
Corpora si spectas, natum procumbere credas;  
Cerne animos; dices protinus, ille ferit:  
Sed simul imperium revocat Deus, & Pater ensem:  
Scilicet hic nato parcit; & ille Patri.  
Inspice nunc hilares vultus natiq̃ue, Patrisq̃ue:  
Utrique ante aras hic quoque vultus erat.

DEMOSTHENES *hausto ex calamo  
veneno moritur.*

## EPIGRAMMA XXIX.

**B**alsama quæ famæ stillaverat Attica cuspis,  
Toxica nunc Domino porrigit atra suo.  
Non rudis ad clades venit lethalis arundo;  
Jam prius Æmathium foderat illa Ducem.  
Mæsta tamen Dominum cum tolleret; huic ego vitæ  
Plus dederam, visa est dicere; quam rapio.

ALIUD

## A L I U D

## EPIGRAMMA XXX.

**M**Ærebat Libitina, gravem quòd dextera falcem  
 Lenta nimis votis tenderet arma suis.  
 Ergo leves humeris aptat pharetrata sagittas;  
 Atque præcul jaculo fata ferente nocet.  
 Sic quoque, quòd terram non ullis ardua pennis,  
 Ignavo premeret pondere, tristis erat.  
 Quærenti celeres, Cælo quas explicet, alas;  
 Orator pennas addidit iste suas.

*Ad Turpilianum Tabacchivorum.*

## EPIGRAMMA XXXI.

**S**ugere Cantabrico pastillos ambare credis,  
 Cum forbes Brasilam, Turpiliane, luem.  
 Intortæ frondes olido tibi semper in ore;  
 Semper & exectâ sordida fronde manus.  
 Gutturæ cum luteo glebas vomis Americanas,  
 Ut focii fugiant undique, nonne vides?  
 Ut valeam, dicis, dens pinsit usque polentam,  
 Triste quod & solers India mittit olus:  
 Ut valeas? narras mihi somnia: tene malignâ  
 Peste laborantem posse valere putem?  
 Fac tamen, ut valeas: socios suffimine tetro  
 Sed mastas; tanti non placet emptâ salus.

Mit-

Mitte venenatos, cœnosa catharmata, succos:  
Obscenæ frondes, ut valeas; valeant.

RANSALDI *Galliæ Mareſcalli in ligneo  
Crure vulnerati festiva responsio.*

## EPIGRAMMA XXXII.

**F**ERREA RANSALDUM dextro pila crure minorem  
Fecerat: abscissum lignea fura subit.  
Sed pila roborem rursus metit altera fulcrum;  
Dum vêtus celso prælia miscet equo:  
Inscia turba dolet casu perculsa sinistro;  
Pondere cum magno tibia vulsa ruit.  
Subrisit RANSALDUS; &, his mihi cruribus, inquit,  
(Ne tumeant hostes) arca referta Domi est.

*In illud JUVENALIS: Mors sola fatetur  
quantula sint hominum corpuscula.*

## EPIGRAMMA XXXIII.

**N**UBIBUS elatas, & vastâ mole patentes  
Jam vincunt ipsas Regia busta Domos.  
Splendidius cineres habitant tellure sub imâ,  
Pergamis Attalicos quàm colat Aula Duces:  
Quantula sint hominum corpuscula; scilicet ipsa  
Demonstrare satis nec Libitina potest.

DIVUS FRANCISCUS PAULANUS  
*à Naviculario repudiatus, substrato  
 pedibus pallio, Fretum Siculo  
 lum trajicit.*

## EPIGRAMMA XXXIV.

**Q**ui pede vel nudo poterat per Cæcula ferri,  
 Brutia suppositâ cur freta veste secat?  
 Nobile prodigium, semper despectus haberi  
 Qui studet, obtentu, quo valet, ille tegit:  
 Ergo, ne stupidi videant miracula fluctus,  
 Pressas villosa gausape condit aquas:  
 Falleret utque alto spectantes littore Nautas,  
 Qualemcumque rudi conficit arte ratem.

## A L I U D

## EPIGRAMMA XXXV.

**T**rinacrio nova vela mari sua pallia pandit  
 Dum Salentini gloria prima soli;  
 Frendet Scylla ferox, & inexaturata Charybdis  
 Sic etiam è mediis ludimur, inquit, aquis?  
 Vicinus æratas frustra per sæcula Classes,  
 Si nunc hos animos penula vilis habet.  
 Quod si Regnator vasti novus iste profundi  
 Turgida inoffensum per freta carpit iter;

At

At spoliis liceat saltem tumuisse superbis;  
 Et decoret nostros celsa rapina sinus.  
 Ergo Scylla canes acuit, scopulosaque faxa,  
 Altera se crebro vortice cæca rotat;  
 Æthera terrificis latratibus illa fatigat;  
 Molitur tacitos sævior ista dolos:  
 Utraque dum prædam studiis discordibus ambit;  
 Oppositi metam littoris ille tenet.

*Ad Tuccam malum Poëtam.*

EPIGRAMMA XXXVI.

**O**Mnibus in pectus cervix collapsa recumbit,  
 Magnaque fit subitò, te recitante, quies:  
 Quid flexæ faciant, parcas tu quærere, frontes:  
 Turba tibi, hoc certum est, annuit, atque silet.

*A L I U D*

EPIGRAMMA XXXVII.

**C**Armina cum recitas dulcis sopor irrigat omnes;  
 Sirenum cantus quis neget esse tuos?

*ALIUD*

## A L I U D

*Ad Amicum insomniâ laborantem.*

## EPIGRAMMA XXXVIII.

**I**NSOMNES queresis noctes te ducere, quamvis  
 Sternat olorinus languida membra thorus.  
 Non multo prodest accersere Morphea Baccho;  
 Cænula parca nocet; sed neque lauta juvat:  
 Sumpsisisti roseis medicata papavera succis;  
 Non tulit optatam triste papaver opem.  
 Quas tibi non herbas, quæ non medicamina frustra  
 Docta, sed, heu vanâ diluit arte manus?  
 Mitte Machaonias curas, & Pæonis artem;  
 Non facit ad morbum turba togata tuum:  
 Quam nullus præstet tibi Pharmacopola salutem,  
 Ferre soporifero carmine Tucça potest.

*Ad ANNIBALEM, cum ex annulo  
 venenam exfugeret.*

## EPIGRAMMA XXXIX.

**C**LADIBUS Hesperios repetitis obrue campos;  
 Et jubeas saturos sanguinis ire lacus:  
 Naufragium ferale brevis tibi gutta ministrat.  
 Hic Trebiam moriens, hic Thrasymenon habes.

*ALIUD*



## A L I U D

## EPIGRAMMA XL.

**S**Æva Duce Lybicum postquā Fortuna reliquit,  
 Instat atrox terris, sævit & illa salo;  
 Annulus optatæ mortis sponsalia signat,  
 Subscribit gelidā queis Libitina manu;  
 Annulus est fidei pignus; præstare relicto  
 Hinc Domino extremam debuit ille fidem.

## A L I U D

## EPIGRAMMA XLI.

**A** Gladio Annibalis discit, reor, ipse ferire  
 Annulus; illustris versat utrumque manus:  
 Gemina nocens plus fortis habet; namque ille Latinos  
 Perculit; hæc ipsum sustulit Annibalem.

*De Cinna Scriptore loquaculo.*

## EPIGRAMMA XLII.

**Q**uid, vicinia criminosa, falso  
 Cinnam judicio, leviq̃ue dampnas?  
 Avarum vocitas, & Euclionis,  
 Chremetisque Nepotulum salutas:

Hæc

## 192 EPIGRAMMATUM

Hæc te dicere perperam, libelli  
 Clamant, edidit ille quos recenter,  
 Largos, Juppiter, & benigniores.  
 Quid ni? Nam tribus explicat libellis,  
 Quod posset tribus explicare verbis.  
 Abunde est mihi Cinna liberalis.

*Ad Gelliam gypsatam.*

## EPIGRAMMA XLIII.

URbe fremunt totâ cum Bacchanalia, sumit  
 Cur non personam Gellia? Semper habet.

A L I U D

## EPIGRAMMA XLIV.

QUodd te cervicis flexæ non dignor honore,  
 Obvia succenses, Gellia, sæpe mihi.  
 Cerussata tuos operis, gypsataque vultus,  
 Dividit & frontem non tua Cæsaries;  
 Beryllis oneras lucentia colla, manusque;  
 Tota peregrinâ merce sepulta lates.  
 Vis sibiūm, lapides, Minium, cretamve salutem?  
 Reticulo aut flectam, calceolisque caput?  
 Hæc solūm video, cum Gellia permeat; ipsam  
 Juratus possum dicere, non video.

Ad

AD DIVUM PHILIPPUM NERIUM,  
*cujus Cor divino Amore exæstuans*  
*Pectoris costas perfregit.*

## EPIGRAMMA XLV.

CUM latè Populis studeas succurrere, terris  
 Tu spatiosa magis pectora, Dive, geris:  
 Pectore sub tanto, velut arcto in carcere, corda  
 Quæ tua subsiliunt, quanta fuisse putem?

## A L I U D

## EPIGRAMMA XLVI.

ÆSTUAT inclusum, & totas incendere terras  
 Virginei poscit cor, properatque Senis.  
 Cur pectus saliens fregit, ne quærite; flammis  
 In cineres versum credidit esse suis.

DAVID *Pastor ictu lapidis Gigantem*  
*interficit.*

## EPIGRAMMA XLVII.

PASTOR eras; certoque lupum dum percutis ictu  
 Infidiatorem, nunc quoque Pastor eris.  
 N Eru.

## 194. EPIGRAMMATUM

Erudit hic fundâ dextram, quæ sceptrâ tenebit;  
 Quàm bene nunc fundam, tam bene sceptrâ geret;  
 Vjctoris magni in statuam non æra Corinthus;  
 Viscera non mittat velificata Paros;  
 Pone triumphalem lapidem, quo perculit hostem;  
 Par huic nulla Paros, nulla Corinthus erit.

*Amphion citharæ cantu Thæbarum muros  
 ædificat.*

## EPIGRAMMA XLVIII.

**A**Mphion nemus auritum dum carmine dulci  
 Mulcet, Apollineas sollicitatque fides,  
 Ardua miratur decrefcere saxa Cytheron,  
 Ardua Diræos saxa fecura sonos.  
 Argutæ adrepunt cautes, & mœnia condunt,  
 Ne defit Thæbis, Cadme, corona tuis.  
 Ordine dum faliant certo, dum sponte residant,  
 Humanâ lapides vivere mente putes;  
 Ad numerum coeunt, surgunt, ceduntque, tenentque  
 Quisque suum, citharâ præcipiente, locum.  
 Ut discant alii mentes effingere recto,  
 Et dociles legum fræna, jugumque pati,  
 Cecropios adeant, quos Porticus ornat, alumnos,  
 Aut quæ rixosa pulpita lite calent;  
 Hæc eadem muris discæ, ò Thæbane, Magistris;  
 Non homines; lapides, quos imiteris, habes.

*Ad*

*Ad Bombilianum ligneum gladium in  
vaginâ gerentem.*

## EPIGRAMMA XLIX.

**C**Redere si dignum est ; tibi Scanderbegica cedit,  
Cedit & Orlandi sæva machæra tibi.  
**U**t tenues raphanos , stricto metis ense Gigantes ;  
Saltibus impunes non finis ire feras.  
**H**æc tibi jactanti non ægrè credimus ; ensis  
Non dubiam dictis nam probat esse fidem.  
**N**on gladius Geticos Urfos , Libycasque tremiscit  
Iste Tigres ; tineas , Bombilianè , timet.

*Ad Castricum Causidicum veste rusticâ  
personatum.*

## EPIGRAMMA L.

**R**uricolæ simulas , Baccho regnante , figuram ;  
Et sic personam , Castrice , ferre putas.  
**E**rras : illa probè incito tibi vestis inhæret ;  
Larvatum doctâ te reor esse togâ.

AD PRINCIPEM LUDOVICUM BADENSEM.

*Cum ad Salanchemenium memorabilem Turcarum  
cladem edidisset, frustratâ spe hostium  
exiguas Germanorum copias undiquè  
obsidentium.*

## EPIGRAMMA LI.

**O**Dryfias LUDOVICUS ubi crebescere Lunas,  
Bistonio septas vidit & hoste vias;  
Risit, & innumerostanquam ipse obsederit hostes,  
Latum Threicio sanguine stravit iter.  
Sublatum celeres rear evalisse per auras;  
Sed terrâ elapsum funera tanta probant.

*Aliud ad Thraciam.*

## EPIGRAMMA LII.

**F**ugerit è manibus tibi quòd Victoria præsens,  
Hæc pedibus debes fata sinistra tuis.  
Thracia, si nescis, magnum est Victoria pondus,  
Tardasset celerem sarcina tanta fugam.  
Pondere te tanto BADENSIS dextra levavit.  
Quantum collibeat nunc fuge; nam levis es.

*Ad Thraciam Bello Hungarico  
semper victam.*

## EPIGRAMMA LIII.

**I**Nstabilis mutes posthac Insignia Lunæ:  
Est nimium constans cladibus illa tuis;

*De DIVO BENEDICTO, & Totila  
Rege Gothorum.*

## EPIGRAMMA LIV.

**D**Utor Hyperboreus, gelidâ flammatus ab Arcto,  
Ære graves acies imperiosus agit:  
Scilicet Hesperia in magnâ nova figere Regna  
Inculto veniens ex Aquilone flagrat.  
Umbrosi nemoris cultor tunc forte latebat  
Rupe cavâ Civis, Nursia clara, tuus:  
Ille etiam sacro molitur Regna recessu;  
Regna per incertas non peritura vices:  
Quæ non fecissent unquam præfagia Delphi;  
Quæ maneant geminos, accipe, Regna Duces.  
Concidit Arctoi Regnum, fastusque Tyranni;  
Haussit & insanum militis hasta latus.  
Condidit Imperium cunctis memorabile sæclis;  
Despectus cavæ qui brevis Hospes erat.  
Sylvicola Heroës lustris tot præbuit uno;  
Quot pedites signis duxerat ille suis.

*In Funere PATRIS GULIELMI DONDINI  
Societatis Jesu Scriptoris eximii.*

## EPIGRAMMA LV.

**H**Uc omnis chorus elegantiarum,  
Lusus ingenui, disertulique,  
Molles nectareis jocique pennis,  
Latos, quod bene verterit, volatus  
Huc advertite, quotquot estis omnes:  
GULIELMI cineres volate circum,  
Quo se Felsina cive ter beatam  
Ritè commemorat; minorque Rhænus  
Grandescit thalamo tumentiori;  
Plestra mascula, copiamque fandi  
Ut referre sui putes Alumni.  
Nunc ille implicitus choris piorum  
Quæsitam meritis perennitatem  
Doctis prorogat, asseritque chartis:  
Sive non pavidas agit Camenas  
Clivofum per iter, leves miricas  
Fortis temnere, desidesque valles:  
Sive nexilibus trahit catenis  
Aures, eloquio potens soluto:  
Seu molimina Gallici furoris  
Narrat irrita; Belgicumque Martem  
Non lentum sociare signa, longo  
Mefu & Sequanicos levare muros.  
Verum, proh facinus, scelusque! tandem  
Phœbi delictum, canorus ille

Olor



Olor conticuit; Remi Nepotes  
 Doctus Pierio beare cantu.  
 Sed vernant tamen, & vigent supremi  
 Invito cineres rigore saxi;  
 Quos ros Idalius, virensque Daphne,  
 Quos & textilibus tegunt corollis  
 Flores, munera vagientis anni:  
 Et mæsto chelys accubans sepulchro  
 Ciet languidos modos; nimisque  
 Parcas increpitat licentiosas.

De VIRGINE DEIPARA, cum D. ELISABETH  
*inviseret.*

## EPIGRAMMA LVI.

DUM subit exiguos, felicia tecta, Penates  
 Conceptum VIRGO MOX paritura DEUM;  
 Hospitis ad tantæ congressus exilit Infans;  
 Claustraque materni laxat iniqua sinus.  
 Ut nato discat præcurrere parvulus, ipsa  
 Erudit ad cursum mollia membra Parens:  
 Grande Puer nomen meruit; qui matris in alvo,  
 Vel cum non posset currere, Cursor erat.

**A**TIS Cræsi filius mutus, Patrem de  
periculo in prælio admonens,  
primum loquitur.

## EPIGRAMMA LVII.

**U**T Cræsum peteret, scisso velamine, cœpit  
Cernere, cæca prius quæ Libitina fuit:  
Liberâ vidit Amor torquentem lumina mortem;  
Et risit motâ terque, quaterque face.  
Mox Pueri in magnam solvit dum guttura vocem,  
Alarum excutiens mobile vellus, ait,  
In Patrem haud unquam tantum mors cæca videbit;  
Quantum clamabit pro Patre mutus amor.

*Ad PONTILIANUM Poëtam ineptum.*

## EPIGRAMMA LVIII.

**T**Ransversi signata notis tibi turpiter unguis  
Censor, quæ dederas carmina, restituit:  
Quælibet indignos vultus proscissa malignè  
Pagina, Deiphobus Virgilianus erat.  
Euge, Papæ; scriptor non es de Plebe; Libelli  
Sed sapiunt ungues, PONTILIANE, tui.

DIVUS

DIVUS ANTONIUS PATAVINUS *de rebus*  
*Divinis verba faciens Pisces*  
*Auditores habet.*

## EPIGRAMMA LIX.

**D**Eserto clamat dum Littore Lufius Heros,  
 Fluctivagi accurrunt, squamea turba, greges:  
 Ille pio tenet eloquio genus omne natantum;  
 Annuit ad sacros picta caterva modos:  
 Nec mirum: prædæ certos tot projicit hamos,  
 Dulcia nectareo verba quot ore fluunt.

*Ad Comitem Veteranum, cum ad Portas*  
*Ferreas fuso Turcarum Exercitu,*  
*in Acie cecidisset.*

## EPIGRAMMA LX.

**I**smarios latè Victor cum fuderis hostes;  
 Obruerant signis qui tua Castra suis;  
 Cum retro celeres referant Insignia Lunas;  
 Pannoniæ longus qui modò terror erant;  
 Videris Odrisiæ cum surgere stragis acervos,  
 Et scithycâ Hungaricos cæde tepere lacus;  
 Ipsa tamen se tanta putat Victoria victam,  
 Gaudiaque atratâ squalida veste gemunt;  
 Pugna

302. EPIGRAMMATUM  
Pugnæ infelicis Germania damnat honorem,  
Atque odit palmas clara Vienna suas.  
Mæsta diem signat lachrymis Europa nefastis:  
Optime Dux; tanti, te periisse, fuit.

*Mater Hebræa fame vexata  
Filio vescitur.*

EPIGRAMMA LXI.

CUM Pueri jejuna parens discerperet artus;  
Tingeret inviras jamque cruore manus:  
Nate, refert, miseræ in gremium rediture parentis,  
In sævæ credas Tigridis ire sinus.  
Voce Puer tremulâ quid tigres objicis? inquit;  
Nulla solet partus dilacerare tigris.

*Ad Cynicum.*

EPIGRAMMA LXII.

CUM res turba frequens Cynicum vocat, illis tendis;  
Et, tanquam Cyrum dixerit esse, tumes.  
Cum Cynicum dicit, passum te lacte canino:  
Prædicat; hoc etiam nomine Cyrus eris.

GUISLÆ

GUISIÆ DUX ex Turonensi Arce, Sericæ  
*scale in artocreate inclusæ*  
*beneficio, evadit.*

## EPIGRAMMA LXIII.

**F**ida manus duro, PRINCEPS, te carcere solvit;  
 Aurum mentiti clarior arte Jovis.  
 Triticeam extendit massam, cui diluit omnes  
 Integer excerpto lacte vitellus opes;  
 Irrorare quadram nec parcat arundine dulci,  
 Quam ratis Occiduis Lusit vexit aquis.  
 Quid non audet amor? textos hic vellere Serum  
 Condit, Captivo fercula grata, gradus.  
 Concamerat Cereale cavâ testudine Crustum;  
 Ne prodât cæcos conscia rima dolos;  
 A pedibus Puer hæc Lotharo munuscula mittit;  
 Supplicium Domini cui grave pondus erat.  
 Ille dapem dubiam, & fraudes miratus amicas,  
 Sericæ dum dextrâ vincula solvit, ait:  
 Si me captivum duræ fecere catenæ,  
 Nunc mea libertas nascitur è laqueis.  
 Quamvis nec laqueos; geminas mihi sufficit alas,  
 Nexuit hæc gratâ qui mihi vincla manu.  
 Desilit hæc fatus celsæ de culmine Turris;  
 Et tutum tacitâ nocte capeffit iter.  
 Dædalus hic tuus est ruptis, ò Gallia, vinclis;  
 Tempore nec longo, Mars erit ille tuus.

*Ad D. FRANCISCUM, cum cœlestis Citba-  
radus dulcissimo sonitu ægrotantem  
reficeret.*

## EPIGRAMMA LXIV.

**A**strorum Civis buxum dum pectine pulsar,  
Cedit ab obfesso pectore victa lues.  
Sæpius hos ego te morbos optare putarim;  
Ut tanto possis Hospite sæpe frui.

## A L I U D

## EPIGRAMMA LXV.

**C**edere non miror morbum, Cœlestis Jopas  
Sidereâ tactas dum movet arte fides.  
Ægrotum auditis miror sed vivere chordis;  
Deliciis poterat qui periisse suis.

## A L I U D

## EPIGRAMMA LXVI.

**D**ivinare licet morbi causamque, genusque,  
Qui tenet angusto te, cruciatque thoro.  
Cœ-

Cœlestem morbum Medicus notat æthere lapsus:

Hæc tua, nî fallor, febris amoris erat.

Hem, quid agis? cui te tradis, subiicisque medenti?

Non minuit morbum; sed fovet ille tuum.

*De Hispanici Oratoris Solemni Equitatu,  
quo Neapolitani Regni Tributum  
Pontifici Romano defertur.*

## EPIGRAMMA LXVII.

EN Princeps, gemino leges qui dividit Orbi,  
Subditur Imperio, Roma superba, tuo.

Tibris agit festivus aquas, Collesque resultant,  
Dum clarat stupidum splendida pompa diem.

Qualis erit patriâ Regnator Iberus in aulâ;  
Si tantum obsequii pompa decoris habet?

*Mulieres Carthaginienses abscissos crimes  
tradunt ad tendendos Militum  
arcus.*

## EPIGRAMMA LXVIII.

P Unica cum conjux armaret crinibus arcus,  
Mars galeâ fertur dissolvissse caput:

Quam terræ allidens; i, pondus inutile, dixit;

Fœmina quam belli me docet esse moram.

Ne.

206 EPIGRAMMATUM  
Nequidquam fronti præstat tutamina ferrum;  
Talia si demens invidet arma mihi.

*Ad Hæbreos ad Montem Doliolum singulis  
Sabbathis confluentes, ubi vino ex  
adsitis cellis hausto se onerant.*

EPIGRAMMA LXIX.

**F**onte salit multo dictus de Viminis Collis;  
Multa Palatino vertice lympa fluit;  
Perstrepat Exquilis ludiera tepentibus undæ;  
Et sua sunt hortis murmura, Jane, tuis;  
Assurgit Romæ nullus sine Najade collis;  
Dolioli solum saxa Lyæus habet.  
Devitat montes alios Judæus apellâ;  
Sola racemiferi saxa colitque Dei.  
Vinoso peragis qui Bacchanalia monte;  
Tu mihi Paganus; non Solymæus eris.

*Ad D. FRANCISCUM Christi Domini  
vulneribus insignitum.*

EPIGRAMMA LXX.

**A**ppenninicolæ magnæ plantasque, manusque  
Numinis impresso vulnere signat amor.  
Sperniq; metumq; inter pendent mortalia corda;  
Pignora tu manibus certa salutis habes.

Co-



*Columbae in obsidione Hierosolymitanâ  
Saracenorum litteras alis insutas  
in Urbem deferunt.*

## EPIGRAMMA LXXI.

**D**Um fufos latè ad Solymas via nulla per hostes;  
Cursoris munus miffa Columba fubit.  
Scriptas illa notas deferre per inania, penitus  
Infideat quantum nescia Martis onus.  
Ergo parum eft, Aquilas torvo servire Gradivo?  
Pars belli eft, pudeat; Nuncia pacis Avis.

*Ad DECIANUM munera captantem.*

## EPIGRAMMA LXXII.

**S**Citaris, tibi quid mittam, cum laeta recurret,  
Quæ mihi natalis fulfit, amica dies.  
Natali, DECIANE, meo tibi munera mittam,  
Ad me miffi quæ, DECIANE, tuo.

*De Aurâ, & Aulâ.*

## EPIGRAMMA LXXIII.

**N**Avita non Auræ fidat; non Aulicus Aulæ:  
Vultus Aura suos mutat; & Aula suos.

*Venatorio Cani Epitaphium.*

## EPIGRAMMA LXXIV.

**H**ic nemorum formido jacet: pavitare jacentem,  
Et procul à tumulo vidimus ire feras.  
Si miser hoc socio sylvas peragrasset Adonis,  
Non puerum Ætolus dilacerasset aper.  
Hic morfu, Actæon, non te læsisset acerbo;  
Spretaque præ Domino, torva Diana, fores.  
Nunc demum viridi tumulatus cespite, luget  
Non vitâ; Domino sed procul esse suo.

A L I U D

## EPIGRAMMA LXXV.

**S**irius exul erat Cœlo; quod in otia segnis  
Sidereis nimium parceret ille feris.  
Et malè quod Stygios defendit ab Hercule postes;  
Janitor ex Orco Cerberus exul erat.

A

A Jove pulsus abit Canis alter; & alter Averno  
 A nigro umbrarum Principe pulsus abit.  
 Custodes alios quærunt dum Numina; junctis  
 Certatim votis hunc rapuere Canem.  
 Juppiter illum astris; Pluton sed destinat umbris;  
 Et torquet geminos rixa superba Deos.  
 Ipse astris mallet recipi, & servire Tonanti;  
 Ante nigras Erebi quàm vigilare fores.  
 Tartareo sed cæca favet fortuna Tyranno;  
 Et prædam Pluton de Jove victor habet.  
 Sorte canis miserâ doliuit; Cæloque negato,  
 Occidit, heu! gemini Numinis ante pedes,

*Ad effigiem Infantis JESU in Deiparæ sinu  
 ludentis.*

E P I G R A M M A LXXVI.

**B**Landæ suaviolum, PUER, Parentis,  
 Qui ludis niveis reclinis ulnis;  
 Et centum roseo rapis labello  
 Matris oscula, provocasque centum;  
 Ore nectareo, venustuloque  
 Dulces, obsecro, quas refundis auras?  
 Succos galbaneos, amaracosque,  
 Spicæque Assiriz ferunt odores?  
 An guttas, memorant quibus Sabæos  
 Fletu divite lachrymare truncos?  
 An Costum, casiamque, cinnamumque,  
 Indi cespitis exprimuntque rores?  
 An mites Zephiros, comatularum

O

Quæ

## 210 EPIGRAMMATUM

Quæ suspiria ventilant rosarum?  
O matrem mihi ter, quater beatam,  
Quid mellita flagrent labella, discit  
Quæ per oscula, judicatque mille!

JACOBUS DUX EBORACENSIS,  
*postea Britanniae Rex, incensâ Navi, ex*  
*quâ contra Ollandos pugnabat, in*  
*aliâ profluit Victor*  
*Certaminis.*

## EPIGRAMMA LXXVII.

**Æ**NEÆ haud impar fatis DUX Anglicus: ille  
Si Patriæ; hic laceræ sospes ab igne ratis:  
Anglica te Superi servant ad Regna; parabat  
Italiam Phrygio si Cytheræ DUCI.  
Dissimile hoc unum; navis tu victor in igne;  
Ille fugit Patriæ victus ab igne suæ.  
Debita sed merces: Phrygium nam Regna manebant  
Non sua Ductorem; te tua Regna manent.

*De Feris Zodiaci.*

## EPIGRAMMA LXXVIII.

**Æ**Thera terrificant Colubri quid Sibila? Taur  
Cornua? Quid Cancer, Scorpius, Ursa, Leo?  
Splendida figmento non Græcia lusit inani;  
Cum Cælum Lybiam fecit, & astra feras:  
Sci.

Scilicet immemores timeant ut Tartara gentes,  
Vel Cælum monstris admonet omne suis.

A L I U D

EPIGRAMMA LXXIX.

GRæcia tot monstris deformia sidera fecit;  
Deformes fecit sed magis illa Deos.

MAXIMILIANUS BAVARIÆ DUX,  
*Nuptiis cum Austriacâ Sponsâ vix cele-*  
*bratis, ad expugnandam Budam cum*  
*exercitu advolat.*

EPIGRAMMA LXXX.

MIraris, thalamo Sponsum pugnare relicto?  
Est, merito liceat quod stupuisse magis.  
Prole novâ mediis nam cernitur auctus in armis,  
Conjuge vix visâ qui modo Sponsus erat:  
Procubuit validi quæ robore victa lacerti,  
Clara Ducis soboles BUDA superba fuit.

*Ad Uliſſem, cujus Socii à Circe mutantur  
in Sues.*

## EPIGRAMMA LXXXI.

**E**Rgo ne formidanda tibi poſt Heſtora Circe eſt?  
 Illa tuum tardat, Dux Ithaceniſis iter?  
 Fœmina Dulichias clades ulciſcitur: haſtam  
 Virga levis ſuperat, Pentheſilea, tuam:  
 Forte animos Danaum dum viderat eſſe ferarum,  
 Corpora de ſævis addidit illa feris.  
 O felix, ſi vos poſſet ſic Troja videre;  
 Sed non victores noſceret illa ſuos.  
 Hæc Trojæ vindicta fuit: ſi perdidit illam  
 Grajus Equus; Grajos nunc domuere Sues.

## A L I U D

## EPIGRAMMA LXXXII.

**C**Um Socii formas mutarint; poſcitis, ipſum  
 Cur non induerit forma ferina Ducem?  
 In Vulpem verti potuit fortaffe; ſed ille  
 Vulpes jam longo tempore Ductor erat.

*Ad Militem Meticulosum.*

EPIGRAMMA LXXXIII.

**S**Trenua qui sociis vertisti terga relictis;  
Cum repetes patrios sospes ab hoste lares;  
Non puto tu figes victricia postibus arma;  
Nempe relictâ solo turpiter arma jacent:  
Calceolis tibi parta salus: hos figere posses;  
Consumptos longâ sed reor esse fugâ.

*Jephthe post devictos Ammonitas, mactatâ  
Filiâ, Votum, quod nuncupa-  
verat, solvit.*

EPIGRAMMA LXXXIV.

**C**Larum pugna Ducem; miserû Victoria Patrem.  
Te facit; es felix ense, miserque tuo.  
Sanguine ab hostili gladium ne conde madentem;  
Æstuat hoc ferrum nobiliore siti:  
Innumeros bello postquam deviceris hostes,  
Hostia, nata tibi nam ferienda venit.  
Sed tu magnanimæ jugulum qui Virginis hauris;  
Nec ponis tenero in corpore duritiem,  
Sæve chalybs nimium; si tanto robore polles,  
Mors, reor, haud aliâ falce ferire velit;  
Cum Natâ Patrem exanimas, solvisque Tonantem  
Pollicitis plusquam voverat ille suis.

*De Vinculis* DIVI PETRI.

## EPIGRAMMA LXXXV.

CLavigeri è manibus pondus servile metalli  
 Decidit; atque solo vincula strata jacent:  
 Solvere cui lata est aliorum vincla potestas,  
 Nexibus haud stringi debuit illa manus.

## A L I U D

## EPIGRAMMA LXXXVI.

SUBdit adoratis collum pia turba catenis,  
 Festa serenato cum redit axe dies:  
 Non jaculis foetæ Turres; non valla; tuentur  
 Hæc libertatem Vincula, ROMA, tuam.

DOMITIANUS IMPERATOR *Populo Romano,*  
*refertis auro arundinibus, cædi jussu,*  
*eidem, è dissectis baculis erumpente*  
*auro, tradit Congiarium.*

## EPIGRAMMA LXXXVII.

ARida prægnanti jam fit pretiosa metallo,  
 Quæ vilis culmo Canna virente fuit: Non.



Non hanc pigra palus genuit; dum crescit in auro,  
 Hanc reor Hesperidum progenuisse nemus:  
 Elysio an fulvos Æneas littore Ratnos  
 Transtulit ad Latias, germina clara, plagas?  
 Terrorem simulat Cæsar, dum prodigit aurum;  
 E dono discit fallere namque suo:  
 Hoc distant: ficto Cæsar nam vulnere prodest;  
 Aurum, dum simulat velle juvare, nocet.

A L I U D  
 EPIGRAMMA LXXXVIII.

AUrum nodoso bene claudis verbere; multum.  
 Illa lues hominum tundere corda solet.  
 Semper corda hominū; sed nunc quoq; corpora tundit,  
 Et premit insano terga Latina pede:  
 Non homines; ipsum baculo, sed dignius aurum,  
 Hoc homines solum nam stimulante nocent.  
 Sed tu, Roma, time baculos, & dona ferentes;  
 Non temere nugas Domitianus agit:  
 Nam qui Verberibus cædit tua terga jocosis,  
 Aureus est, fateor, Roma; sed est baculus.

*Ad Taliarchum, cum Cœnam solo luxu  
 adornaret.*

EPIGRAMMA LXXXIX.

SÆpe recusantem, desum cœnare paratum  
 Lautitiis oneras me, Taliarche, meris.  
 O 4 Per-

## 216 EPIGRAMMATUM

Perstringunt patefacta oculos armaria, quæque  
 Per certos crescit splendida gaza gradus.  
 Cælato nitet argento pellucida pelvis,  
 Ansatus gemmis asper aqualis adest.  
 Archæico hinc, illinc ludunt anaglypta salino;  
 Et patinas auro bractea dives obit:  
 Sunt quæ perpetuus commendet pocula lævor;  
 Et sunt quæ multus Mentor ad astra ferat.  
 Cuncta nitent; unctæ sed nec nitet aura culinæ;  
 Tune putas oculos esuriisse meos?  
 Ut videam me nempe vocas? depromere cœnam  
 Quælibet hanc nobis Aurificina potest.

*NERO quærit, nec invenit Interfectorem.*

## EPIGRAMMA XC.

**F**Unera mendicus poscit chlamydatum; Amici,  
 Dilacerate, precor, corda NERONIS, ait.  
 Non aurum petimus, sed clades: muneris hujus,  
 Si memini, vobis non ego avarus eram;  
 Reddite vos saltem de tot mihi cladibus unam;  
 Vestra mihi, Comites, ultio munus erit.  
 Ut cædar, posco mendicus; & impero Cæsar;  
 Esse reor titulo dignus utroque mori.  
 Funera poscebat, poscenti funera defunt;  
 Sed non posse mori funeris instar erat.  
 Quæris cur præter morem mors lenta moretur?  
 Absumpsit falcem cladibus illa tuis.  
 Falce novâ nec te peteret; disrumpere falcem  
 Pectore tam duro nam timet illa novam.

O Tempora: O Mores.

EPIGRAMMA XCI.

**N**unc, ò tempora! nunc, boni sodales,  
O Mores! iterate ter, quaterque.  
Natta Causidicus palam vocatur,  
Qui causas adit, actitatque nullas:  
Audit Cinnara non malus Poëta,  
Qui versus neque somniavit unquam:  
Nec pudet Medicum rogare Tullum,  
Ægros ad Styga qui relegat Omnes.  
Nunc, ò tempora! nunc boni Sodales,  
O Mores! iterate ter, quaterque.

HEROSTRATUS *Dianę Ephesinę Templum  
incendit.*

EPIGRAMMA XCII.

**G**Ræcia mentiris; non has HEROSTRATUS Aras,  
Illius at simulans ora cremavit Amor.  
Lugebat, Triviam sua spernere tela, Cupido;  
Concinnaque novos, quâ valet arte, dolos.  
Occultusque Viri specie, sua Tempa tenentem  
Vibrato torvam fulminat igne Deam:  
Virgo dum flammâs declinat territa; Templum.  
Heu nunquam infantes corripuere faces.

*Alia?*

*Aliud ad HEROSTRATUM.*

## EPIGRAMMA XCIII.

**Q**uid nomen Templo petis immortale perusto?  
 Quod cineri scribis, tunc perenne putas?

*Ad LINUM herbæ Nicosianæ, vulgò  
 Tabacco, liberalius indulgentem.*

## EPIGRAMMA XCIII.

**A**merico nares oneras, LINE, pulvere semper;  
 Promit odoratas arcula semper opes;  
 Seu matutinis madeat saturata Ligustris;  
 Ritè vaporatam seu bibat illa cedrum:  
 Te juvat Hispano pulvisculus ambare dives;  
 Te juvat in secto cespite muschus Arabs.  
 Non miror, Brasiliâ nasum dum fronde saginas,  
 Quod satur immensum creverit ille tibi;  
 Sed mirum est; cerebrum attenues cum pulvere tanto,  
 Te tamen emunctæ naris habere nihil.

ALEXANDER MACEDO *ad Achillis*; JULIUS  
CÆSAR *ad Alexandri tumultum*  
*lachrymantur.*

AD ALEXANDRUM.

EPIGRAMMA XCIV.

ÆAciden gemis extinctum, fortissime Ductor;  
An potius, vivat quod nimis ille, gemis?  
Numinis affectas si nomina, comprime luctus;  
Namque hic mortalem te probat esse liquor.  
Tu nihil Æacide dispar; cunabula quæris?  
Ille est progenies Tethyos; ipse Jovis:  
Prælia si numeras; ille ebrius Hectore victo;  
Tu debellato clarius orbe tumes.  
Gloria Pelide magni sed maxima, fletu  
Illustres Cineres quod maduere tuo:  
Hos etiam gemitus olim, volventibus annis,  
Alter ALEXANDER qui tibi reddat, erit.

Cajus Caligula ex Jovis statuâ caput am-  
putari jubet, & sui effigiem substitui.

EPIGRAMMA XCV.

ILLuvie scelerum sædus Pater ille Deorum  
Rite jacet secto vertice truncus inerts:

Lau.

## 220 EPIGRAMMATUM

Laudaris, Cæsar; Superûm quòd crimina plectens,  
Romanum profers latius Imperium.

Sed nugas agitas, & rursus inania captas,  
Assuitur trunco dum tua forma Jovi.

Substituïsse caput Statuæ ne crede Tonantis:  
Non habet illa caput, dum gerit illa tuum.

## A L I U D

## EPIGRAMMA XCVI.

**T**Arpejum scissâ temperatum fronte Tonantem  
Viderat æthereâ verus ab arce Tonans;

Viderat, & probri authorem fumante sagittâ  
Ut peteret, Cœlo murmura rauca ciēt.

Cæsare sed viso, quid fulmina perdimus? inquit;  
Nam non iste caput, quo feriat, habet.

*Ad Litteratorem illitteratum.*

## EPIGRAMMA XCVII.

**L**ibrorum titulos, Authorum nomina calles  
Omnia, ceu digitos unguiculosque tuos.

Tu Nomenclator, condus, promusque fidelis  
Quas condant tabulas scrinia docta doces;

Quæ summi habitent oculis cognoscis, & imis;  
Tu nova, tu Veterum nomine scripta vocas.

Mirum est, quem longus Titulorum clarat Elenchus;  
Palladis extremâ in plebe tenere locum.

XER.

XERSES in *Athos Montem*  
*mare immittit.*

## EPIGRAMMA XCVIII.

**Æ**Tnam Tartareis irrupit Pluto quadrigis;  
Ut nigro sociam quæreret inde thoro:  
Audiit egrègium Neptunus, & invidet ansum;  
Frater de fratris prosperitate dolet:  
Inde ubi barbarico XERSEM properare paratu  
Sensit, ut invicti cerneret ora Ducis,  
Ambitione pari fraterna exempla sequutus,  
Threicii ducit per juga Montis aquas;  
Mox ait: *Ætna olim sibi plauferit Hospite Dite;*  
*Hospite Neptuno nunc sibi plaudat Athos.*

AD CAROLUM V. CÆSAREM,  
*cum in Cænobio Sancti Iusti ex herbis*  
*floribusque Solare Horologium*  
*concinnaret.*

## EPIGRAMMA XCIX.

**A**Rea quid celeres tibi myrtea digerit horas,  
Ludit & in parvo cespite Solis iter?  
Parce dies numerare; suos confundere cursus  
Discent incerti, te numerante, dies.  
Te Cultore, pedem sistet levis hora fugacem;  
Et poscet longas per tua septa moras.

Fal.

# 222 EPIGRAMMATUM

Fallor: non lentos frondentia testa tenebunt;  
 Peccabunt nimiam sed brevitate dies.  
 Ire sub Augustum nam quælibet hora Colonus  
 Certatim, cursu præcipitante, petet;  
 Pellentur celeres horis properantibus horæ:  
 Sæcula in Areolas ambitiosa ruent.  
 Rixoso, decus Ausriadum, jam parce labori:  
 Quid struis in rapidum buxea claustra diem?  
 Impigra composito labentia tempora motu  
 Distinguant alii; perdomuisse tuum est.

## A L I U D EPIGRAMMA C.

**H**Oras dum Myrtus discriminat æmula Solis,  
 Obsequitur dociles & tibi tonsa comas;  
 Jam mihi nec nemoris, dicit, Regina superbi,  
 Peliaci æquetur Pinus alumna jugi;  
 Ausa nec in medias Cedrus se tollere nubes;  
 Quæ numerat ramis sæcula plura suis.  
 Arbos prima forem; nisi, quæ te fronde coronat,  
 Præriperet laurus præmia tanta mihi.

B. STANISLAUS KOSTKA, *amore Divino  
 exæstuans, aquis imbuta linea sudaria  
 pectori admovet.*

## EPIGRAMMA CI.

**D**Um magis PUER æstuat, magisque;  
 Crebrescunt magis, & magis favillæ

Quæ



Quæ licentius uſtulant medullas;  
 Corda ſæpius exedunt; & omnes  
 Compellunt Juvenem perire in horas.  
 Non fleſti precibuſque, lachrymiſque  
 Poſſunt cordivoræ faces: Amoris  
 Novæ quin feriunt magis ſagittæ;  
 Et magis reſonans minatur arcus.  
 Fontis largiſſuos amica rores  
 Bis ter carbaſus hauſit; æſtuoſi  
 Sed ſudaria delibuta flammas  
 Augent peſtoris, & reſuſus ipſe  
 Latex algidulus ſagrare diſcit:  
 Quid urges, PUER, irritum laborem?  
 Recede hinc, PUER, ocuus, recede:  
 Ingratos fuge quæritare fontes.  
 Latens, non ne vides, Amor dolofiſ  
 Ut ſtridentia tela tingit undis,  
 Et fontes acuit madore nervos?  
 Recede hinc, PUER, ocuus, recede:  
 Ingratos fuge quæritare fontes.

*De Crocodili Spolio in Muſæo Collegii  
 Romani.*

EPIGRAMMA CII.

QUàm bene funiculis nexus de fornice pendet  
 Hydrus Niliacæ perfidus hoſpes aquæ.  
 Sæpius humano paſtus nam ſanguine, turpem  
 Rite luit laqueo pendulus ingluviem.  
 Et veros meritò riſus ciet ille; tot olim  
 Cujus cæde virum lachryma ficta fuit.

Ad

AD P. PHILIPPUM BONANNI SOC. JESU,  
*cum de marinis Cochleis libros  
 eruditissimos ederet.*

## EPIGRAMMA CIII.

Mille coloratis ludit miracula testis  
 Quæ rerum Genitrix ingeniosa, doces.  
 Pictas nempe domos, & testa sequacia monstras;  
 Qualia nec Cyrus, nec Cleopatra colit.  
 Exuvias vacuas sed dum mirabere, Lector,  
 Baccas, concharum germina, forte petes:  
 Has etiam tradent tibi docta volumina; quales  
 Tradere nulla tibi concha Erythræa potest.

*Lucanus, solutis venis, jussu Neronis  
 occiditur.*

## EPIGRAMMA CIV.

Stirpis Julææ laudes, & reddita Musis  
 Otia cum caneret Tityrus inter oves;  
 Principis alloquio Vates dignatus amico,  
 Cæsareo meruit discubuisse thoro.  
 Fascibus adjectos celeri dum Marte Britannos.  
 Arsacidæque feros Daunia plectra canunt,  
 Te Mecænatis tollebat rhæda supini,  
 Augustasque capis tu quoque, Flacce, dapes.  
 Clau:

Claudius ut regnet, laudas dum Civica bella,  
 Et, Lucane, tibi perdita jura placent;  
 Tu quoque, dissectis venis, optabile funus,  
 Præmia magnanimo digna Nerone, refers.  
 Matre magis te Cæsar amat, Sponsaque: perire  
 Namque tuo optassent funere Sponsa, Parens.

*De Stellâ Reges Orientis ad CHRISTI  
 DOMINI cunas ducente.*

## EPIGRAMMA CV.

PRævia stella micans Reges deducit Eoos  
 Ad Puerum, Solymæ qui male notus erat.  
 Sidus ubi radiat, mirum! nox victa recessit;  
 Perfida gens noctem, sol ubi fulget, habet.

*De Marmoreâ Tabulâ Anaglyptici Operis in Arâ BEATI  
 ALOYSII GONZAGÆ: in quâ Puer Cælestis coronam  
 auream B. ALOYSIO defert: ipse verò  
 complicatis ad pectus manibus, de-  
 missâ fronte, terram  
 spectat.*

## EPIGRAMMA CVI.

STirpis adoratæ specimen, calcata jacebat  
 GONZAGÆ ad teneros strata Corona pedes.  
 Aliger hanc vidit, furto rapuitque jocosus,  
 Cum Puero assuetus ludere nempe pari.

P

Side.

## 226 EPIGRAMMATUM

Sideræ recoquitque iterum Fornacis in igne ,  
 Atque opibus ditat fulgida ferta novis.  
 Mox Pueri raptum plantis Insigne superbum  
 Festinat meritis imposuisse comis .  
 Ille sed ad pectus dum brachia nexa decenter  
 Flectit, & adverso lumina blanda solo;  
 Attonitum prono mirari vertice credas,  
 Sublata è pedibus fulgida ferta suis.  
 Tolle, Puer, Cælo tua lumina: sidera reddunt  
 En tibi; despectâ quod male quæris humo .

## A L I U D

## EPIGRAMMA CVII.

**L**UMINA ALOYSIUS terræ demittit, ab axe  
 Cui defert nitidus splendida ferta Puer.  
 Quam pudibunda fuit discas frons illa; pudoris  
 Cernere quæ refugit præmia & ipsa sui.

DE EADEM EFFIGIE, *quæ primum coloribus expri-  
 menda erat in telâ: sed postea, mutato consilio,  
 ex marmore anaglyptico facta est.*

## AD B. ALOYSIUM.

## EPIGRAMMA CVIII.

**H**INC PiCTOR telis; hinc duro marmore Sculptor  
 Certabant vultus assimilare tuos.

Præ-

LIBER IV. 227

Præripuit Sculptura locum; quæstusque ciebat  
 Posthabita, afflicto pectore, mæsta Soror.  
 Parce supervacuis, solers Pictura, querelis;  
 Illa notet mendax non licet ora color:  
 Depinxit propriis satis ante coloribus illa  
 Candida Virgineo mista Pudore Fides.

*In Alchimicos.*

EPIGRAMMA CIX.

Sunt, quibus in tenues abeunt patrimonia fumos,  
 Surgat ut arcanis aurea massa focus:  
 Auri sed tanti tristes manet una Nepotes  
 Sacra quidem; miseris namque verenda, fames.

*Ad Crumenisecam.*

EPIGRAMMA CX.

Orator sacro dum pegmate devovet aurum;  
 Multa perit digitis secta crumena tuis.  
 Auxiliator ades dicenti strenuus: aurum  
 Orator linguâ fulminat; ipse manu.

## 226 EPIGRAMMATUM

Sideræ recoquitque iterum Fornacis in igne ,

Atque opibus ditat fulgida ferta novis.

Mox Pueri raptum plantis Insigne superbum

Festinat meritis imposuisse comis .

Ille sed ad pectus dum brachia nexa decenter

Flectit, & adverso lumina blanda solo ;

Attonitum prono mirari vertice credas ,

Sublata è pedibus fulgida ferta suis.

Tolle, Puer, Cœlo tua lumina : sidera reddunt

En tibi ; despectâ quod male quæris humo .

## A L I U D

## EPIGRAMMA CVII

**L**UMINA ALOYSIUS terræ demittit, ab axe

Cui defert nitidus splendida ferta Puer .

Quâm pudibunda fuit discas frons illa ; pudoris

Cernere quæ refugit præmia & ipsa sui .

DE EADEM EFFIGIE, *quæ primum coloribus expri-  
menda erat in telâ : sed postea, mutato consilio,  
ex marmore anaglyptico facta est.*

## AD B. ALOYSIUM.

## EPIGRAMMA CVIII.

**H**INC Pictor telis; hinc duro marmore Sculptor  
Certabant vultus assimilare tuos.

Præ-

Præripuit Sculptura locum; quæstusque ciebat  
 Posthabita, afflicto pectore, mæsta Soror.  
 Parce supervacuis, solers Pictura, querelis;  
 Illa notet mendax non licet ora color:  
 Depinxit propriis satis ante coloribus illa  
 Candida Virgineo mista Pudore Fides.

*In Alchimicos.*

EPIGRAMMA CIX.

Sunt, quibus in tenues abeunt patrimonia fumos,  
 Surgat ut arcanis aurea massa focus:  
 Auri sed tanti tristes manet una Nepotes  
 Sacra quidem; miseris namque verenda, fames.

*Ad Crumenisecam.*

EPIGRAMMA CX.

Orator sacro dum pegmate devovet aurum;  
 Multa perit digitis secta crumena tuis.  
 Auxiliator ades dicenti strenuus: aurum  
 Orator linguâ fulminat; ipse manu.

*Ad PONTILIANUM librorum Compactorem.*

## EPIGRAMMA CXI.

**A**Nte meos neſtas quàm tu de more Libellos,  
 Paucula te monitum, PONTILIANE, velim.  
 Ter decies primùm contundat Malleus illos;  
 Atque ferant nugæ verbera mille meæ.  
 Pulſavit validus quas Malleus, aſſue chartas;  
 Et nova commeritis vulnera figat acus.  
 Imbuat adſtriſtas generoſum gluten: aceto  
 Fac vigeant ſaltem Carmina noſtra tuo.  
 Belgicus appoſito Vitulus tum veſtiat auro,  
 Quos in Magnatum fas properare manus:  
 Sed qui, nam multi expectant, tradentur Amicis,  
 Tegmina ſint illis ex ove ſarta ſatis.  
 Cum nitidè ornaris reliquos; ex omnibus unum  
 Aſſeribus jubeo contege ſagineis.  
 Perque ſinus varios, nimirum more vetuſto,  
 Braſtea de ferro dura frequenter eat.  
 Zoïlus hoc noſtri monumentum ſumat amoris;  
 Et dona accipiat dentibus apta ſuis.



*Ad Libellos Epigrammatum.*

## EPIGRAMMA CXII.

**V**otum solvite Virginis Puello;  
Et, quò carceribus dicata primis  
Jussi vos properare, jam peracto  
Illuc carmina convolate cursu.  
Vos longus labor, & lucerna pernox;  
Vos severa domi litura preffit;  
Externo medicata purpurisso  
Non ut inficeret procax venustas;  
Cultus simplicior sed ut poliret,  
Fuci nescius exteriùque candor;  
Vos admittere lacteis lacertis  
Ut non candidus abneget Puellus.  
Quòd si floridulo benignos ore,  
Quòd si lucidulis favens ocellis,  
Vobis annuerit; piumque risum,  
Nostro præmiolum ferat labori;  
Tunc ego; Superi, valetè, dicam;  
Vestras, Cœlicolæ, tenetè sedes;  
Nam me floridulo benignus ore,  
Nam me lucidulis favens ocellis,  
Beat fidereus satis Puellus.  
Ergo composito modesta vultu,  
Sacris Carmina provoluta cunis,  
Votum solvite Virginis Puello.



# MISCELLANEORUM

## LIBER.

*Apologus. RAPA, & CÉPA.*



**R** Iphæa lento vinxerat segnes gelu  
 Jam bruma campos; & fluentes ilicum  
 Mordax capillos aura corrugaverat.  
 Saliente rivo quâ strepebat hortulus,  
 Siliquæ tenellis involuta valvulis,  
 Livens latebat altius cicercula:  
 Adversa clausis astra folliculis ferunt  
 Sapidæque lentes, Indicæque Sefamæ,  
 Veticæque Samiâ lege pallentes fabæ;  
 Et pisa, mensis non molesta Divitum:  
 Rugosa amicis occulunt glebis caput  
 Buglossa; foliis palliata turgidis  
 Capitata condit brassica albentes sinus;  
 Imoque refugit beta subsidens solo.  
 Sed nuda mediâ quæ jacebat arcâ,  
 Ventrosa nivei RAPA non patiens Jovis,  
 Diploide testam tutius Batavicâ  
 Sic allocuta dicitur CÉPAM. tuæ

Sollicita fortis me subit pietas, soror:  
 Oppressa miserum deficis, centum gemens  
 Onusta tunicis; improba, immitis, ferox  
 Natura quantam quantulae imposuit struem?  
 Suffarcinata mole vestiaria,  
 Et corticosis implicata culcitis,  
 Arcto meantem calle vix animam trahis.  
 Sed, quæ maligno fidere insonem gravat,  
 Aliquando moles ne fatiscentem opprimat;  
 Agedum: lacernis de tot injectis tibi,  
 Unam, alteramve detrahe; inque humeros refer  
 Secura nostros: sarcinae partem feram;  
 Tantumque tecum partiar libens onus.  
 Versuta stolidis CÆPA subrisit dolis:  
 Malasque fraudes sensit; atque, audi piam,  
 Dixit, Sodalem: candidam, sororiam  
 Amplector, osculorque narrantis fidem:  
 Sed quod lacernas attinet plicatiles,  
 Quas poscis, urit sæva dum plantas hyems;  
 Suspecta nobis paululum est oratio.  
 Si te salutis cura movisset meæ,  
 Illo involucra postulasses tempore,  
 Quo me, protervum sidus, æstivo Canis  
 Torrebat igne: tunc cucullos irritos,  
 Amicula, sagula, cingula, Endromides tibi  
 Totas dedissem sponte: sed nostri immemor  
 Tunc æstuosum nuda fallebas diem:  
 Amica nunc te studia; nunc pietas recens  
 Tenerum laceffit corculum: haud facile est tibi  
 Decipere cæpam: callidas cepas chlamys  
 Duplex fatetur ipsa; te nullæ satis  
 Fatuam salinæ condiant; in posterum

Larvata mitte monita; rancidulas preces:  
 Tibique nostra si placent indusia;  
 Mihi ad Kalendas illa Sextiles pete.

*Ad COSMUM III. Magnum Ethruriae  
 Ducem, cum, Senis Terremotu laboranti-  
 bus, Collegii Ptolomaei Juvenes No-  
 biles Florentiam accersitos, summo  
 Munificentiae exemplo, perho-  
 norifice exciperet.*

**R**egnator, felix cui paret Ethruria, Sena  
 Subsiluit incerto dum tremefacta solo;  
 Palladios Juvenes, Italæ floremque Juventæ  
 Ocyus ad ripas evocat, Arne, tuas.  
 Spondet ibi firmas Constantia Principis Aedes;  
 Quam trahit à Domino terra vel ipsa suo.  
 Ergo, dum lato crebescunt murmura plausu;  
 Principis atque omnes splendida facta canunt;  
 Laurigeram frontem Laurentius extulit urna;  
 Gloria Mediceæ stirpis, & orbis amor;  
 Ferdinandiaden dictisq; affatur amicis:  
 Floridus auritis substitit Arnus aquis.  
 Gratulor à serâ natum mihi stirpe Nepotem;  
 Fama, fatebor enim, quo mea victa cadet.  
 Omnibus ingenuas attollere viribus artes,  
 Primus amor nobis; gloria prima fuit.  
 Toto quæsitos huc nos deduximus orbe,  
 Quos coluit docto casta Minerva sinu.

Si

## 234 MISCELLANEORUM

Siqua superstes erat Graeae facundia linguae;

Et si quis Latio floruit ore potens,

Noster erat: per me Musis operata Juventus

Delituit segni non inhonora situ:

Per me non penitus doctae cecidistis Athenae;

Nec virtus proprias sorduit inter opes.

Tu modo, qui longè superans exempla Tuorum,

Magnanimo claros pectore vincis avos;

Macte animis: totos virtuti impende labores:

Pulchrius haud aliud, Gloria signat iter.

Romanum fuerit gentes domuisse superbas:

Virtuti gremium pandere, Mediceum est.

*De Scenico Prestigiatore ligneis simulacris  
Histrioniam exercente.*

**L**ATO Romula non Juventa Circo

Exercet jugulis, nefas, suorum

Athletas, pugilesque; vultuoso

Per subsellia nec favet lanistae.

Non certamina Retiariorum

Laudat; deliciis alit cruentis

Sonti Flavia quos arena ludo.

Subit gratior, innocens voluptas,

Breves cernere, Faginosque Pupos;

Pictis plaudere, pumilisque Mimis,

Mirâ quos regit arte Machinator,

Post proscenia qui latet; levemque

Ad nutum movet, & movet renutum.

Parvi per tabulata ludiones

Decurrunt; celeres agunt chorae;

Et

Et se tibiolis, minutulisque,  
Si res postulet, implicant lacertis;  
Nam certamina buxeos Achilles,  
Magnæ non semel effierantque rixæ:  
Tunc se verberibus petunt vicissim,  
Adnisi pedibusque, palmulisque;  
Victoresque cadunt; caduntque victi;  
Surgit aspera tunc utrinque pugna:  
Et, dum funere non cadant inulto,  
Non pectuscula consecrare pulchræ  
Cessant magnanimi, timentque morti.  
Æstu lignea dum tumultuoso  
Feruntur simulacra; dum lacernas  
Proscindunt, togulasque, penulasque;  
Nec parcit laceris furor capillis;  
Festivos referunt Theatra plausus;  
Effusis resonat Forum cachinnis.  
Hæc spectacula, scenicique lusus;  
Illos æquus ab intimo recessu  
Si quis Arbiter æstimare tendat;  
Possunt aptius erudire Romam,  
Rauci jurgia docta quam Licæi;  
Aut quæ Pythagoræ madent salivâ,  
Multo aut Crantore tussunt cathedræ.  
Namque, ut funiculis latens Choragus  
Davos, Hergasilos regit pusillos;  
Nos, humanaque cuncta sic Tonantis  
Docemur tacito subesse nutu.  
Ille fila manu tenet, movetque:  
Nos Idola pusilla, dum remotas  
Pugnaci petimus fragore terras,  
Mille & Cærula frangimus carinis,

Occulti sequimur manus Magistri;  
 Orbis qui meritas regens habenas,  
 Versat nos tenui; movetque filo.  
 Suggestu documenta si jocosō  
 Condunt talia, serioque ludunt  
 Curti, gaudia plebis, Histriones;  
 Illis Cecropii peritiores  
 Silenos cave duxeris Tyranni.\*

*Apologus. DRACO, & LIMA.*

CUM triduanè guttur enectum fame  
 Traheret egenus consilij, ac tremens DRACO;  
 Per confragrosos fortè saltus asperam,  
 Crebroque LIMAM dente distinctam videt.  
 Longas Kalendas feriatis dentibus  
 Chalybem rigentem subigit; hedinum jecur  
 Credas putasse; cereumve turturem.  
 Ut dura labiis presserat primoribus  
 Fercula; quid istuc est rei? ò sævam dapem!  
 O dentifragium; clamat, insuavissimum!  
 Dum queritur; atrum & sibilis complet nemus;  
 Excussa ab ore lima sic orsa est loqui.  
 Si me jacentem, neminique noxiam  
 Cubare, quo sum rapta, sivisses loco,  
 Non tibi fuisset pœnitendum obsonium,  
 Atque fame gravius. nosse tu poteras probe,  
 Metalla dentibus ipsa comminui meis.  
 Quid me laceassis helluo nequissime?

Escam

---

\* Sileni Alcibiadis, qui extra rudes, intus mira condebant: Vide  
*Adagia.*



Escam superbis faucibus ferrum putas?  
 Damas inertes sequere. Commotus Draco  
 Animos feroces, inquit, incassum geris:  
 Per alta nemora nobiles quæram feras;  
 Lacerata tollet tigris illustrem famem:  
 Ignava sed cum roserit primum tuos  
 Rubigo dentes; quod reor vilissimum;  
 Miseram manebit, auguror, ferus dolor;  
 Dentefque sæpius irrita optabis meos.

*De Geminâ Campanâ; Curia Romanâ  
 ad Montem Citatorium, & Collegii  
 Romani.*

**T**olluntur geminæ spatio non dispare Turres,  
 Tinnula quæ duris vestræ æra tenent.  
 Hinc, illinc multis Ephiræ nam scæta metallis,  
 Immani Chalybum pondere nola riget.  
 Celsum Romanâ caput hæc de Gymnade tollit;  
 Romanæ Themidis despicit illa Forum.  
 Utraque suppositam molem, quæ dividit horas,  
 Atque recurrenti cuspide signat, habet.  
 Hinc, atque hinc, magnæ soboles velut Ænea Matris,  
 Duplex succrescit molula, mole minor:  
 Corpore nam vasto micat altior illa; sub alis  
 Ceu sobolem implumem Regia condit avis.  
 Gregoriana tumet multis antiquior annis;  
 Sed præstat gravior mole superba Soror.  
 Quæ sociam vincat vocis modulamine, certum  
 Iudicium, dispar non finit esse sonus.

Pu.

Publica Trojugenæ curent ut commoda , fixis

Hæc Pueros horis convocat ; illa Viros.

Æris tinnitum quadrans horarius implet ;

Bis ferit in solidum malleus æra diem .

Lojolæa præit ; sed vix pulsator habenas

Colligit ; argutas cum subit illa vices .

Altera dum resonat , silet altera ; nempe vicissim

Officiis certant æra vel ipsa suis .

Perpetuo hæc liquidum sed verberat aëra tractu ;

Et sequitur facilem pulsa , repulsa manum ;

Illa sed abruptis scindit dum pulsibus auras ,

Respirat crebris sæpius ista moris :

Craffitiæ obstat solidi seu multa metalli ;

Seu Turris pulsu liberiore gemat .

Utraque dat studiis sua per dispendia vitam ,

Roma quibus terris tradere jura potest .

Illam sacra Themis libratis lancibus ornat ;

Hanc decorant artes , docta Minerva , tuæ .

Hanc ferulæ sequitur sonitus ; sed acerbins illic

Vindicis Astreæ virga severa sonat .

### *De Vetulâ à Zeuxide pictâ .*

**A**Des , jocosæ conscius lyræ , pennis

Amice Scazon purior Columbini ;

Venustularum Confitor voluptatum ;

Frontisq̃ue lenis temperator austeræ .

Non tu inficetos sæculi colis mores ,

Offuciarum delibute pigmentis ;

Viciniam nec usque poscis ornatum ,

In-

Indum monile, teniasque Belgarum,  
Tagoque multo cycladem umbilicatam.  
Non sumptuosâ incenditur tibi pectus  
Maris rapinâ; nec plicas redundantes  
Gemmante fibula colligit nitens morfu.  
Sed laude privâ clarus, & satis dives  
Domi scatente copiâ, nites cultu  
Nusquam coëmpto. te lubentiæ dulces,  
Vernæque Charites; te chorus Venustatum  
Multis refusæ perpluunt favis Hyblæ.  
Ergo canoris seu jocos ciens nugis,  
Horas inertes fallis otiosorum;  
Meridiatus ad sacri caput fontis,  
Seu stertis altum; pone blandulos ludos  
Paulisper, incipe hic novum melos: puri  
Non semper amnes; non coma viridis semper  
Cantanda pyramidalium Cupressorum;  
Crispæque pinus, & nemus capillatum;  
Argenteorum aut hospites fluentorum:  
Non decora semper graminumque, florumque;  
Dryadumque choreæ, aut musici sonus fontis;  
Gemuntque Thressis qui Sororibus trunci;  
Auræque saturæ dulcium querelarum.  
Ameniore concitatus afflatu  
Non indiferto pone nunc anum versu,  
Vitam in Tabellâ cui bonus dedit Zeus;  
Mortem à Tabellâ quâ bonus tulit Zeus.  
Inauspicatæ triste frontis ostentum  
Non dira Memphis vidit; aut Jubbæ tellus,  
Lactans arenis Diplades Libissinis.  
Hac fronte Lunam Colchicis trahit rhombis  
Locusta Cælo; Thessalisque, Marisque

Potens fufurris, noxium venenatis  
 Maritat herbis murmur, & nigros Manes  
 Formidolofis elicit fepulchretis.  
 Non croceus illi flavet, aut micans auro;  
 Nec rore crinis albicat pruinofa;  
 Non fufcus ebumum vincit; aut refert rufus  
 Roſeta flammis uſtulata nativis;  
 Sed nec vibratus chalybe; nec fluens ullus;  
 Nec tenuis errat fronte; nec ſaginata.  
 Caput facetum quas gerat comas, quæris?  
 Quas levigatis cernis eſſe piſtillis;  
 Quas Populorum ſuccinæ ferunt guttæ;  
 Gangeticarum filiæve concharum.  
 Decuſſit omnem ſylvulam capillorum  
 Inviſa tonſtrix illa, forficem occultum  
 Agens ſeneſtus; ſævus ille graſſator  
 Apeliotes, qui nemuſculum flavum  
 Ineleganti peſtinavit attritu.  
 Sed, quod tibiſque, poſteriſque venturis  
 Excire poſſit quidquid eſt cachinnorum;  
 Glabella, depilata non ſatis ducit,  
 Dediffe crines præliantibus ventis;  
 Edentula, ipſas eſt recalva gingivas.  
 Dentatiorem cuſpidem gerit telum,  
 Neptune, ſubigis quo ſalum procelloſum;  
 Et ruſticorum quo labor lacertorum  
 Iners refoſſis paſtinat ſolum glebis.  
 Nulli molares; nullus adſtat inciſor;  
 Nulliſque genuini; at, ſuperſtitem clades  
 Quem fecit, unus, omnium vices ſupplet:  
 Namque ille grandiuſculus, ferox, audax  
 Ab ore palmoſ exerit procul ſeptem.

Apicem retortum : sed picem Tarentinam  
 Fuliginosus æquat ; ut putes, fratrum  
 Lugere casus ; atque Syrmate atrato  
 Celebrare Turbæ iusta Contubernali.  
 Sed criniumque , dentiumque jacturam  
 Sarcire possunt strenuè catervatim  
 Rugæ fluentes : sinciputque , collumque ,  
 Humeros, lacertos, & genas cavernosas  
 Striata fulcis horret : ut magis turpes  
 Sint aliæ anus ; hac avarior nulla est ;  
 Loculos ubique habet : trecenti Equisones ,  
 Totidemque Strigiles inde non tamen vellant  
 Contaminati fursuris luem tetram ,  
 Strumamque , scabiemque , & Acheronticum cœnum.  
 Mentum repandum , Martiale , falcatum ,  
 Lituoque flexuosius Quirinali  
 Imos trementem traheret ad pedes frontem ,  
 Si non labantem tuberosa fulciret  
 Agnata corbis gutturi ; putes ferre  
 Quam facilè modios quatuor lupinorum ;  
 Oleive totidem continere metretas.  
 Sed gutturosi congium præit follis  
 Immane pondus manticæ , quod in tergo est.  
 Illam æstimare non decempedis ullis  
 Metator aliquis Machinarius possit :  
 Nam sternuentis perticæ specus fœdum ,  
 Bifidasque nares , & trabale portentum ,  
 Nec ipse mensor æquorisque , terræque  
 Decempedator assequatur Architas :  
 Fruticante setâ seu nemus duplex aprôs  
 Alit inquilinos ; seu loquaculas ranas  
 Lacuna biforis narium beat limo

Stagnante semper, glareâque mucosâ.  
 Ungues honestâ pactione conducti  
 Apuliæ messoribus decem fales;  
 Agrove possunt commodate Piceno:  
 Adunca præfert manibus arma Saturni;  
 Ipsâ superbit nam vetustior Phlægrâ.  
 Aures superbæ; repperit Midæ tonfor  
 Quales, capillum deglabrante volfellâ:  
 Sed longiores nequis æstimans iusto,  
 Natam Minervâ suspicetur iratâ;  
 Olli gemellos Nocturnis suis Pallas  
 Oculos habere præbuit; dies, noctes,  
 Uliginoso sed quod imbre lippirent,  
 Concinna non hoc scilicet dedit Pallas.  
 Decembre multo torridam; & gelu pigro  
 Vetulam trementem discolor tegit vestis  
 Gossipina, vario sarcinata centone;  
 Phrygiana, Bætica, Attalica, Damascena,  
 Babylonica, Tyria, Maura, Coa, Sarrana:  
 Athena novit omnia, & lacus omnes;  
 Omnis bibacem temperavit Infector.  
 Assuta pannis fuerit at licet centum,  
 Totidem patescit ostiis fenestrata:  
 Spectanda luxu nec vacat peregrino;  
 Fluidis salivarum undulata Mæandris;  
 Conchyliata pulve iusculi externi;  
 Lutiq̃ue lectis fimbriata pastillis.  
 Jocose Scazon, quid rei, quid hoc monstri est?  
 Pannosa, glabra, spongiosa, longevæ  
 Cornicis annos, alitemq̃ue Titanis  
 Egressa; pumice ficcior lacunoso;  
 Obstipa, agrotum Terminalis ut cippus;

Risus cieret illa non tibi solum,  
 Natura tribuit cui tenerrimum splenem;  
 Elegos sed ipsos; nubilus dolor frontem  
 Quibus ardeat, æger & inficit genas luctus,  
 Vultus juberet explicare contractos.  
 Quin sævus ille tetricæ parens scenæ,  
 Grandiloquus ille, qui dolos Novercarum  
 Novit cruentos, Tantalæ & genus dirum,  
 Sontesque Thæbas, Atrei & truces mensas,  
 Ferox Jambus ille, aniculæ spectrum  
 Si turpe videat; immemor Micenarum,  
 Hecubæque tristis, Tereïque, Prognēsque;  
 Gravem cothurni calceum levi socco  
 Permutet ultrò; Bergomi atque agens scurræ,  
 Aut Morionem saltitans Acerranum,  
 Valere jubeat Ædipum Sophoclaeum.

*Apologus: SICILIA, & NEPTUNUS.*

CUM fortè currus vectus undarum Pater  
 Scyllæa rapidis saxa lustraret rotis:  
 Regina Siculi Virgo dominatrix freti;  
 Tridentis Hæres, siste præcipites equos,  
 Clamabat, ægræ supplices audi preces,  
 Miseræque voces ultimas Sicania.  
 Felix abunde forte vivebam meâ,  
 Cum penitus olim stringeret nexam sibi  
 Tellus agrorum dives, Herolim parens;  
 Natura cellis quam coronat Alpibus,  
 Geminique fovea cingit hinc, illinc maris,

## 244 MISCELLANEORUM

Littus beatum, Patre regnatum tuo.  
 Tu nulla veritus jura, cautes asperas,  
 Vetitasque trifidâ cuspide ingressus vias,  
 Regionis almæ fœdus antiquum, gravi  
 Dirimis ruinâ; meque luctantem diu,  
 Brachiaque ter, quaterque tendentem irrita,  
 Littoris amici sævus abrumpis sinu:  
 Invita; Superi, vos ego testes voco,  
 Et te relictam, Dardani tellus; tuis  
 Divellor ulnis: præda tunc rapacibus  
 Relinquor undis: æstuat, mugit ferox  
 Hinc, inde pontus; siqua terrarum, salo  
 Subeunte, superant hætenus vestigia,  
 Scopuli minaces obsident; cautas parum  
 Ubi Scylla frendens canibus exercet rates.  
 Te per ego robur fuscinæ tricuspidis  
 Adjuro supplex; redde complexus mihi  
 Felicis oræ; nocte Rhæginum, Pater,  
 Latus Peloro: quo jubente diffusa  
 Cessere, coëant vasta nunc iterum juga;  
 Quæ nos removit, illa restituat manus.  
 Si vota miseræ despicias; saltem vadis  
 Totam refusis merge; disjunctam juvat  
 Perire: quamvis, Italis exul plagis,  
 Jam perii. amarus non tulit quæstus diu  
 Rector profundî: mitte singultus graves,  
 Luctusque, Virgo, dixit. Hesperis, pudor!  
 Cum tu potenti mancîpata degeres,  
 Superba, nec te pœnitet, fastidia  
 Heræ ferebas fastuosæ; sordido  
 Præstare jussa auctarium calcaneo  
 Ancilla vilis: Nomen obscurum tibi;

Splen-



Splendorque nullus; nulla majestas erat:  
 Sed te; quod exprobare non cessas mihi,  
 Tridente postquam victor asserui meo;  
 Regnare primum discis; Æternum decus;  
 Illustre nomen; principem locum tenes:  
 Hæc odia tecum; hic ille Neptuni fuit  
 Violare rerum jura non veritus furor.  
 Ne querere Italiam commodo amissam tuo:  
 Novumque ferre disce fortunæ jubar.  
 Præstat modestis imperare finibus;  
 Celebritati latioris Imperj  
 Quam, nobile licet, addere corollarium.

*De PLINIO in Vesuvio Monte  
 misere absorpto.*

**P**Arthenope, nitidi sedes placidissima Veris;  
 Alma parens glebæ divitis, alma Virum,  
 Ne querere, ignivomo nimium vicina Vesevo,  
 Quòd multum elisis æstuet ille jugis.  
 Tam prope nam resonis fremerent nisi Tartara flâmis,  
 Hospita te Cælum credere turba queat.  
 Ecce tuos scandit, Floræ spectacula, montes  
 PLINIUS, in pœnas impiger ipse suas:  
 Vulcanum servare fidem stupet ille Lyæo;  
 Et prædatrices degenerare faces.  
 Pampineus pœnâ collis lascivit in ipsâ:  
 Plaudit, Bacche Pater, dum furit, ille tibi;  
 Occultæ Senior vestigat semina flammæ;  
 Et mortem infaustâ provocat arte suam.

Nam dubio, fallente gradu, deceptus hiatu,  
 Flammarum cæco turbine merfus obit.  
 I nunc; & totas Veseve, effunde procellas;  
 Non aliâ tantum clade nocere potes.  
 Elysiis jamque ille parat succedere Campis,  
 Misceri & doctis nobilis umbra choris:  
 Verùm ubi Parthenopes lætos circumspicit agros,  
 Hæsit, & immoto substitit ille gradu:  
 Mox ait: Elysiis nequidquam quærimus hortos;  
 Elysium præstent hæc mihi rura nemus.  
 Hæc fatur: tunc monte super levis umbra vagatur;  
 Errat odoriferis umbra decora plagis.  
 Hesperios inter fortunatissime montes,  
 Invidiosa novæ munera sortis habes:  
 Namque extra Senis incauti complecteris Umbram;  
 Et reliquum tanti Funeris intus habes.

*A Fure præreptum dolet Infanti DEO  
 paratum munusculum.*

**V**irgatâ calathus nitens genistâ,  
 Quem solers mihi texuit Menalcas,  
 Pastorum decus, optimus Menalcas,  
 Servabat pyra, caricasque dulces;  
 Mensæ quidquid & afferunt secundæ;  
 Strenam Bethlehemio novam PUELLO,  
 Quem nudum tenues tegunt Aristæ;  
 Quem matris teneri sovent amores:  
 Votivam tibi strenulam, PUELLE,  
 Cui brumâ teretes tremunt lacerti;

Orbis

Orbis pondere nec tremunt lacerti;  
 Cui dulces lacrymis tepent ocelli;  
 Binis solibus & nitent ocelli.  
 Lento cistula tortuosa junco  
 Condebat lapidas placentularum  
 Scriblitas, globulos, levesque spiras;  
 Et pistacia saccharo Sicano  
 Penulata; favosque; pallidæque  
 Liguatos violæ, rosæque succos,  
 Quos industrius alveis trecentis  
 Densat melle Ligur tenaciori:  
 Non deerant melimela; parricidæ  
 Nec quas languidus è jugis Idumes  
 Prospektat caryotides Viator;  
 Et passî æstiferum diem racemî;  
 Et cotonea saccharata, thecis  
 Aÿgens quæ tegit Asculum rotundis.  
 Et mustacea, collibus beatis  
 Minax dulcia quæ, Veseve, mittis;  
 Indo quæ piperata cinnamomo,  
 Doctas nobilium gulas Quiritum  
 Tergent, & Latios domant Decembres.  
 Pomorum genus omne, quæ superbos  
 Phæacum, Hesperiaque, Medizque  
 Gravant pondere purpurante ramos;  
 Et, frustra Oceano vetante, terras  
 Quæ plusquam Herculeus labor Latinas  
 Orâ vexit ab usque Lusitanâ.  
 Condi hæc vimineo reor quasillo  
 Dum Manuscula; prohi dolor! miscellus  
 Inveni omnia plena aranearum.  
 Sed bellaria quisquis abstulisti,

O sævam nimis, improbamque dextram!  
 Diris non ego te petam malignis;  
 Hanc mandare licebit ultionem  
 Blando, cui Xenium rapis, PUELLO:  
 Cru delem nimis, improbamque dextram  
 Id emnem, puto, non feret PUELLUS.

*Apologus.* MARMOR, & LAPIDES.

**I**Mmane pondus marmoris vasti, rudis,  
 Plaustrum ferebat gravibus ærisonum rotis,  
 Strepente latè scilicet viciniâ.  
 Cui saxa longo nota contubernio,  
 Solo relicta quæ jacebant turpiter;  
 Quò, stulte, dicunt, tendis; aut quò, transfuga,  
 Oblite raperis patrii fidem jugi?  
 Inominatam, sæve desertor, fugam  
 Quò tandem adornas? Siste paulisper gradum.  
 Hic flore gemmans herbidum ridet solum;  
 Et rore læta germinant novalia:  
 Hic tortuoso latice lascivit procax,  
 Ripæque trepidus rivus alludit suæ.  
 Hic hospitalis esculus; nutrimum  
 Hic sidera æstiosa defendit nemus,  
 Imbresque sædos prohibet hiberni Jovis.  
 Sed, quò sinistrâ tu recedis alite,  
 Diversa fata, flebilem sortem feres.  
 Cæco feroces impetu Artificum manus  
 Subigent protervum; ferreisque malleis  
 Tudent superbum; durior durum truci

Do-

Domabit hostis verberare: agnosces statim  
Quid æra dissent cautibus: minax chalybs  
Longâ fruetur clade: jam poscunt tuas  
Scalpella venas: vulnerata corruent,  
Tegentque membra cæsa frustatim solum.  
Tunc vero patriæ rupis hospitium verus,  
Veteremque sortem corde mutato gemes.  
Cum plura fari tenderent; marmor gradum  
Cohibens parumper, dura me durum, refert,  
Metalla vincent; impolita nobilis  
At vero postquam membra comminuet labor;  
E clade nomen clarius surget mihi;  
Rudisque avito Monte quod fueram filex;  
Imago dicar: seu Cyclopæo Faber  
Referre torvum jusserit telo Jovem;  
Seu quem Noverca devovebat impotens,  
Cum traheret Erebo victor anguineum Canem.  
Cum jurgioso vulgus attonitum Foro  
Me fronte celsâ viderit minarier;  
Sollicita cum me turba jam Deum colet,  
Venerata nostrum supplici Numen prece,  
Largas Sabeæ Messis & fundens opes;  
Tunc Malleorum proderit multum mihi  
Ictus subisse: tunc dies inglorios  
Egisse serus nempe vos tanget dolor.  
Segni negarunt Cœlites socordiae,  
Certam labori quam pararunt, gloriam.

*Apologus*; BUBULCUS, & JUPPITER.

**B**Oves agebat Pastor armentarius  
 Ad nota lentos stabula, cum festum diem  
 Purpurea vitreo conderet Tethys sinu.  
 Sed rite dum recenset inductum pecus  
 Septis avitis; cornibusque singulos  
 Lustrat; resentem rusticis tectis procul  
 Abesse vitulum sensit: ergo amens metu  
 Herbosa relegit pascua, & longos ciet  
 Per tonsa fletus gramina; huc, illuc gradus  
 Molitur æger: anxius valles, jugum,  
 Dumeta, fontes, arbores interrogat:  
 Nullas abasti pecoris at reddunt notas  
 Dumeta, fontes, arbores, valles, Jugum.  
 Ad astra versus (astra surgebant polo  
 Jam multa) rerum Juppiter, dixit, parens,  
 Vituli mihi si reddis aspectum mei,  
 Lactentis hædi victimam lætam feres.  
 Vix triste votum nuncupavit inscius;  
 Adest minaci fronte cum torvus Leo,  
 Semesa vituli frustra, & effusum, nefas,  
 Lambens cruorem: bellæ vultus truces  
 Pastor tremiscens, voce compellat Jovem  
 Tremente rursus: Sortis haud gnarus meæ,  
 Nocitura petii, fateor; ast hædum prius  
 Si tibi sponendi; nunc Leonis efferi,  
 Pater, voraces fugere si fauces licet,  
 Habeto taurum. grande sic auctarium

Sol-

Solvit Bubulcus; & vicem doluit suam,  
Qui fatuus esse nesciit miser semel.

*In Funere PATRIS ANTONII VIERÆ  
Concionatoris longè clarissimi, qui annos  
nonaginta natus in Brasiliæ  
•diem obiit.*

**N**ULLIS ergo silet silendus annis  
Flos ille eloquii, disertus ille  
Nestor Lusiadum, Pilij senectam  
Æqui finibus æmulatus ævi: \*  
(Vano Græcia nam facessat ausu,  
Quæ triseclisēnem vocat, canitque.)  
Favos Cecropios, Hymettiasque  
Opes si sapit, Atticumque nectar  
Parens Antilochi; VIERA sacro  
Tanto dulcior ore mella fundit;  
Actæum superant thymum, remotis  
Quantum quæ procul advehuntur Indis  
Cannæ Saccharides; referciuntque,  
A magno positos Ulysse muros.  
Sed non dulcisonos modos VIERA  
Solùm Nestoris assequurus, addit  
Ignitas rapidi faces Periclis;  
Salesque, & Veneres Isocrateas;

Grajæ

\* Nestorem nonaginta annos vixisse, ejusque ternas ætates tri-  
ginta annorum spatio per evolutis esse concessas, Auctor  
est Lactantius.

Graejæ quidquid & tulistis unquam,  
 Aut adhuc Latiae ferunt Athenæ.  
 Quodd si flexanimus Senex Attriden,  
 Et prolem Thetidis truce[m] pudendis  
 Rixis compulit abstinere; luctum  
 Nec producere Dardanis Puellis:  
 Hic fidens animis, potensque fandi,  
 Reges \* Hesperios propinquiore  
 Nexos fœdere non levis Scamandri  
 Artis finibus explicare fasces;  
 Nullo margine sed procul refuso  
 Concordes docet imperare mundo.  
 Et, si Nestoreis Minerva præsens  
 Dictis annuit; huic amica Pallas  
 Longè clarior adfuit; Tonantis  
 Pallas Filia celsa grandioris,  
 Gustavi \* Soboles; frequente Româ,  
 Multa & Romulidum Patrum corona,  
 VIERÆ meritos ciere plausus  
 Vultu prodiga sæpe liberali;  
 Dextram & tendere nobilem, relicto  
 Regni pondere ponderosior.  
 Demum si titulos Pylo superbos  
 Nestor contulit, inclytumque nomen,  
 Surdâ quod prius Oppidum latebat,  
 Nullis laudibus, & favente Famâ;  
 Non secus Brasilis VIERA clarum  
 Nomen conciliat, decusque terris:  
 Quæ nunc exuvias beata tellus,

Et

\* De utriusque Indis eidem Principi subijciendis differuit: Hispania,  
 & Lusitania Regibus nova cognatione conjunctis.

\* CHRISTINA Suecorum Regina P. VIAM studiofissima.



Et magnos cineres fovens, tēgensque,  
Attollit caput; Et Peruviorum  
Gazis non, reor, invidet superbis.

*Apologus* . HOROLOGIIUM SOLARE,  
& HOROLOGIIUM MACHINARIUM.

**H**Inc levigato marmor æquatum sinu,  
Tuæque Mimis, mensor astrorum, viæ  
Umbra notabat indice errantem diem:  
Vocalis illinc aderat, & pulsu frequens  
Moles citatam docilis horarum fugam  
Monere: sævis quam ferox conviciis  
Sic increpabat Solis interpretes lapsi.  
Longâ Britannus te licet curâ Faber  
Limarit; annos pervigilque perpetes,  
Axemque, trochleamque, denticulos, rotas,  
Mirâque libram, cyclicamque lingulam  
Æquarit arte; claudicas tamen brevi  
Vitiosa cursu; prodis & fluxam fidem.  
Immodica labi, contumax frænos pati,  
Diem rotatu sæpe præproperum rapis:  
Ignava lento sæpe dum torpes gradu,  
Horas rebelli sistis invitas morâ.  
Infida, fallax, sædifraga, centum dolos  
Versare docta flexuosis orbibus,  
Redire stultas nempe ad Artificis manus  
Cogeris in annum septies: dispendio  
Certoque vendis vafra tinnitum brevem:  
Servire pompæ scilicet solûm juvat

Mi.

Micante Zonâ pendulam: crepundia,  
Bullasque turbæ sufficis comatulæ.  
Phænissa non me tænia, emptitium decus,  
Aurumque tenui temperatum bractea;  
Sed usque certus, integer, recti tenax  
Commendat usus: ille me coarguet,  
Falsumque dicet nempe, qui falsum potest  
Dixisse Solem. Jurgia haud ultra tulit  
Ærata moles; dentibus totis fremens,  
Stridente tales reddidit nolâ sonos.  
Tu certus index, fateor, agnatum doces,  
Signalque Solem; gemmeo dum luteos  
E Gange crines tollit, & curru polos  
Æquat citato: fessus Hesperio latus  
Sed amne postquam lavit, & subit nigris  
Nox atra bigis, rore mortales rigans  
Oblivioso; nulla tunc fides tibi:  
Tunc certus ille monitor, & recti tenax,  
Gnavusque cessas: ferias longas agis;  
Et iusta soli solvis atratus tuo.  
Sed me laboris improbi expertem videt  
Nec Phæbus unquam; tacita nec Phæbi Soror.  
Glomerata rapior usque: naturâ loquor  
Tacente sola; nulla properanti quies.  
Loquaciorem ipsa faciunt silentia.  
Ergo superbas pone nequidquam minas,  
Mutilasque laudes: dona divisit Deus  
Nam nostra sapiens: quoque ogemus mutuò,  
Præsidium in alio est; tu fidem certam tenes;  
Ego longiora spatia; nocturnas vices.

*Ad Eminentissimum Principem*

CAROLUM CARDINALEM BARBERINUM;  
*exquisitâ librorum Copiâ, Barberinis  
formis impressâ, Authorem ma-  
gnificè munerantem.*

O Lux Romulidum, decusque Patrum;  
Cujus Pieriis sacrare chartis  
Conatus titulos, remotioris  
Quotquot mentis in intimos recessus,  
Et sacraria Pectoris repositi  
Præstans contulit, abdiditque virtus;  
Hæsi ter, quater, affluente circum  
Novarum segete hinc, & inde laudum.  
Qualis molliculos Puella flores  
Prato vellere dum flagrat virenti,  
Nunc illos studiosa, nunc & illos  
Incerto probat, eligitque voto;  
Compos nullius interim: pererrat  
Flores sedula cura dum per omnes,  
Curas copia præpedi, manusque;  
Nec legit teneros Puella flores.  
Te Cælo super aureis quadrigis  
Attollit Pietas; amorque recti;  
Et blandi Gravitas Comes pudoris.  
Tu quidquid Latîis, Achaïcisque  
Ætas inseruit vetusta chartis,

Do.

256 MISCELLANEORUM

Docto digeriſ aſſequutus ore.  
 Nam quòd Palladias benignus artes  
 Expando foveas ſinu, juveſque;  
 Hoc tu nomine nos ſcias ademptum  
 URBANUM viduiſ negare Terris.  
 Nec me præteriit benignitatis  
 Rivus aureus ille; BARBERINIS  
 Formiſ edita, ſplendidoque cultu,  
 Bonarum monumenta litterarum  
 Quem diſtendere latius minutos  
 Conclaviſ foruloſ monent, jubentque.  
 Quas tibi meritiſ viciſ rependant,  
 Noſtræ, CAROLE, non habent Camenæ:  
 Quod ſolùm tenuiſ habent Camenæ;  
 Quot volumina docta tu dediſti;  
 Incultoſ, reor, inveniſtuſloſque,  
 Tornatoſ Criticum parumque ad unguem,  
 Tot tibi Hendecaſyllaboſ remitto.

*De Myrmecidiſ Statuarii Quadrigâ,  
 quàm extentiſ aliſ muſca  
 cooperiebat.*

Q Uadrigam ſpecularibuſ rotatiſ  
 Ægre quam videas; ſemelque viſâ,  
 Hoſpeſ, deſjeriſ. ſtupere nunquam;  
 Inſani patiens Faber laboriſ,  
 Ex Indo ſecuit toreuma dente.  
 Hac craſſum mage Mentorſ lacernâſ  
 Ramentum tegit; Artiſex Caryſtiſ

Picta frigora cum severiori  
 Hinc, atque hinc parat expolire cœlo.  
 Sentire hæc culicem potest volantem;  
 Quin & papilionis acta pennis,  
 Ad Lunæ juga fabulosa posset  
 Audaci Comes ire Luciano.  
 Rubescit folio tenaciori  
 Rosarum coma odora blandularum,  
 Veris delictum elegantioris.  
 Agellum magis occupat recentis  
 Flos nardi, violæque, amaraculque,  
 Aut quæ picta per arva mollicello  
 Crescunt tenuia lilieta filo.  
 Majores maculæ crepusculorum,  
 Cum serum jubar, Occidente Sole,  
 Longas montibus explicat tenebras.  
 Offensæ magis intumescit undæ  
 Bulla; purpureos tegens Tyrannos,  
 Bombix viscera latius resolvit.  
 Sed si parva; tamen venusta, & omnes  
 Tantillo in folio refert lepores,  
 Omni candidior nive est, & omni  
 Cycno, marmore, lilio, ligustro;  
 Atque ipsâ quoque purior columbâ,  
 Cum latentibus hinc, & inde pennis  
 Haurit lucidulos aprica Soles;  
 Aut ripâ viridante cum nitentes  
 Mundi gurgitis arbitratur undas.  
 Quam bellè radios leves rotarum,  
 Et axis grave pondus, apsidemque, &  
 Temonem tulit artifex trabalem!  
 En curru super insidens Magister

## 258 MISCELLANEORUM

Longis quadrupedum ferociorum  
 Ora fervida temperat lupatis:  
 Et torto male fulgurans flagello,  
 Assurgit, fremit, ardet, in tremenda  
 Pronus verbera pendet: at jugales  
 Amico juga delicata collo,  
 Et legem rigidi ferunt capistris.  
 Celsa argenteus humor ora lambit,  
 Et per colla fluens eburna, molles  
 Cervices juba dividit, decorâ  
 Per latos humeros & errat umbrâ.  
 Excudant alii Corinthiorum  
 Cœlo mollia signa doctiori;  
 Jugo Mulciber & gemente totis  
 Lassetur Liparæus in caminis;  
 Insano ut paret Effedum Gradivo;  
 Sive belligeræ ægidem Minervæ;  
 Malarumque venena viperarum,  
 Et squamas liquido exprimat metallo, &  
 Tortis Gorgona crinibus revinctam:  
 Vulcanum, Steropemque, Mentoremque  
 Pusillâ Faber hic præit quadrigâ.

*Apologus.* HIRUNDO, U AVEs.

**C**Um prima lini femina inverso solo  
 Veteres Coloni traderent; præfagiens  
 Clades futuras, tristis ingemiscere  
 Visa est hirundo; & flebiles voces ciens,  
 Sic alloquuta dicitur pictus aves.

Agi.

Agite, Sodales; turba confertim, ocyus,  
 Huc omnis advolate: sementem impigris  
 Eruite rostris noxiam: decerpite  
 Invisa properè grana; quæ vobis gravem  
 Olim ruinam, Dii quod avertant, ferent.  
 Illam monentem sana desepxit levi  
 Caterva fastu stulta: nam, minutulum  
 Ecquid nocere semen, ajebant, queat?  
 Simul & vetusta tecta sylvarum, domos  
 Notasque Dryadum remigrant; cantu dies  
 Falluntque longos. interim lini recens  
 Austri tepentis flamine herbescit seges.  
 Sapiens hirundo rursus huc, illuc vocat  
 Temere vagantes: densa depascat cohors  
 Lascientis herbæ primulas frondes, monet;  
 Certam pigellis nempe perniciem fore,  
 Inulta si grandescat in messem lues.  
 Sed surdo, ut ajunt, fabulam: ut supra, modis  
 Monitrix hirundo, vultibusque incommotis  
 Irrisa passim. simplicem vocant, rudem,  
 Meticulosam; gentis ut probum suæ,  
 Inauspicatum atque fugitant piaculum.  
 Tunc illa sociis nunciat longum vale;  
 Saltusque patrios deserens, Urbes petit:  
 Ibi celsa tecta prævolat, gyro redux  
 Fallente semper; cingens loquacibus  
 Nidisque pabula, collè auratas trabes.  
 Jam jamque lini rusticæ vellunt manus  
 Fruges adultas; carminatas pectine,  
 Rhombi fatigatasque flaminei rotæ,  
 Quas in dolosa rētia labor villicus  
 Abire cogit; alitum longum malum.

Nam mille pedicas, mille tendiculas brevi,  
 Passique laqueos, Aucupes ditant lucro;  
 Simulque recreant; ultimisque hirundinem  
 Monuisse vera prædicant clamoribus:  
 Quæ, marmorata dum frequentat atria,  
 Aedesque cellas divitum; teruntii  
 Tricas suarum non facit tribulium.

*Fabula de Bambalione.*

**B**ambalio, nomen bardus ingenio suum  
 Indeptus, aridum licet cassæ nucis  
 Cerebro putamen non adæquaret levi;  
 Illa tamen ventosa, prætumidum jecur  
 Dulci trahebat ebrius philautiâ.  
 Sibi ipse soli nempe Tiresias sapit;  
 Umbras inanes, cæteram turbam putat;  
 Vappasque, fungosque; mera sæcli incommoda.  
 Humana vecors nec sugillabat modò,  
 Thraasonicis plus impudens minaciis;  
 Sed, quæ Sator, parensque naturæ Deus  
 Exegit ad superni amussim consilij,  
 In jus vocabat sannio plenus sui,  
 Inaniarum scilicet; nullis caput  
 Jugeribus expiabile ellebori satis;  
 Nullisque monstrum Februis lustrabile.  
 Fagineus iste Momus Urbi proximos  
 Surgente in hortos verspere itabat frequens:  
 Nam volupe fuerat, algidis Favoniis  
 Pulmonis atri ventilare sepias;



Famemque commodâ ambulationiculâ  
Excire; posset quò saburrare oppidò  
Voraginosi ventris Euripum gravem.  
Per culta glebæ viridis infaustos gradus  
Temere ferenti confitus cucurbitis  
Patescit hortus. Indicam, Niloticam  
Videt, Sabellam, Turcicam, Magnesida:  
Aderat sativa, fossilis, capraria,  
Striata, lævis, corticosa, ductilis,  
Cum sessiliqûe pergulana, tortilis,  
Anguina, turbinata; quæque erraticis  
Reptat flagellis; quæque, claviculas agens,  
Aspera tenaci prensat ungue rudera:  
Vernacula aderat, pensilis custos salis;  
Bacchi futura & hospita lagenaria.  
Cucurbitarum vulgus omne, cognito  
Bambalione; (nempe grandescat mihi  
Hic etiam oportet, turgeatque oratio)  
Bambalione vix, ut ajebam, procul  
Ventrosa viso turba surgit illico;  
Et prona curvat signa; Centuriæ præest  
Nempe ille Chiliarcus; ut qui regiam  
Collo decenter insitam ficulneo,  
Majusculam, Prætoriam, Stratioticam;  
Quâ vacua Regna nec Magis Democriti,  
Circumferebat arduus cucurbitam.  
Sed ille sibi medullula est mentis bonæ;  
Jecur Thaletis, corculumque Socratis;  
Merum salillum. serpere errantes solo  
Ergo rotundas conspiciatus filias  
Oleris pusilli; vah, malum! insaniam,  
Exclamat. ut ne caulis exilis ferat,

## 262 MISCELLANEORUM

Tenerrimusque ponderosa germina?  
 Jacere terræ quæ necesse postmodum  
 Noctes, diesque ventre sit inglorio?  
 Apage stuporem inscitiae. sic pejerat;  
 Gressus simulque iratus aliorum moyet.  
 Vix paululum processerat; Caelo Nucem  
 Cum fronte celsâ surgere intonsam videt.  
 Procera multum planta; sed minusculos  
 Fœtus ministrat, tunica quos obit triplex.  
 Callosa prima est cortice ex herbaceo;  
 Timenda noctu turba quo Lemurum nigras  
 Manus colorat: mox subit putaminum  
 Carina duplex: hanc aquis jaciens Puer,  
 Ludicra & aptans hinc & inde suppara,  
 Brevi catino simulat Actiacas rates;  
 Quamvis nec ille simulat Actiacas rates;  
 Nam turba quem vocamus Oceanum rudis,  
 Brevis est catinus; & nucum putamina,  
 Altis minantes puppibus Liburnicæ.  
 Demum latentes nucleos membranula  
 Mentita tenues obsidet subuculas.  
 Loculos quaternos, limitum vindex, tenet  
 Lignosa sepes; regna partitur pari  
 Utrinque vallo clausa; grandiusculos  
 Ultraque fines porrigi fratres vetat.  
 Ubi vidit altis, parvulam prolem, nuces  
 Pendere ramis; hui, feroculus refert  
 Bambalio, rem ridiculam! obesa, prægravis  
 Frugesne ut arbor tanta tantillas ferat?  
 Istos lacertos par erat cucurbitas  
 Fulcire; agreste ut nucleos leves olus  
 Melius tulisset, scita Cælestis fori

Sic

Sic fatuus ille Censor, Ædilis novus,  
 Et jura summi despiciit Citorei.  
 Superos cachinnis dum laceffit improbis,  
 Frontem impudentem languidus gravat sopor;  
 Rabiosus illum five conciliat furor,  
 Et lassitudo; five amurca phlegmatum,  
 Fuligionosis bulliens præcordiis:  
 Ergo, ut sub altâ fronde constiterat Nucis,  
 Illius ad umbram sternitur; trunco simul  
 Cunctis reclinat debitum Diris caput;  
 Versâque sursum fronte, ronchissat probe.  
 Circum, loquaci ludibunda sibilo,  
 Strepebat aura; quæ juglandis obvias  
 Lascivâ dum pererrat, & motat comas;  
 Celso revulsus nucleus ramusculo,  
 Recto volutus calle; seu casus tulit;  
 Seu consilij vis altior; nares ferit  
 Bambalionis; nempe peccabat magis  
 Quâ parte Nebulo: qui, sopore ad ultimam  
 Thulen remisso; Juppiter, clamat, malum!  
 Depulsor; Averrunce, succurras, Pater.  
 Dum furere pergit; Setaboque rivulos  
 Fluidi cruoris excipit sudario;  
 Generosus ille nucleus, pedes prope,  
 Jacere visus. excidit vultu color;  
 Dirigit ætutum; & femur cædens manu;  
 Commeritus, Hercle, dixit, has pœnas tuli;  
 Quem non, pudore fronte rasâ funditus,  
 Impingere dicam puduit Authori Optimo.  
 Apage, genus Titanium; nugas meras:  
 Nam si tulisset ligneas cucurbitas,  
 Quæ me gravi mactavit infortunio,

Jaculata fruges arbor hæc minuscultas;  
 Numerò perieram: jam mea transegerat  
 De pelle pellio. retexo perperam.  
 Nunc dicta, mentis sanitati redditus.  
 Bonus ille cuncta providè exegit Deus:  
 Ego stipes, agri terminus; brutum pecus;  
 Homuncionis umbra, Margites, culex,  
 Bambalio purus. sic loquutus in viam  
 Se, luce dubiâ, conjicit modestior.  
 Dormivit altum, naribus catapasmate  
 Noctu obvolutis; plurimos sodalibus  
 Ritusque nasus mane cretatus dedit.

*Apologus. MILES & TUBA.*

**M**Artis secutus aleam miles gravem,  
 Sub asperis jam pellibus transegerat  
 Hyemes frequentes; vulnorumque emblematis  
 Illustre pectus inquinarat splendide:  
 Labore, & armis fessus haud quidquam tamen,  
 Indignum! honestæ rettulit mercedulæ.  
 Ergo educatus liberè, clarus domi,  
 Honoris arces invias postquam sibi;  
 Canosque premere cassidem ingratam videt;  
 Prudens Gradivi sterile non ultra vovet  
 Arare litus, irrigandum sanguine.  
 Quin immo flammis tradere obtenta undique  
 Invisa statuit arma; & aggestas simul  
 Litare Nemefi sarcinas Martis juvat.  
 Nec mora: capaci subdialis atrio

Col-

Collucet ignis: huc acinaces jactat,  
Pylocastra, bolides, fistulas, falcunculos,  
Cum plumbeâque glande restes igneas,  
Arcus, pharetras; omne telorum genus.  
Illuc sonoram conjicit demum tubam:  
Formidolosâ quæ favillis proxima,  
Quo nempe pœnas crimine has tanto luam?  
Commota dixit: non mihi ferro agmina  
Adaperta, tristi clade sternuntur solo:  
Fugax per auras non phalanges obvias  
Tumultuosâ nube missilium peto:  
Quæ vulnera tulerim, ostende; quas letho nocens  
Dederim catervas: imbui cruoribus,  
Ferroque latebras pectorum scutarier,  
Non esse partes tu probè nōscis meas.  
Sublata, miti vel quiete perfruor,  
Tibicinis humeris; integro aut dulces sonos;  
Aurasque tantum serio. Non voces tulit  
Miles dolosas. igne tu, dixit, magis,  
Nocesque ferro; quam vocantem scilicet  
Solùm secutus ignis, & ferrum nocet.  
Tu corda crebris suscitans clangoribus  
In acerba trepido fata subsultu rapis.  
Ripæ cruentis decolores amnibus,  
Excisa muris oppida, incensæ domus,  
Aggesta campis & quot horrent funera,  
Tua sunt. scelestas persequi clades grave est;  
Jubere gravius. i, ferox; ultricibus  
Liquesce flammis; auribus murmur meis  
Non dulcius datura; quàm, stridens focis,  
Cum querula sonitus nempe non reddes tuos.

*Apologus: EQUUS, ASINUS,  
& MERCURIUS.*

**E**Quus, & Asellus de indolis præstantia  
 Rixam ciebant, Arbitro Cyllonia.  
 Equus superbâ fronte sic orsus prior.  
 Rivalis iste meus, inertia typus,  
 Solo ferox, tumenſque ſuggeſtu aurium;  
 Demens equinae granditatem deſpicit,  
 Laudeſque gentis. magna titulorum ſeges,  
 Debere longum fuſtibus ludibrium;  
 Quernoſque baculos, ſaginoſque ſingulis  
 Perfringere horis quattuor: ſummum decus,  
 Agnatione ſcipiones nobili.  
 Cute ſaxeâ contingere; Herculeæ labor  
 Domare clavae quam fuſſet irrius:  
 Quod ut juberet excidiſſe callida  
 Miror Novercæ: parcere anguineo Cani,  
 Poteratque monſtris illa contenis; cute  
 Bellumque in unâ mittere in compendium.  
 Sed illa, Thuſcis inferenda annalibus,  
 Laus altera ſtupidi pecoris; ignobiles  
 Subire dorſo ſarcinas ultroneo:  
 Medas per urbes ire clitelarium,  
 Coſtas onuſtum calce, cæmentis, pice:  
 Humeros catervæ vel locare Villicæ  
 Male quæ manu, ſerulæque funalem regens,  
 Inepta crebro membra ſuccuſſu quatit;  
 Lutoque riſus merſa puerorum ciet,  
 E calcitrone devoluta ſtrenuo.

Hæc

Hæc decora jactet, venditetque plurimum  
Auritus iste quadrupes molarius:  
Equina namque pluribus præconia  
Censere, Maja nate, me multum piget.  
E gente nostra Cyllarus, Xanthus fuit;  
Nosterque Pegasus ille, Castaliæ Pater  
Alatus undæ: quamlibet longum moror  
Quid hæc minoris æstimanda? Lucidum  
Radiantem curru quod ferat Titan diem,  
Honor est equinus. Fabulosa forsitan  
Commenta sed hæc dixeris: Mavortios  
Sed nunc honores disce; quâ nostrum genus  
Primâ superbit laude. me pugnas juvat  
Miscere celeres; pulveremque bellicum  
Efferre, pulsu præliantis ungulæ.  
Clamore Asellus hic rudens incondito;  
Huc te volebam, Pegasi Nepotule,  
Xanthique, dixit: Mercuri, longas strophas  
Non ego, Forique fimbrias Asiatici,  
Ut iste, sector; lege Spartanâ brevis,  
Pressusque dicam. quod trucem Martem ferat,  
Protervus iste debet extincto mihi:  
Equos in arma Timpanum nostro vocat  
Corio laboratum: improbus lacessere  
Audetque vivum, pelle qui claret meâ?  
Dixi. libratibus partibus, Caducifer  
Judex vocatus hanc tulit sententiam.  
Orbem rotundi post peractum sæculi,  
Uterque rursus huc redite: nam petit  
Lis tanta curæ, temporisque plusculum.

*Apologus. CAMELUS, & JUPPITER.*


**T**RISTI Camelus æger invidentiâ,  
 Orasse fertur talibus summum Jovem.  
 Cum me nec altæ molis amplitudine,  
 Nec Taurus æquet viribus; frontem, Pater,  
 Tamen ille cornu utrinque munitam gerit;  
 Quod pegma formæ servit, & tutamini.  
 Mihi contra inerme tollitur, brutum caput,  
 Nulli timendum. cuspidata fortior  
 Sinas ut arma fronte turrîtâ feram.  
 Juppiter amarum risit: & nostrum, refert,  
 Erit mederi, quâ tumes, insanîæ.  
 Non tua petenti tela, quas geris, tibi  
 Aures revellam: fædior, monstrosior  
 Ut sit Camelo nulla perficiam fera.  
 Damnis in ævum posterum erudies tuis  
 Aliena virtus quos adurit invidos.  
 Sed pœna dispar fuerit: aurículas geres  
 Tu namque mutilas; cubito at illis amplius  
 Aures, pudenda monstra, producam suas.



*Apologus. RANA, & AVES.*

**C**ANORA fontis Rana muscosi caput  
Vitreum colebat; vinculo diutinæ  
Junctas habebat quæ necessitudinis  
Nemoris propinquos inquilinos alites.  
Æstiva sed cum finderet campos dies,  
Omnisqûe multo Sirio areret liquor;  
Aves rogabat; si perire funditus  
Nollent Sodalem, ut inde sublatam loca  
In aquosa ferrent. annuit bonâ fide;  
Opemqûe spondet agmen aligerum: sibi  
Negotj at addit plurimum facessere,  
Certam ferendi ut oneris expediant viam.  
Namqûe insidentem si ferant humeris; metu  
Percussa; cursus impetuqûe corruat:  
Filo sequatur nexa si pedibus Duces  
Ardua petentes; aura ne commotior  
Spiret, cavendum; nam secus pedissequa  
Ruat implicata Ducibus in fascem simul.  
Ubi multa sunt rejecta; sic demum vafra  
Concludit acies. virgulam teretem, levem  
Ut Rana mediam mordicus prenda; jugum  
Subeant simulqûe hinc, inde partito agmine  
Junctæ volucres: subditâ dum fulciunt  
Cervice pondus; explicent pennas, secent  
Aurasqûe longo lineares vimine.  
Ergo propinquo deferunt nemusculo  
Virgam columnam; dente quam mediam tenax  
Dum

Dum Rana stringit ; ter , quater volucres monent ,  
 Ne hospitalem deferat ramusculum ;  
 Dentes revellat inde non ullo migrans  
 Turbatâ casu ; quidquid audierit , ferat ;  
 Durâ & Laconum concoquat patientiâ :  
 In hoc salutis cardinem verti suæ .  
 Stomacum virilem Rana dum spondet ; cohors  
 Pennata utrinque virgulæ jugum subit ;  
 Mediumque in auras sublevat ranunculum .  
 Sociæ palustres , axe dum celso rapi  
 Vident Sodalem : stulta quò , clamant , iter  
 Urges negatum ? in maximam malam crucem  
 Abi : Diî omnes te , Deæque perduint ,  
 Ingrata rebus quæ relinquis asperis  
 Fide sorores cognitas longâ tibi .  
 Perstricta probris Rana , præcepti immemor ;  
 Quid nostra vobis , dixit , est profectio  
 Curæ , Sodales invidæ ? ringamini  
 Nunc liceat omnes . excidit hianti simul  
 Divina ab ore virga ; naufragii fuit  
 Quæ tabula . præceps concidit ; saxo ferit  
 Illisa cerebrum ; quo carebat scilicet .  
 Fabella quod nos admonet , dicam brevi .  
 Solas Amyclas perdidit silentium :  
 Damiosa plures perdidit loquacitas .





# ANACREON

RECANTATUS,

*SIVE*

ANACREONTIS ODÆ,

*Quo extant ordine*

PER TOTIDEM PALINODIAS

*Ad honestiorem sensum accommodatæ.*

*A*

C A R O L O  
D E A Q U I N O

*Societatis Jesu.*



ROMÆ, Typis Antonii de Rubeis. MDCCI.

---

*Superiorum Permissu,*

MOBILE

ALABAMA

1900

ALCOHOLIC

BEVERAGES

AND

WINE

CHOCOLATE

CONFECTION

AND

TOBACCO

DEPT.

OF THE

INTERNAL REVENUE



# Typographus Lectori.



**U**O sunt, Lector benevole, de quibus te amicè appellatum, ac magnoperè rogatum velim. Primum, cum recantatum hic legis Anacreontem, ne rem sic accipias, quasi Authori sa-

tis fuerit, pro minus verecundis, quæ in suavissimo Poëtarum passim occurrunt, quoquo-modo modestiora reponere: cujusmodi fuit eorum consilium, qui sacras Comedias, Terentii Christiani, Heroica sacra, Christiani itidem Virgiliti nomine publici juris fecerunt. Longè aliud illius propositum esse, persuasum habeas: qui ità demum Græco Vati inhaerendum sibi constituit; ut eundem licentiùs exerrantem, veluti collato pede, ad regium Virtutis, aut certè honestæ voluptatis gignendæ tramitem perpetuò deducat. Quod tam anxie, religioseque tuesur, ac servat; ut, sicubi ab Anacreontis fabulis, commentisque defleat; à detorquendâ in diversum sententiâ nunquam discedat. Legisti

haud dubiè , marmoreum *Victoria* simulacrum  
 advectum à Persis in Graciam , in effigiem *Nemeseos* à Gracis *Victoribus* fuisse commutatum .  
 Non absimile quidpiam hic recognoscas . Pudi-  
 bundum , ac bene moratum *Anacreontem* exhi-  
 beo tibi ; nec tamen ex alio marmore , lignoque ,  
 ut sic dixerim , continnatum ; quam ex ipso mol-  
 liculo , ne quid gravius dicam ; nec satis sobrio  
*Anacreonte* . Rem , tractatione plùs nimio for-  
 tasse , quàm reputas , laboriosam ; & duram ,  
 per *Musas* , Provinciam quàm feliciter *Author*  
 explicaverit , ex tuo iudicio , quam ex meâ præ-  
 dicatione malim intelligas . At , inquires , nã tu ,  
 bone *Vir* , nugaris suaviter ; atque adeo rem  
 tuam nimis oscitanter , supineque pertractas .  
 Nam , qui utriusque operis conferendi nobis sali-  
 vam moveris , tuam etiam debueras ad has lau-  
 titias conferre symbolam ; utque ipsum in primis  
*Anacreontem* apprimeres , in te negotium recipe-  
 re ; nec , mancã dimidio , mutilamque editio-  
 nem festinando , expectationem publicam fru-  
 strare , atque ipsi operi fraudem facere . Bene  
 est : Occupasti alterum , quod eram te præmoni-  
 turus , & ; quo demum perspecto , tibi , si non rem  
 ipsam ; studium meum , voluntatemque probabo .  
 Sic enim habeto ; me non semel , sed iterum , ac  
 tertio cum *Authore* multis egisse , ut mihi copiam  
 face-



faceret, aut non gravato animo acciperet, si Anacreontis Odas accuderem, editionemque integram adornarem; aut saltem initiales Odarum versiculos, earumque titulos adscriberem; quibus, ad excitandam reliquorum memoriam, digitum intenderem iis, qui essent in Anacreontis Lectione versati. Sed, ut id impetratum auferrem, nullis machinis devincere, nullis officiis devincire hominem potui, cetero qui haud sanè difficilem. Nihil, aiebat, moræ in se futurum fuisse, quo minus Anacreonticas Odas accudi sineret; si, quàm sunt elegantes, tam essent verecundæ. Neque enim se ad captandam gratiam, sed ad solidam studiosorum utilitatem hanc operam impendisse; nec tam, ut doctiores illos, quàm, ut meliores faceret, cogitasse. Se nescium non esse, si quid huic operi esset gratiæ, id omne sine eo adminiculo periturum; verùm sibi non sui commodi rationem ducendam, sed incolumis servandi eorum pudoris, quibus ad hæc legenda, otium suppeteret. Eò demum suas has Vigiliolas dumtaxat spectasse, ut ingenijs Adolescentibus commonstraret viam, ad sacra, & honesta argumenta transferendi venustissimum illud Inventorum genus, quo Græci Vates, profanos amores tractantes, mirè luserunt; Anacreon verò supra omnem modum excelluit. His, at-

que talibus cum mihi spem omnem auctioris Editionis ille preciderit; superest, Lector Optime, ut hoc incommodum devoremus; atque hoc, quod vetus est verbum, Catone contenti simus. Reliquum esset, ut de ipso Anacreonte, & hujus Pæseos genere aliquid subjicerem; tum de iis, qui aut mellitissimas Odas vernaculis numeris complexi sunt; aut easdem commentariis, glossematibus, castigationibus illustrarunt. Verum de his habes valdè multa in eorum Præfationibus, qui in hoc vertendi, exornandiq; Anacreontis curriculum industriam suam exercuerunt. Eadem hic repetere non est operæ: nec eas mihi partes arrogaverim, ut tam nobili Palladis peplō meum & ipse pannum assuam.

PALINODIÆ  
IN  
ODAS ANACREONTIS.  
IN ODEN. I.  
PALINODIA

*De Lyrâ profanos amores refugiente.*

**M**Ea barbitos profanos  
Lusus, jocosque nervis  
Ut personet canoris,  
Rogat Aliger Diones.  
Testudinem, fidesque  
Sed occupavit omnes  
Cœlestis ardor ille,  
Amor, Deusque, flammâ  
Spirabilis perenni.  
Mihi molle carmen ipse  
Jam cœperat Cupido  
Dictare; Tejosque  
Modulos docere buxum.  
Sed barbitos protervos  
Iterum perosa amores;  
Solum sonabat ignem,  
Non Regna qui, subactas

Pessum deditque gentes,  
 Fletu, cruore, sævis  
 Et perfruens ruinis;  
 Sed qui, Salutis author,  
 Patris, sinuque Verbi  
 Exortus, effluensque,  
 Quos corripit, magisque  
 Consumit intus, illos  
 Ditat magis, beatque.  
 Pharetratuli, procaces,  
 Multumque fabulosi  
 Ergo valete Amores:  
 Castum sonat, Deumque  
 Testudo nostra Amorem.

## I N O D E N. II.

## P A L I N O D I A

*De Potentiâ Divinæ Fidei.*

**I** Actare somniatrix  
 Jam desinat Vetustas  
 Vastos Typhæa montes,  
 Ossamque, Pelionque  
 Movisse tortuosis  
 Tractabiles lacertis:  
 Et belluosa centum  
 Tyrrhæum cruentâ  
 Stravisse monstra clavâ.  
 Sed & Propago solers

Achiva

# IN ODAS ANACREONTIS. 281

Achiva, fabulosis  
 Quæ vera miscet audax,  
 Jam parcius superbum  
 Xersem ferat; vadosum  
 Calcasse cum profundum  
 Vanesceret, refossas  
 Et navigasse terras.  
 Sincera cui pudicum  
 Pectus Fides obarmat,  
 Inermis ille montes  
 Nutu revellet uno;  
 Terras & arva Ponti  
 Compescet ille, vanos  
 Fastus agente Xerse,  
 Tyrinthioque, & ipso  
 Potentior Typhæo.

## IN ODEN. III.

### PALINODIA

*Amor Hospes illusus.*

**O**bliviosa Cælum  
 Nox altior tenebat,  
 Et decidente largos  
 Suadebat imbre somnos;  
 Ictu foris frequenti  
 Pulsata cum quietum  
 Mihi dispulit soporem.  
 Exsurgo semisomnus;

Hoc

Hoc noctis, Ecquis, inquam,  
 Vecors, ferusque postes  
 Cædit; fragore noctem  
 Turbatque imaginofam?  
 Cum non ineleganti  
 Puer refulsit ore;  
 Versaque fronte sursum,  
 Procaculis labellis,  
 Opem, beatè, dixit,  
 Amabo, fer trementi;  
 Quem pessimos per imbres,  
 Per algidamque brumam,  
 Nudum, rudemque, tantum  
 Nox sæva non peremit.  
 Descendo, voce blandâ,  
 Fletuque captioso  
 Commotus; ostiumque  
 Recludo: At, hui, malorum  
 Quantum domum repente  
 Induco! nam Deorum,  
 Hominumque pestis, ille  
 Puellus aditât Hospes.  
 Ludens periculoso  
 Nec me fefellit astu:  
 Nam conspicatus arcum,  
 Et noxias sagittas;  
 At tu latere nunquam  
 Poteris, superba, dixi,  
 Gnidiae Propago matris.  
 Subiit simul voluntas,  
 Mulctare fraudulentum,  
 Tot cladibus superbum,

Tan-

# IN ODAS ANACREONTIS. 283

Tantisque ubique partis  
 Victoriis ferocem;  
 Et vindicare cæsos,  
 Centumque, mille, & ultra  
 Iterumque mille, & ultra  
 Miserculos amantes:  
 Quos inter ille certo  
 Me destinarat arcu,  
 Ut assolet, petendum.  
 Ergo manus rigentes  
 Cæpto fovere palmis;  
 Nodoque convolutos  
 Detergeo capillos:  
 Anhelitus cientem  
 Mox assidere jussi:  
 Pictam manu pharetram  
 Sed interim resolvo;  
 Quam clanculum silensque  
 Asporto, quâ repostus  
 Hesternus ignis arcti  
 Spem sustinet camini.  
 Hic inter advoluta  
 Sarmenta, arundinesque,  
 Perfracta tela, & arcum  
 In mille frustra sectum,  
 Amoris arma, lætis  
 Do pabulum favillis.  
 Sublata flamma largo  
 Ubi post reluxit æstu;  
 Cytheridos Puellum  
 Accerso: Qui salubri  
 Recreatus igne; damnis

Et .

Et propriis refectus;  
 Postquam recessit omnis  
 Algor, madorque; nervos,  
 Arcumque poscit: udo  
 Si fors relanguet imbri,  
 Fas, inquit, experiri.  
 Nil æstimans, inermem  
 Quem feceram, Tyrannum;  
 Absumpta tela flammis  
 Fidens, ovanisque narro.  
 Exsurgit; efferaque  
 Irâ, dolore demens;  
 Infide, perduellis,  
 Injuriose, dixit,  
 Sic sancta jura, leges  
 Sic Hospitium vereris?  
 Audi, resumo, fidum.  
 Artes fuere nullæ  
 Tibi, ter scelestè, mecum.  
 Nunc gratulare nobis:  
 Illæsa corda perstant  
 Mihi; de tuis sagittis  
 Tu videris, proterve.



## IN ODEN. IV.

## PALINODIA

BALTHASSARIS *Assyriorum Regis*  
*fatale Convivium.*

**B**eli Nepos, frequenti  
 Procerum, Ducumque cœtu,  
 Vincit rosas capillos;  
 Et aureâ receptus  
 Spondâ, putres Lyæi  
 Ridebat inter haustus:  
 Crateras & profano  
 Contaminabat usu,  
 Averterat Sionis  
 Quos impius verendo  
 Prædator ante Templo.  
 Sed abrogata sceptrâ,  
 Fines brevesque vitæ,  
 Non ambigenda summi  
 Præscripta Regis, atrox  
 Cum dextra nunciaret;  
 Non ille criminosum  
 Calamum, notasque passus,  
 Elanguit repente;  
 Excussit & rosarum  
 Inominata ferra;  
 Projecit & Lyæi  
 Culpabiles trientes.

IN

## IN ODEN. V.

## PALINODIA

HELIOGABALUS *Convivas rosis  
opprimit.*

**I**Nter dapes opimas,  
Ridente purpuratos  
Excepit ore Patres  
Chlamydatus ille Tortor;  
Phœnissa Terra primum  
Phœbi sacros honores  
Cui, Delphicasque Vittas  
Dedit; probrum Latinis  
Mox Fascibus remisit.  
Dum largius potitur  
Incauta turba donis  
Cererisque, Liberi que;  
Lacunar hospitales  
Fluentium rosarum  
Respergit imbre mensas.  
Hilaravit illa Patres  
Festiva depluentis  
Primum procella Veris.  
Sed pleniore nimbo  
Ubi mox dapes, thorosque  
Lues odora merfit;  
Ubi post gravata præceps

Elisit

## IN ODAS ANACREONTIS. 187

Elisit ora turbo;  
Non se prius Tyranni  
Irâ, doloque cæsos  
Sensere, quàm sepultos.  
I nunc, rosasque lauda,  
Virgunculas pudentes:  
Fastos revolve: nunquam  
Sentes, rubosque tantâ  
Sævissè clade nosces.

## IN ODEN. VI.

### PALINODIA

In illa Stultorum verba Isaj. 22.

*Edamus, & bibamus: cras enim moriemur.*

**S**oluta cum receptat  
Fidelis ossa tellus,  
Si mobiles abiret,  
Recederetque in auras  
Vigor ille, qui favillas  
Primi fatetur ignis;  
Tibi, Turba, commodarem  
Forfan benignus aures,  
Quæ læta complicatis  
Ter increpas choræis:  
Comedamus, & bibamus;  
Nullumque sit, voluptas

Quod

Quod non amica Pratum  
Pertranseat; prematque.

Quod si leves ad astra  
Cursus redux adornat  
Pars illa mortis expers,  
Senioque victa nullo;  
Vel tu, procax, graviq̃ue

Prognata Turba cæno,  
Adipale mitte Carmen;  
Sodalibus vel illud,  
Tactis nitente Circe,  
Duri canas Ulyssæi.

## I N O D E N. VII.

## P A L I N O D I A

*Amor Navicularius, Irrisor, &  
irrisus.*

**A** Mathusidis Puellus  
Clavum regebat amplà  
Navarcus in triremi.  
Numerosa Turba puppim  
Proramque jam premebat.  
Spondens inane sudum,  
Zephirosque blandientes,  
Me spumeos in æstus  
Vocarat ille, ponto  
Non credulum doloso.

Ubi

# IN ODAS ANACREONTIS. 289

Ubi vidit obstinato  
 Littus tenere voto;  
 Neptunios per agros,  
 Infida vela solvit:  
 Coorta sed repente  
 Fœdis procella nimbis  
 Cæcas agebat undas.  
 Tunc Aliger relicto  
 Petivit astra clavo.  
 Dum mergitur furenti  
 Quassata pinus Austro;  
 Gemitque stulta pubes;  
 Errat voraginoso  
 Vel insepulta ponto;  
 Plaudentibus protervus  
 Ridebat ille pennis:  
 Oculisque me malignis  
 Ab axe conspicatus,  
 Identidem fremebat.  
 Sed sospes ipse; Rector  
 Fatuæ, puelle, Turbæ,  
 Non me dolere, dixi;  
 Non me perire cernes.

## IN ODEN. VIII.

## PALINODIA

*Somnium Authoris.*

**D**Apes ferente parcas  
 Refectus ante cœnâ,  
 Somnos leves trahebam;  
 Lodice convolutus,  
 Quam molle non Tarentum,  
 Dives deditve Sidon;  
 Sed quam tuis, Jugurthæ  
 Victor superbe, lavit  
 Propola vilis undis. \*  
 Mihi Teutonum videbar  
 Bellator inter alas  
 Sævam ciere pugnam;  
 Budæque celsa captis  
 Inferre signa muris.  
 Displorsa bellicosus  
 Tormenta mille bombis  
 Audire tunc videbar;  
 Clangentium fragores,  
 Et æneos tubarum.  
 Invisa cum Juventæ,  
 Quæ Palladem frequentat,  
 Celsâ sonora Turri

Fata-

\* *Aquis Marianis, quas Marius ex agro Tusculano Romam derivavit  
 Eutropio Marrana.*

# IN ODAS ANACREONTIS. 291

Fatale Nola\* murmur  
Edit; trahitque segnem  
Ad Rhetores docendos.

## IN ODEN. IX.

### PALINODIA

*Columba, relicto Veneris curru, letabunda.*

**A**Morque, suaviumque  
Paphiæ, Columba, matris,  
Quò tendis? inquietas  
Cur excutisque pennas,  
Alas sueta longo  
Vix commovere cursu?  
Subsiste jam parumper  
Ad arborem comantem,  
Quæ pandit hospitales  
Hinc, inde læta ramos.  
Amice, dixit, (altas  
Simul rogata frondes  
Tenuit, laboris impos)  
Amice, vincla rupi,  
Et inditas habenas;  
Queis Cyprios agebam,  
Servire adacta, currus:  
Et nunc, potita Cælo,  
Extergere expeditis

T. 2

Co

---

\* Nola maxima Collegii Romani, quæ bis in diem pulsata discipulo  
venit ad latham lictorarium.

Conabar usque pennis  
 Non masculos odores;  
 Invita colla, & alas  
 Quibus imbuit Dione.  
 Optatius vagari  
 Per tesqua, perque saltus;  
 Et improbam nigranti  
 Famem levare bacchâ;  
 Servire quam lupatis,  
 Dominæque ferre semper  
 Fastidium superbæ.  
 Nec Cyprios amores,  
 Benigniusque Numen  
 Ingrata sic negarim:  
 Candente me cibaret  
 Seu dextera Cytheris;  
 Seu traderet bibendum,  
 Quod haurit ipsa, nectar,  
 Quâ potat ipsâ gemmâ.  
 Tenellulo receptam  
 Sinu fovebat usque;  
 Lactente lacteumque  
 Pectebat ungue collum;  
 Fragrantibusque centum  
 Saturabat ipsa succis.  
 Habenulas gerebam;  
 Auroque, purpurâque  
 Hera quas vigil paravit.  
 Utcumque sumptuoso  
 Sed educata cultu,  
 Largoque dives ostro,  
 Servire transigebam



Mæstos coacta Soles.  
 Urebat altiusque  
 Ægram, parum pudicæ  
 Jugo subesse Divæ.  
 Hanc Cyprios in Hortos  
 Duâre nunc jubebar,  
 Adonidém petentem:  
 In pineos recessus  
 Et nunc virentis Idæ;  
 Spartæ graves amores  
 Tibi vendat ut, scelestæ  
 Phryx Arbiter Dearum.  
 Præstat, remota, præstat,  
 Iterum fatebor, arva  
 Lustrare, perque Valles  
 Errare confragosas;  
 Silvis laboriosum  
 Et quæritare victum.  
 Sed, hém; malum! Diones  
 Hæc illa, mirtus, arbor  
 Est; qua volans refedi.  
 Soluta vincla collo  
 Dum cogito per auras;  
 Dum fabulamur, Arbos  
 Suspecta me fefellit.  
 Valeas, Amice; Ramos  
 Amathusios relinquo.

PALINODIÆ  
IN ODEN. X.

PALINODIA

*Vipereum Amoris monile, Metanææ  
donum.*

**M**etanæa confluenti  
Juvenum, Senumque Turbæ  
Vendebat axe dignas,  
Austera Virgo, merces.  
Lagunculam salubris  
Emebat ille fletus;  
Cineres parabat alter,  
Ut inquinaret auro  
Malè fulgidos capillos.  
Dum distrahit cruentis  
Asperfa flagra guttis,  
Setasque, cuspidisque,  
Extantibusque duras  
Hastilibus catenas;  
Se Virgini superbus  
Tulit obvium Cupido.  
Multum decora, verum  
Mihi, Virgo, nota nusquam,  
Dixit, meos in usus,  
Si Pyxides tot inter,  
Tot inter arculasque  
Tu quidpiam reservas;

Orna;

Ornare quod venustum  
 Magis, magisque possit;  
 Quanto jubes redemptum  
 Paratus ære tollam.  
 Cui Virgo; Tu sagittas  
 Geris aureas, Puella;  
 Humeros pharetra pulsat  
 Sciteque picta nudos:  
 Cincinnulos decenter  
 Torfit perita Mater;  
 Depinxit ora fucis;  
 Geminasque pexit alas;  
 Quas explicas Columbâ,  
 Cycnoque molliores.  
 Eburna colla solum  
 Scelus est carere torquæ,  
 Qui defluente pectus  
 Recidens obumbrat auro.  
 Libens sed ipsa tradam  
 Aptum monile, gemmis  
 Et asperum coruscis.  
 Quod omnibus reposcit  
 Dum captus ille votis,  
 Instatque; Virgo pictam  
 Manu recludit arcam.  
 Illic latebat, arcto  
 In se obvoluta nodo,  
 Immitis aspis; ultrix  
 Animi nocentis illa,  
 Comesque; mella amoris  
 Quæ subsequens amaro  
 Statim inficit veneno:

Curam vocant voracem;  
 Cor numinis relictū  
 Quæ conscium remordet.  
 In pectus illa prensam  
 Hanc conjicit Puelli:  
 Quæ lividos inhærens  
 Per nuda colla nexus  
 Producit, explicatque.  
 Dum saucius, gemensque  
 Puer infremit; Virago,  
 At hoc monile, dixit,  
 Tu neutiquam revelles.

## I N O D E N. XI.

## P A L I N O D I A

In illa verba S. Hilarionis:  
*Septuaginta annis servisti Deo, &  
 adhuc times?*

Ægyptii recessus  
 Cultor verendus ille;  
 Camæna quem severo  
 Negat illigare versu;  
 Hilarem sonare prima  
 Vox incipit; sed hæret  
 Medio retenta cursu.  
 Inhospitalis, inquam;  
 Plagæ colonus ille  
 Sic, Morte jam propinquâ,

Se fertur allocutus:  
 Horrentis, abditique  
 Annosæ cultor antri,  
 Ecquid paves supremâ  
 Formidolosus horâ?  
 Niloticis arenis  
 Ætas peracta duos  
 Tibi longa per labores;  
 Tot conditi precando,  
 Tot redditique Soles;  
 Lacrymæque, pectorisque  
 Custos dolor pudici,  
 Spem lætioris addunt,  
 Fiduciamque vitæ.  
 Verum, facesse fallax  
 Plerumque spes, levisque:  
 Si quid tot axe dignum  
 Forte egerim per annos,  
 Ignoro prorsus; illud  
 Non me latet, fugitque;  
 Magis esse tunc timendum;  
 Extrema transmigranti  
 Magis hora cum propinquat.

## IN ODEN. XII.

## PALINODIA

*Amor Piscator.*

**A**Udite somnianti  
Quod contigit, Sodales.  
Cytherejus silenti  
Mihi nocte visus Ales,  
Procul abditis sagittis,  
Piscator ut, jocosa  
Calamis vacare dextrâ.  
Metus æger hamus; esca  
Pellax erat venustas;  
Et capta denotabant  
Incauta corda prædâ.  
Scopulo reclinis ille  
Dejecta fila solers  
Dum tendit, extrahitque;  
Rapido citata cursu,  
Adstat timenda Pistrix.  
Murmur, fragorque Ponti,  
Quo fertur illa, somnum  
Evanidum removit.  
Nimis heu, nimisque nostris,  
Nereu, fragose damnis:  
Si paululum fuisset  
Productus ille somnus;  
Ceto voratus, orbi

IN ODAS ANACREONTIS 299

Non imperaret ultra  
Arundifer Tyrannus.

IN ODEN. XIII

PALINODIA

*Ad Scabiem Cupidinis Alexipharmacon.*

Cupidinis nocentem  
Si quis furit furorem,  
Vel algidas per undas;  
Assistas ut olim,  
Mersos volutet artus;  
Vel cuspidata nudis  
Premat vepreta membris;  
Velut ille, quem salutat;  
Colitque Terra primum  
Nursina Cœnobitam.  
Jugulatus omnis ardor  
Sic protinus recedet;  
Nec, auguror, molesti  
Cupidinis nocentem  
Ultra furet furorem.

IN

## IN ODEN. XIV.

PALINODIA

In illa verba Joann. 13.

*Cum dilexisset suos qui erant in Mundo,  
in finem dilexit eos.*

**C**ompellat ut rebellem  
Amare te Supernus  
Amor, ferire doctos  
Ubique tendit arcus.  
Si fixa cernis alto  
Corusca signa Cœlo;  
Stellante torquet ille  
Ignita tela Cœlo.  
Si picta flore tellus  
Te pellicit, rapitque;  
Occulta, delitescens  
Post cespites rosarum,  
Intorquet ille tela.  
Si fontis unda leni  
Tibi defilit susurro;  
Ne fide: certiores  
Nam vibrat inde flammæ.  
E montium nivosâ  
Cervice, Vallibusque  
Petit ille te supinis.

Ve-



# IN ODAS ANACREONTIS 3013

Venator impeditos  
 Si figis ære cervos;  
 Per lustra, perque saltus  
 Te quæritat, premitque.  
 Expansa vela vasto  
 Si Nauta solvis alto,  
 Non te sequax ab omni  
 Cessat ferire fluctu.  
 Propiusque posset ille  
 Ut te docere amorem;  
 Humana membra, nostræ  
 Subiit vicesque fortis:  
 Docetque amare cæco  
 Te vagiens in antro;  
 Docetque amare, tecto  
 Latere dum fabrili  
 Tot sustinet per annos.  
 Illum suprema demum,  
 Cum jam maneret hora;  
 Lacefferetque duris  
 Acerba fata pœnis,  
 Potentior telo,  
 Ut te feriret; ipse  
 Conversus in sagittam,  
 Tua corda, dulcis esca,  
 Tua corda, dulcis haustus,  
 Pervadit, irrigatque.  
 Quo tela nunc repelles  
 Umbone, fortis extra;  
 Si, cordis arce captâ,  
 Amor triumphat intus?

## IN ODEN. XV.

## PALINODIA

S. CATHARINA SENENSIS, *rejeclâ  
roseâ coronâ, spineam eligit.*

**C**Ælestibus viretis  
Lectos manu pudicâ,  
Aversa cur repellis,  
Eccehusca Virgo, flores?  
Cur vepribus rigenti  
Caput inferis coronæ?  
Erras: resumit illa;  
Mihi nexa sunt ligustris,  
Rosisque, liliisque,  
Quæ ferta tu molestis  
Mones cavenda dumis;  
Et, quæ revincta laudas  
Tu liliis, rosisque;  
Mihi sunt acuminatis  
Vitanda ferta dumis.

## IN ODEN. XVI.

## PALINODIA

*Ad Amicum, Turcarum ad Viennam  
cladem carminibus celebrantem.*

P Olonicum Gradivum,  
Lotharumque, Bojumque  
Æquas Ducem canendo.  
Metum, fugamque narras  
Tu decoloris Istri,  
Plus mille fœtus armis,  
Qui Ponticas ad undas  
Non invenire callem,  
Septemfluo reluctans  
Queritur volutus ore.  
Tu Bistonum Viennæ  
Refixa signa campis;  
Ænotriam metuque  
Longo canis solutam.  
Ignava Turba frustra  
Sed Bosphori superbo  
Caremus hoste: nobis  
Si nequior Tyrannus,  
Malus imperat Cupido;  
Victoris & timendi  
Jugo redempta colla  
Puelluli pudendis  
Adstringimus catenis.

## IN ODEN. XVII.

## PALINODIA

*Aureum Poculum Eucharistico Epulo  
insculptum.*

**M**Yronis æmulator,  
Ades, Myosque Sculptor:  
Phialam rigentis auri  
Mihi mollibus labora  
Emblematum figuris.  
Nisæ profectus altis  
Sed non jugis Lyæus  
Intonsus efferatas  
Agat hic per arva Tigres.  
Non me vireta Nisæ,  
Vindemiâque tangit  
Non purpurante Naxos.  
Sed nec, furente Thyrsos,  
Mihi Mænades corusco  
Infamant in auro:  
Quales fugax retortis  
Expavit Hebrus undis,  
Cum Thracios per agros  
Rhodopejum caterva  
Laceraret acta Vatem,  
Frustra feras agentem,  
Et ipsa luctuoso,

Auri-

# IN ODAS ANACREONTIS. 305

Aurita saxa cantu.  
 Noli, molesta, noli  
 Novare fata: mitte  
 Malè sobrias Puellas;  
 Ne forte præliantes  
 E poculo resurgant;  
 Orpheoque morte solùm  
 Me comparem trucident.  
 Demum, natante musto,  
 Mihi non lacus redundet;  
 Cupidinive junctus  
 Corymbifer Lyæus  
 Mellifluos eburno  
 Pede conterat racemos.  
 Hæc signa, imaginesque  
 Jocis, amoribusque  
 Male perditus, supinus  
 Anacreon reposcat.  
 Mihi clarius retuso  
 Toreuma Surgat auro;  
 Insculpe Sospitalis  
 Divina dona Mensæ;  
 Bonus ille, mitis ille  
 Placabilem Magister  
 Quâ se suis Alumnis  
 Escamque, regiumque  
 Impertit liquorem.  
 Non ille vina dulcis  
 Engaddeos ministret;  
 Potabilem propinet  
 Sed prodigus Cruorem  
 Quem mox, Patri litatus,

V

La.

## 306 P A L I N O D I Æ

Lavacra fundet ægris,  
 Piaculumque Terris;  
 Hinc, inde fusa, rite  
 Quem berbibat Cruorem  
 Electa turba. Velo  
 Sed perduellis ora  
 Involve Proditoris;  
 Vitale vertet, amens,  
 Qui Nectar in venenum.

## I N O D E N. XVIII.

## P A L I N O D I A

*De Calvâ insculptâ in annulo signatorio  
 COSMIII. Magni Ducis  
 Etruriæ.*

TUam ferunt achate  
 Radiasse, Pyrrhe, dextram;  
 Musas, Apollinemque  
 Ubi mira multiformi  
 Natura pinxit arte:  
 Maculisque sponte natis,  
 Eburna plectra, nervos,  
 Et barbitos latenti  
 Arguta ludit astu.  
 Qui primus è Latinâ  
 Orbi graves habenas  
 Injecit arce, gemmâ  
 Gestabat annulari

Ar.

# IN ODAS ANACREONTIS. 307

Armis trucem; minaci  
 Et lanceâ vel ipsi  
 Tritoniæ timendam  
 Te, Diva, quam sonanti  
 Colit Cythera fluctu.  
 Victor Leo ferarum,  
 Munitus ense dextram  
 Tibi, Magne, sed micabat; \*  
 Inane sculptus omen.  
 Ambagibus, modisq̃ue  
 Cælata Sphynx dolosis  
 Dextram ligasse fertur,  
 Marti, gravesq̃ue Jano  
 Quæ nexuit catenas;  
 Et pace feriatum  
 Longâ beavit Orbem.  
 Quid Anchoram Seleuci  
 Recenseam; tuumq̃ue  
 Insigne, Galba, Proram;  
 Babiloniiq̃ue, Perseu,  
 Te, Symbolum Tyranni? \*  
 Me tesseras inanes,  
 Ænigmatumq̃ue cæcas  
 Offucias sequentem  
 Ad se rapit beatæ  
 Dominator ille Floræ;  
 Quo, Lydios per agros,  
 Regnante, gestit Arnus,  
 Tagoq̃ue, fabuloso  
 Feliciorq̃ue Hidaspe.  
 Sublimis ille fortis

V 2

Nam

\* Pompejus Magnus.

\* Alexandri Macedonis.

## 308 P A L I N O D I Æ

Nam sobrius; lutiq̃ue  
 Non immemor caduci,  
 Calvæ rigentis ora  
 Gemmâ notante signat  
 Scriptorias tabellas.  
 Felix Ethrusca Tellus!  
 Quàm recreat, beatq̃ue  
 Mors illa; suevit omnes  
 Quæ territare gentes.  
 Sed te, decus, jubarq̃ue  
 Regumq̃ue, Principumq̃ue,  
 Quibus efferam perenne  
 Præconiis per ævum?  
 Satis hoc verente nobis  
 Dixisse sit Camæna.  
 Quæ dextra morte signat  
 Quidquid vovet, jubetq̃ue;  
 Jubet illa, perficitq̃ue  
 Nil morte dextra dignum.

## I N O D E N. XIX.

## P A L I N O D I Æ

*Aquæ Potores Laudantur.*

**A**quis redundat axis:  
 Aquis madetq̃ue tellus:  
 Tota est aquosa Tethys.  
 ChrySTALLINOS liquores  
 Ergo decet frequentèr

Hu



Haurire me, juvatque:  
 Ut sobrios Alumnos  
 Sebethus erudire  
 Solet, venustus amnis.

## IN ODEN. XX.

## PALINODIA

*Stulta Amantium Vota!*

**S**Tulti solent Amantes  
 Optare, frigidisque  
 Deos rogare Votis,  
 Ut, vel monile fiant;  
 Vel fimbriata vestis;  
 Si Diis placet, venustæ  
 Vel calceus Puellæ.  
 Quid spontè sic furenti  
 Voveam, precerque turbæ;  
 Si poscis: hoc misellis  
 Voveoque, comprecorque:  
 Statim ut monile fiant;  
 Vel fimbriata vestis;  
 Si Diis placet, venustæ  
 Vel calceus Puellæ.

## IN ODEN. XXI.

## PALINODIA

DAVID REX, *siti laborans, obtentam  
aquam Domino libat.*

**R**Egum, decusque Vatum,  
Idemque Pastor olim;  
Armis, viâque fessus,  
Pugnâ calente partam  
Ægrè sitim ferebat.  
Sed algidos anhelis  
Cum faucibus tulisset  
Latices amica cassis;  
Longo labore captos,  
Tibi Rex, Satorque rerum,  
Libavit ille rores:  
Cœloque sceneratas  
Solo refudit undas.  
Jacto liquore fortis  
Plus illa dextra; fundâ  
Stridente quàm minacem  
Cum sterneret Gigantem:  
Olli sed æqua tellus,  
Paucis rigata guttis,  
Palmasque, laurasque  
Benignior resolvit,  
Quàm fertili Canopo

Mef-

# IN ODAS ANACREONTIS. 311

Messes ferant lutoſo  
Demerſa rura Nilo.

## IN ODE N. XXII.

### PALINODIA

*Ætna floribus allicit; flammis  
perimit.*

**H**erbosa liberales  
Quâ ſpondet Ætna flores;  
Qui, neſcius viarum,  
Incautus errat; auras  
Captatque mitiores:  
Et nunc fluentis undæ  
Æquale murmur haurit;  
Roſamque nunc comantem,  
Adonidemve carpit:  
Inſanus igne turbo,  
Si, concitatus Auſtro,  
Temere vagantis ora,  
Preſumque pectus afflet;  
Modò quos amavit, ille  
Stratus repente pulſat,  
Inane pondus, agros:  
Miſeroque mollicelli  
Nil proſuere flores;  
Miſeroque murmurantes  
Nil proſuiſtis undæ.

## IN ODEN. XXIII.

## PALINODIA

*De Inani Sepulchrorum luxu.*

**S**I lucidis ademptam  
Signis metalla possent  
Revocare sculpta vitam;  
Prior ulla non teneret  
Me cura; marmorato  
Quam diligens ut ossa  
Componerem sepulchro:  
Ephirâ, Paroûque, multâ  
Et Tœnari ruinâ  
Tectus libens jacerem.  
Sed Mempheos superbæ  
Si, Cariaûque saxa  
Cineres, nitore segni,  
Non incitant sepultos;  
Onerosa quid pusillam  
Struem gravet Carystos?  
Exilis æra curem  
Quid ampla pulvis; ipsâ  
Minerûque, mentiarûque  
Quid fastuosus urnâ?  
Me perbrevis silentem;  
Levis tegatûque tellus.  
Quam si recens obumbret  
Laurus virente fronde;

Niloticis jacebo  
Non invidus Tyrannis.

## IN ODEN. XXIV.

## PALINODIA

B. ALOYSIUS GONZAGA, *vicinæ mortis certio-  
rem factum, ludum se  
continuaturum, affirmat.*

**S**pectabilis, piæque  
GONZAGA flos Juventæ;  
De more feriatuſ  
Curis laborioſæ  
Cum luderet Minervæ;  
Eburneos & Orbes  
Truſatili feriret,  
Impelleretque menſâ;  
Spectator inter omnes  
Amicior Sodales;  
Quid, ludibunde, rerum  
Ageres, Amice, dixit,  
Tibi mors propinqua certis  
Si nunciata ſignis  
Mox afforet? vacarem;  
Reſpondit ille, ludo;  
Ut ludo nunc: ſtuderem  
Nihil remiſſiuſque  
Victoriâ potiri.

Lu-

## 314 PALINODIÆ

Lulisse sic paratum  
 Sed ludere arbitratur  
 Qui fortè; quid sit ullam  
 Rem seriam, gravemque  
 Agitare, nescit ille.

## IN ODEN. XXV.

## PALINODIA

S. MARIÆ MAGDALENÆ *lachrymis*  
*curas mitigantis Prosopopæja.*

**G**Rato quiescit omnis  
 Sopita cura fletu.  
 Cum lachrymas tepentes,  
 Salubre, poto, nectar;  
 Nil dulcius fateri,  
 Beatiufque potis  
 Experta cogor undis.  
 Cor angit, exeditque  
 Exacta per pudendos  
 Mihi Juventa amores.  
 Ubi noxiæ recurrit,  
 (Quæ centies in horas,  
 Et millies recurrit)  
 Ultrix imago vitæ;  
 Non parcit illa noctes  
 Torquere, non diesque.  
 Sed haurio fluentes

Si

Si rursus ægra fletus;  
Grato quiescit omnis  
Sopita cura fletu.

IN ODE N. XXVI.

PALINODIA

*Coccolatis Potio litterarum studiosis  
perutilis.*

CUM liba Mexicana  
Me proluunt, fragrant  
Medicata cinnamomo;  
Apicios, Lucullos,  
Vitelliosque ridens,  
Geniale poto nectar.  
Apollo tunc vocatus  
Benigniore cantus  
Dat provenire venâ:  
Salebra nec fluentes  
Retardat ulla versus:  
Magis & subinde crescit  
ANACREON modestam  
Diffictus in Camœnam.

IN

## IN ODE N XXVII.

## PALINODIA

*De Vino, & Cocolate.*

**E**Oa Regna , primo  
 Et quos colorat ortu  
 Aurora Dives Indos,  
 Lustrasse fertur Evan.  
 Primusque pampinosæ  
 Stupentibus colonis  
 Monstrasse vitis usus.  
 Sed non adivit ille,  
 Quos occidens revisit  
 Phæbea lampas, Indos:  
 Hinc, suspicor, capaci  
 Subacta vina prælo  
 Ignorat orbis alter;  
 Lænejumque nectar.  
 Ea damna sed refarcit  
 Beatiore potu:  
 De glande Mexicanâ  
 Bis, terque dulciorem  
 Namque exprimit liquorem:  
 Quem si vetusta nosset  
 Anacreontis ætas;  
 Anacreon relictæ  
 Sapientior Lyæo,  
 Succis Americanis



Liceret, ut potiri,  
Mare barbarum remotos  
Sulcasset usque ad Indos.

## IN ODE N XXVIII.

## PALINODIA

*De Imagine DEIPARÆ VIRGINIS  
à S. LUCA depictâ.*

**T** Arsenfis ò Magistri  
Cultor, comesque, Pictor;  
Loquente finge telâ  
Divina MATRIS ora,  
Divina VIRGINISQUE;  
Quæ stirpe nata Regum,  
Regumque VIRGO Regem,  
Enixa, spes, decusque  
Mortalium, perenni  
Hominumque, Cælitumque  
Regina fulget ævo.  
Telâ referre Matrem,  
Tuum est, amice Pictor;  
Calamo referre Natum,  
Cui contigit. tabellâ  
Quamvis peritus unâ  
Hic prolis, & pudicæ  
Parentis ora junges.  
Ergo Parentis almam

*Illic.*

Illustret, explicetque  
 Gravitas verenda frontem,  
 Simulque grata; nullis  
 Et fastuosa rugis.  
 Genas utraque tingat  
 Mistus rubore candor;  
 Commendet & Venustas,  
 Desponsa sed pudori.  
 Pax, & modestus ardor  
 Geminos gubernet orbes;  
 Quibus ambiat nitere  
 Splendore victus æther.  
 Teretes tegat lacertos  
 Vestis decora; pectus,  
 Eburneumque collum  
 Obnubat; & capillos,  
 Frontem, caputque supra  
 Adducta condant omnes:  
 Laciniâ fluente,  
 Sed tesseram Salutis,  
 Crucem ferat, palamque  
 Ostendet ipsa gyro  
 Radiata frons nitenti.  
 Nexæ manus receptum  
 Sine fulciant Puellum;  
 Talos fluens ad imos  
 Quem clara vestis ornet.  
 Artollat ille dextram,  
 Spectantibus benigno  
 Bene apprecatus ore:  
 Admotus at sinistrâ  
 Sit pectori Libellus,

# IN ODAS ANACREONTIS 319

Puro Libellus auro  
 Intus, forisq̃ue scriptus;  
 Ubi, non legendus ulli,  
 Certus recenset Index,  
 Amica quos laborum  
 Virtus ad astra tollit.  
 Modulum sequute nostrum,  
 MATREMQUE, PARVULUMQUE  
 Cum, Pictor, expolitâ  
 Perfeceris tabellâ;  
 Longæva te sequetur,  
 Feretq̃ue Fama, qualem  
 Emortuis adeptus  
 Zeuxis nec ipse telis.  
 Nam quæ verenda surget  
 Spirans Imago, cursus  
 Æquabit illa Solis;  
 Impar nec illa Soli,  
 Radios, jubarq̃ue totis  
 Diffundet una terris.  
 Præsaga nam futuri  
 Si vera mens revelat;  
 Felix subibit ætas,  
 Tarpeja cum Tonantem  
 Rupes perosa celsis  
 Sternet piata saxis:  
 Asserta vindicatis  
 Et Roma cum jubebit  
 Turpes greges Deorum  
 Procul exulare Templis.  
 E collibus Latinis  
 Fulgens Imago frontem

Tunc

Tunc exeret; jugoque  
 Sublimis Exquilino,  
 Spatiis tenebit amplis  
 Aurata testa; labens  
 Quæ fervidos per æstus  
 Metabitur recenti  
 Peregrina nix amictu.  
 Demum volutus annus  
 Feliciore sæcla  
 Cum proferet metallo;  
 Dabitque jura totum  
 Burghefiâ per Orbem  
 E stirpe natus Heros;  
 Tabella Gange multo  
 Saturata tunc, Tagoque  
 Meritas sacrabit Ædes.  
 Non unius decorus  
 Sudor, laborque Apellis;  
 Phidiæque, Mentorisque  
 Non unius perenne  
 Pretium, decusque; moles  
 Tholo minante surget  
 Ad astra; Regna solùm  
 Quæ non remota, gentes  
 Et exteras; sed ipsam,  
 Quæ nil stupere novit,  
 Cogat stupere Romam.

I N O D E N. XXIX.

PALINODIA.

*Effigies Anacreontis.*

**H**Eliconidum Sororum  
 Jubar, decusque, Vatem,  
 Agedum, sagax, adumbra  
 ANACREONTA, Pictor.  
 Sed exprimas Poëtam,  
 Suis Poëta chartis  
 Ut ipse se colorat.  
 Primum decora Vatem,  
 Et ampla frons honestet;  
 Annosa spargat albis  
 Senecta quam capillis.  
 Hos implicata Laurus,  
 Ederæque flexuosis  
 Coërceant corymbis.  
 Innubilo sub arcu  
 Supercilij nivalis  
 Lux bina fulgurantes  
 Utrique vibret ignes.  
 Si blandiente possunt  
 Colore verba fingi;  
 Fac defluant ab ore  
 Mellita verba, totis  
 Hyblæ referta cellis.  
 Sed otio fluentem,

Elanguidumque centum  
 Hinc ambient; & illinc  
 Volubiles Amores:  
 Vetuloque lufitanti,  
 Tenericuloque certent  
 Illudere arrogantes.  
 Infultet ille capto,  
 Molitus imbecillis  
 Catenulas lacertis.  
 Face sed licentiori  
 Audaculus verendos  
 Incendat ille canos,  
 Et lauream coronam;  
 Irrideatque inanes  
 Titulos, superbiamque  
 Intactæ ab igne frondis.  
 Vatis voluptuosi  
 Testitudinem canoram  
 Pulsset jocosus alter,  
 Quo tela torquet, arcu  
 Vernantium genarum  
 Sed qui decore præstant,  
 Chiumque, Lesbiumque  
 Gemmantibus ministrent  
 E poculis Lyæum:  
 Nardoque delibutas  
 Rugas terant seniles:  
 Beatulumque circa  
 Senem tumultuosus  
 Pulsent solum choræis.  
 Hos inter ille turpi  
 Inglorius veterno,

# IN ODAS ANACREONTIS. 323

Bacchum, Cupidinemque  
 Canat, licentiosæ  
 Ritus, jocusque turbæ.  
 Demum, perite Pictor,  
 Talem velim colores  
 ANACREONTA; qualem  
 Si se videret ipse;  
 Se se expavescat ipse  
 Inertiâ solutum:  
 Longisq; fætus annis  
 Dampet leves amores:  
 Et improbum Bathyllum  
 Jubeat valere longum.

## IN ODEN. XXX.

### PALINODIA

AMORIS *Statua in Fonte, ad Hortos*  
*Exquilmos.*

AD vitreas opaci  
 CUPIDO fontis undas  
 Dum temperat sagittas;  
 Et mox, rigente lymphâ,  
 Eburna membra mersat,  
 Titanios per æstus;  
 Hunc Najadum caterva  
 Hinc, inde adorta, duris  
 Capit, ligatque vinclis.

## 324 P A L I N O D I Æ

Oculisque ad astra versis,  
 At si quis ò Deorum,  
 Dixit, severus ultor,  
 Feroculum, scelestum  
 His annuat Puellum  
 Rigere semper undis;  
 Orbem nocente flammâ  
 Qui corripit; jubetque  
 Aquas inultus inter  
 Vel Najades flagrare.  
 Audita vox precantum.  
 Stetit Aliger vetusti  
 Honos, decusque Fontis:  
 Ligusticoque membra  
 Dat compedita saxo.  
 Et nunc benignus Horti  
 Rigator Exquilini,  
 Tot alget inter undas,  
 Quot arsit inter ignes.

## I N O D E N. XXXI.

## P A L I N O D I Æ

*Aquæ Fontis Castalii Poëtas faciunt.*

**H**Eliconio liquore  
 Fera percitus canebat  
 Homerus arma, duri  
 Ulyssis & labores:  
 Dirceus & remota

Scan.



# IN ODAS ANACREONTIS 325

Scandebat astra cycnus;  
 Cæusque triste carmen,  
 Et naviæ Alumnus;  
 Sed Lesbius ferocem  
 Ciebat ore Martem.  
 Heliconio liquore  
 Madens, Achillis iram  
 Pietate Mantuanus  
 Phrygiâ præire Cantor,  
 Æquare vel superbit.  
 Heliconio liquore  
 Satur, cruenta bella,  
 Sontes canitque Thæbas,  
 Et impium Capaneum  
 Vates; amica Siren  
 Quem candidis recepit,  
 Natumque fovit ulnis.  
 Heliconio liquore  
 Juvatque concitatum  
 Me nunc Anacreontis  
 Chelyn rosis revinctam  
 Sacro ferire plectro.

## IN ODEN. XXXII.

### PALINODIA

*Modus amandi Deum: Amare sine modo.*

SI forte quis requirat,  
 Quales, amare certus,

X 3

Velim

Velim meos Amores;  
Præsto sit ille; nostros  
Recenseatque Amores.

Ut non paventis ictum  
Nati, Sacras ad Aras,  
Amavit immolator;

Longæ Paterque gentis:

Ut Legifer, rubeto  
Admissus æstuoso;

Ut Pastor Ephrataus,  
Non impiger Gigantes

Fundâ domare, lento  
Languibat igne; tales  
Velim meos Amores.

Quales, sinu Magistri  
Reclinis, hausit ignes,  
Qui, non timente fisti

Mox ingenj volatu,  
Aquilas prævit omnes:

Amavit ut, remoto

Jaçantior periclo,

Mox infidelis alter,

Sacræ comes catervæ;

Caputque mox futurus:

Amavit ut, solutis

Cum Magdalis capillis

Viatrix Deum teneret,

Fletu & potente: tales

Velim meos Amores.

Ut Cœlitum calescit

Soluta ponderoso

Dilecta turba velo:

# IN ODAS ANACREONTIS. 327

Propinquiore flammâ  
 Ut conflagrant, superni  
 Ferenda iussa Regis,  
 Nutus & explicatis  
 Qui præstolantur alis:  
 Sed & Parens Tonantem  
 Quæ rustico Puellum  
 Enixa fovit antro,  
 Puroque lacte pavit,  
 Ut flagrat ipsa; tales  
 Velim meos Amores.  
 Cœlestis ille tandem  
 Ut ipse se per ævum  
 Amat perennis ardor;  
 Si fas amare tantum,  
 Magno locusque voto est;  
 Ardens & ipse tales  
 Velim meos Amores.

## IN ODE N. XXXIII.

### PALINODIA

*Curæ profani Amatoris. ad Hirundinem.*

**H**irundo, quæ cruentum  
 Fugis Ismari Tyrannum;  
 De more nunc & Hospes  
 Benignioris anni,  
 Meos Lares frequentas;  
 Male fida, vulturina

Fuge tecta, quæ volatu  
 Vagabunda, ludibunda  
 Perstringis inquieto.  
 Fuge noxios Penates;  
 Luteumque velle nidum,  
 Arguta quem vetusto  
 Instas locare tigno.  
 Fuge vultures edaces,  
 Mea tecta qui pererrant.  
 Nutricos vocarim  
 Nam vultures, Amorem  
 Quæ subsequuntur, atras  
 Tempus per omne Curas.  
 Implumis ille vultur:  
 Alas repandit ille:  
 Caput ille promit anceps  
 Nec clausus in tepente,  
 Sed nec solutus ovo:  
 Recentibus virescens  
 Nec vulturina Curis  
 Fœtura cessat unquam:  
 Qui sunt adultiores  
 Alunt recenter ortos;  
 Quos explicare pennas,  
 Docentque cuspidato  
 Rostro ferire, ut ungue.  
 Crebrescit ingruentis  
 Stridens fragor catervæ;  
 Quæ mirè adaucta, totas  
 Coïnquinavit ædes.  
 Nunc atrio vagantur;  
 Conclave nunc penetrant:

# IN ODAS ANACREONTIS. 329

Solarium voraces

Imas ad usque cellas

Jam possident: culinam,

Penumque, balneumque

Immunda turba vastat.

In lectulo cubanti

Adsunt; nigrisque somnos

Alis procul repellunt.

Si languidum refarcit

Ceres, bonusque Liber,

Revellit ungue prenas

Obscena turba fruges,

Nocentior Celeno.

Utinamque dona tantum

Raperent diurna mensæ;

Nec, ut solent, in horas

Laniata corda morfu

Depascerent profano:

Raptoris ut superbi,

Quem Caucasus trecentis

Circumligat catenis

Fibras, jecurque semper

Infesta carpit ales.

Fera vulturum duella,

Casusque docta nostros,

Cessas, Hirundo, cessas

Hinc avolare? diri

Domus cruenta Terei

Tibi non timenda tantum;

## IN ODEN. XXXIV.

## PALINODIA

In illa verba Sponsæ. Cant. I.

*Nigra sum, sed formosa.*

**O** Sponse, nigra culpis  
Quod sim, gravisque mille;  
Cave, negligas amantem,  
Cave, fugeris sequentem.  
Nam me pudere vitæ  
Si cæperit peractæ;  
Uberque fletus atrum  
Detergeat colorem;  
Lustralibus repente  
Formosa reddar undis.  
Color ipse quin nigellus,  
Animi dolentis index,  
Bene candido jugatur:  
Mage sæpius probantur  
Sic alba mista nigris  
Vacciniis ligustra.

IN ODAS ANACREONTIS. 331

IN ODEN. XXXV.

PALINODIA

*Post Christi Domini mortem superstitiosus  
Deorum cultus evertitur.*

CInctus virente fronde,  
Et floreis corollis,  
Superbiente Taurus\*  
Qui fronte nunc, peritâ  
Minatur in tabellâ;  
Felicioris ævi  
Cum Conditor fugabit  
Obscæna Monstra terris,  
Crucis sacras ad aras,  
Procumbet immolatus.

IN ODEN. XXXVI.

PALINODIA

*Rhetoricæ summa vis, & efficacia.*

Bona verba, scitulum  
Lusor senex\* Amorum.

Quo.

---

\* Juppiter Europæ raptor in tabula. Vide Anacr.

\* Anacreon in hac Ode parum commodè sententia de Rhetoricâ.

Quò te modesta Pitho  
Convicio, probroque,  
Noxâque provocavit  
Iram merente tantam?

Si despicata Virgo  
Hoc resciat; caveto:

Non tu feres inultum  
Fastidium superbum.

Ut rere, non inermem  
Ancillulam laceassis;

Nec tu madente tutò  
Quam despuas cavillo.

Jaculo, potensque fundâ  
Stridente, nam trifulcos

Rotat illa syllogismos;  
Dilemmatumque centum

Cornuta tela torquet:  
Et quos minax acervos,\*

Chrisippe, tu ministras.  
Pugnax Virago mille

Acinaces, sarissas,  
Frameasque, lanceasque

Intorquet; igneoque.  
Tonat ore, fulminatque.

Quid, insolens Gradivi,  
Quid audeas senectâ

Gelidus tot arma contra;  
Baccoque, Cypriisque

Jam perditus sagittis?  
Tu musteus lagenam

Dex.

\* Certus argumentandi modus, de quo vide Scriptores de Arte Rhetorica, & Commentarios in illum Persii versiculum Sat. 6. Inventus Chrisippe in suis acervis.



# IN ODAS ANACREONTIS 333

Dextrâ tremente; lævâ  
 Eburneamque buxum,  
 Ridenda tela, gestas.  
 Quin protinus recanta  
 Incauta dicta; supplex  
 Properisque vince votis  
 Divæ potentis iram:  
 Tibi quam sequester ipse  
 Placabilem paciscor.  
 Tam dulce nam canentem  
 Te, dulcis ipsa, multum  
 Amat, æstimatque Pitho.

## IN ODEN. XXXVII.

### PALINODIA

*Annus vitæ Magister.*

**H**Yemalibus pruinis  
 Pars longa torpet anni.  
 Sibi reposcit æstas  
 Non impares, labori  
 Emancipata, soles.  
 Languet gravedinoso  
 Autumnus æger Austro.  
 Breve floribus renidet,  
 Breve ver amabilescque  
 Favonios reducit.  
 Intelligis quod Annus  
 Præscribit, admonetque?

Lon.

Longi, gravesque vitam  
 Exerceant labores;  
 Quam non cavenda perdat;  
 Attemperata solum  
 Sed condiat voluptas.

## IN ODEN. XXXVIII.

## PALINODIA

*Sileni exemplo senes à molli vitâ  
 deterrentur.*

ÆVo tremens inertî,  
 Silenus ora rugis  
 Sulcata jam gerebat,  
 Obstante nil senectâ,  
 Sed improbos amores,  
 Et ebrios trientes,  
 Et ludicras amabat  
 Acherunticus Choræas.  
 Ridere vinolentum,  
 Ridere saltitantem  
 Verum, proterva turba,  
 Non desinunt procaces  
 Fauni, levesque Panes.  
 Hinc languidos, asello  
 Male quos adaptat, artus  
 Ferulâ sonante cædunt:  
 Moris & ora pingunt,

# IN ODAS ANACREONTIS. 335

Ebulique nigra baccis.  
 Senex erat verendus  
 Capularis ille multum;  
 Nam fistulæ repertor,  
 Nutricius Lyæi,  
 Et præscius futuri,  
 Non laude claret unâ.  
 Sed fistulæ repertor,  
 Vatesque tantus; altor  
 Severus & Lyæi,  
 Fatuos senex amores,  
 Choreasque dum frequentat;  
 Magis hoc, magisque debet  
 Risum, jocumque lætis  
 Ridendus ille Faunis.

## IN ODE N. XXXIX.

### PALINODIA

*Ebrietatis deformitas, & vitia.*

**T**UO madescit, Evan,  
 Qui largius liquore;  
 Non ille duplicatas  
 Bene computat lucernas:  
 Rixantibusque tignis,  
 Illi tremit lacunar:  
 Illi ambulant columnæ;  
 Læti que nuptiales  
 Montes agunt choræas.

Tuo

Tuo madescit, Evan,  
 Qui largiùs liquore;  
 Vel torpet ille, Marfis  
 Ut Saga fascinavit  
 Infesta quem venenis.  
 Vel, impudente saltu,  
 Pulsat solùm, feritque;  
 Ut Appulus momordit  
 Quem stellio, per agros  
 Licentiùs vagantem.  
 Tuo madescit, Evan.  
 Qui largiùs liquore;  
 Vel in timenda dulces  
 Crateres arma vertit;  
 Ut Thessali Bimembres:  
 Furiata vel sinistris  
 Ut Orgiis Agave,  
 Petit obvios furenti  
 Crudelisense natos.  
 Tuo madescit, Evan,  
 Qui largiùs liquore;  
 Sibi maligna sæpe  
 Maturat ipse fata:  
 Anacreon ut olim  
 Acino subivit Orcum  
 Jugulatus ebriosâ:  
 Nimis vices amaras  
 Cui rettulit Lyæus,  
 Protervulis, bibosis  
 Laudatus usque chartis.

## IN ODE N. XL

## PALINODIA

*Lusus de Puero Jesu, dum serram  
duceret, vulnerato.*

CUM Serrulam paternā  
Divinus officinā  
Traheret Puer; tenellam  
Pupugit minuta cuspis,  
Guttā rubente dextram  
Tinxitque. Mater illuc,  
Tristes miserta casus,  
Accurrit; effluentem  
Exsugit & cruorem;  
Manu foveatque vulnus:  
Rigare quam perenni  
Videret ora fletu  
Cum Parvulus: quid autem  
Commovit una tantum  
Te gutta Mater? inquit.  
Secura pone fletus;  
Aut hos volens reserva,  
Fluenta fundet olim  
Cum sanguinis trabali  
Mihi dextra fixa clavo:

## IN EANDEM ODEN.

## ALIA PALINODIA

S. THERESIA *transfixo corde :*  
 S. CATHARINA SENENSIS  
*sine corde vivit .*

**P**lâis Ephebus alis ;  
 Cœlesti ab arce lapsus ,  
 Ibericæ pudicum  
 Cor Virginis Sagittâ  
 Feriente victor hausit .  
 Procumbit illa ; certam  
 Et vulnerata mortem ,  
 Quam præstolatur , optat .  
 Ubi sed perinde vires  
 Superesse sensit ; ictu  
 Graviqûe corda vitam  
 Adaperta non relinquunt :  
 Quid hoc inusitati ,  
 Dicebat , astra , monstri est ?  
 Superstes utne vivam ,  
 Bellator ima corda  
 Cui tantus ære fixit ?  
 Hæc inter obstupenti  
 Sed adfuit curuli  
 Inventa nubæ Virgo ;

Lupa

# IN ODAS ANACREONTIS. 339.

Lupa cui dedisse turgent  
 Lætas Etrusca cunas.  
 Quid & stupefcis, inquit.  
 Quòd perfruare vitâ?  
 Tu læsa corde tantùm,  
 Ibera Virgo, vivis.  
 Mihi corde vel revulso,  
 Et exulante longe,  
 Meliore Sole, & aurâ  
 Jam contigit potiri.  
 Hos noveris superni  
 Lusus, jocosque Amoris.  
 Exercet ille sæpe  
 Sic intimos Alumnos;  
 Mortalibus solutos  
 Quos legibus gubernat.

## IN EANDEM ODEN.

### *Lusus Poëticus.*

**V** Erfos honestiorem  
 Ad barbiton recanto  
 Dum Tejos amores;  
 Perveneram venustâ,  
 Mellitulâque multùm  
 Ubi fabulâ docebar,  
 Mæsto Cythera Nato  
 Quid dixerit gementi;  
 Infesta cum momordit  
 Volucrem volucris ipsa

Apicula; osculari  
Fors arbitrata dextram;  
Temere rosas legentem;  
Novis amica mella  
Vel sugere è ligustris.  
Ut flecterem prophanos  
Ad honesta plectra cantus;  
Omnes vias retento.  
Sed irritam fatigat  
Animosa cura mentem.  
Serrâ rigente dictus  
Hinc faucius paternâ  
Mihi Domo Puellus,  
Columen, salusque Terræ.  
Iterumque mox supernâ  
Dignum latus pharetrâ,  
Cultrix Tagique, Virgo,  
Te nobilis canebam.  
Sed impares, rudesque,  
Longeque subsequentes  
Fatebar ipse cantus.  
Phæbus manu revellens  
Mihi tunc benignus aurem;  
Eho; quid, inquit, ultra  
Malè collocas inanes  
Audaculus labores?  
Fabella non recudi,  
Demens, reposcit ista:  
Hic ipse se recantat  
Anacreon; Amorem  
Ferâ damna dum ferentem  
Objurgat, increpatque:



IN ODAS ANACREONTIS. 341

Vanos omitte nifus.  
Lubentiis refertum  
Charitumque flore carmen  
Æquare nam canendo  
Nec Phæbus ipfe poffem.

IN ODEN XLI.

PALINODIA

In illa verba Chrifti Domini Jo. 15.

*Ego fum vitis vera.*

**S**UM vera Vitis; agris  
Sed non Opimianis,  
Rhodiisque nata glebis.  
Me non aprica Lesbos;  
Me non jugosa Crete;  
Nec protulit feraces  
Methymna nigra colles.  
Nondum flagrante curru  
Coquebat arva Titan;  
Prægnans liquore nubes  
Pluviis rigare toftas  
Nec cæperat novales;  
Cæleftibus viretis  
Bene culta cum nitebam,  
Spatiis coacta nullis;  
Ignota quæftuofi

Y 3

Et

Et falcibus coloni.  
 Labentibus sed annis,  
 Ho'pes solum subivi;  
 Colu'que Nazaræ  
 Intacta culta terræ:  
 Mox infitiva primùm  
 Bethlemicis in oris  
 Educta, blandientes  
 Cincinnulos, novellos  
 Et palmites ferebam.  
 Sublimis inde crevi;  
 Imbresque per cruentos,  
 Æstusque per malignos;  
 Statuminata clavis,  
 Duris'que secta flagris,  
 Robustiore trunco,  
 Solimejos tenebam  
 Procera Vitis agros.  
 Cœlestis ille demum  
 Ruris Colonus, ægrè  
 Viduam jacere passus,  
 Tibi me, decora, dulcis,  
 Longis petita votis,  
 Sociavit Arbor; alto  
 Cui colligata Clivo  
 Hinc subditis pependi  
 Affixa, & hinc lacertis.  
 Celso jugata trunco,  
 Repente vina fudi,  
 Quæ præla Formianis  
 Non intulere cellis;  
 Sordens lacuque pressit

Non

# IN ODAS ANACREONTIS. 343

Non vinitor Caleno.  
 Ubi sed beatus omnes  
 Abiit liquor per oras;  
 Et ebrium piavit  
 Lustralis humor orbem;  
 Revirente fronde, botris.  
 Iterumque me novellis  
 Victrix ad astra tollo,  
 Non sarculos, severæ  
 Morsusque falcis ultra  
 Passura, nec bipennes.  
 Nec longa transmeabit  
 Ætas, utrumque Solem,  
 Vasti sinusque ponti  
 Cum protegam, racemis  
 Per litus omne fufis;  
 Amplectar & repostas  
 Umbrâ favente terras.

## IN ODEN. XLII.

### PALINODIA.

*Hercules molli otio deformatus.*

**S**ordentibus ferino  
 Digitis cruore fufum  
 Cum degener rotaret;  
 Tremereque iussa Lidæ  
 Tyrinthius Puellæ;  
 Risit Noverca Juno,

Y 4

Mo.

Monilibus ligata  
 Robusta colla cernens,  
 Quibus astra, Cœlitesque  
 Impar fuere pondus:  
 Sidoniâque pallam  
 Humeros obire conchâ;  
 Sublatus unde terror  
 Nemeæus ille longas  
 Jecit decenter umbras.  
 Pacatus orbis illi,  
 Excisa monstra, & omnes  
 Periere tunc labores.  
 Orco stupente tractam  
 Jactet luem trifauce, n;  
 Lernæ hospitem colubrum,  
 Tricorcoporemque tollat  
 Iberiæ Tyrannum:  
 Dum lenta pensa ducit  
 Manus otio relanguens;  
 Hydramque, Cerberumque,  
 Stymphalidasque, & omnes  
 Amisit ille pestes.

## IN ODEN. XLIII.

## PALINODIA

*Cicada Inertiæ: Formica Prudentiæ  
typus.*

**N**emusculi frequentas  
O quæ virentis umbram;  
Validosque Solis æstus,  
Noto canora trunco,  
Æstiva fallis ales;  
Quàm me vices iniquæ,  
Et acerba fata tangunt,  
Quæ te vocant, manentque.  
Valentulas fatigas  
Tu læta semper alas;  
Redintegras acutâ  
Hilaresque voce cantus;  
Pictis micæque pennis;  
Tibi que plaudis, omnem  
Arguta dum pusillo  
Obtundis ore Sylvam.  
Sed te moveret algens  
Si bruma, quæ propinquat,  
Arbusta voce demens,  
Non finderes inani;  
Labor omnis in fugaces  
Tibi nec periret auras.

Heu

Heu ter, quaterque fato  
Te flebilem sinistro!  
Cum pigra stringet annus  
Hibernus arva; frontem  
Properata cum nivosis  
Hiems jugisque tollet;  
Imbri, geluque victa,  
Stultos egena cantus,  
Dulcem simulque vitam  
Inhonora tunc relinques.  
Hæc providens, futuros  
Prælagiensque casus  
Formica, verberatos  
Cum torret æstus agros,  
Patiens laboris escam  
Humeris, levi que nitens  
Pectusculo, repostas  
Convectat in latebras;  
Farris gravesque acervos,  
Et horreum cavato  
Studiosa stipat antro.  
Mox, appetente brumâ,  
Occulta delitescit;  
Obsoniis paratis  
Lautas struitque mensas.  
Industrius, nigerque,  
Et granifer popellus  
Casus docere vitæ,  
Variosque possit usus,  
Non te, Cicada, solum;  
Quæ perstrepsens inerti  
Mæl feriata cantu,

# IN ODAS ANACREONTIS. 347

Brumæque, languidæque  
Non prospicis senectæ;  
Sed Porticus alumnos,  
Rixantis & Lycæi  
Zenone posset ipso  
Sapientior docere;  
Docere posset ipsa  
Sapientior Stagira.

## IN ODEN. XLIV.

### PALINODIA

*Vita minus honestæ damna somnio  
expressa.*

**M**ihi plura per soporem  
Simulator ora Morpheus  
Dum ludibundus offert;  
Sublimis hinc rotato  
Miseras Tridente turbas  
Neptunus obruebat:  
Gradivus inde letho  
Numero dabat carentes  
Mortalium catervas.  
Nil, quod periret ultra,  
Supersse cum putarem:  
Cyathum ferens Lyæus,  
Blandum Venusque cestum,  
Vastata funerabant

Per

# 348 PALINODIÆ

Per mille Regna clades.  
 Minimùm nocere visus  
 Mihi tunc ferox Tridente  
 Neptunus; efferâque  
 Minimùm Gradivus hastâ.

## IN ODEN. XLV.

### PALINODIA

S. PAULUS APOSTOLUS A CHRISTO DOMINO  
*commonitus, ad bonam frugem se  
 recipit.*

**C**Ælesti ab arce misso  
 Amor Supernus igne,  
 Postquam piavit orbem  
 Feliciter flagrantem;  
 Victor ferebat arcum  
 Et aureas sagittas:  
 Domito timendus Orco:  
 Sed pervicax, rebellis,  
 Minasque, sanguinemque  
 Spirans ubique Saulus  
 Negabat obsequenti  
 Jugum subire collo.  
 Quin impotens, ahenò  
 Umbone frætus, hastâ  
 Et fulgurante, latos  
 Præ se metus agebat.  
 Tempus, locumque nactus,

Amor



# IN ODAS ANACREONTIS. 349

Amor obvius sagittâ  
Hunc sternit; & sereno  
Effatus ore: tela  
Nunc experire nostra,  
Hostis superbe, dixit.  
Equo volutus alto,  
Et luce cassus ille  
Frustra diem requirit.  
Cui Victor: hinc amare;  
Et arma ferre, dixit,  
Feliciora disces.

## IN ODEN. XLVI.

### PALINODIA

*Amoris profani certa perniciēs.*

**R**Es est, amare, dulcis;  
Dicebat Oppianus;  
Primâ ferox juventâ,  
Cirratulusque lætas  
Cum duceret Choræas:  
Nodosa sed molestis  
Cum nexibus podagra  
Ægros ligaret artus:  
Cum depilatus; atrâ  
Scabięque fœdus, omnes  
Fugit infrequens amicos;  
Res est, amare, dura;  
Dicebat Oppianus.

## IN ODEN. XLVII.

## PALINODIA

*David Rex nudus ante Arcam saltat.*

CUM nudus ante facram  
 Rex profiliret arcam  
 Jessæus; ausa Conjux  
 Illiberalis illum  
 Vocare morionem.  
 Sed Rege major intus  
 Oculis erat Tonantis,  
 Qui, Scurra visus extra,  
 Fallebat impudentem.

## IN ODEN. XLVIII.

## PALINODIA

*Vindiciæ Homericæ Lytæ.*

ACCURRE Musa; bella  
 Cui sunt, & arma cordi,  
 Invade Anacreontem:  
 Lyram, nefas! Achæi  
 Pertrahat ille Vatis,\*  
 Vano labore nervos

Non

---

\* Homeri Lyram in hac Ode poscit Anacreon.

IN ODAS ANACREONTIS. 351.

Non bellicos requirens.  
Tactu viden' soluto  
Ut masculas, pudendum!  
Enervat ille chordas?  
Age, Diva, marcidique  
Senis manu dolentem  
Testudinem revele.  
Tibi debitas Pelasga  
Reddet caterva grates;  
Reddet ferox Achilles;  
Reddetque fortis Ajax.  
Nam languidis lacertis  
Torpere bellicosam,  
Innoxiamque buxum;  
Dolet ferox Achilles,  
Doletque fortis Ajax.

IN ODE N. XLIX.

PALINODIA

*Annus Sacer secularis Picturâ expressus*

**A**Udis sonora, Pictor,  
Metalla sæcularem  
Ut auspicantur annum?  
Ut turribus fragorem  
Dant æra pulsa sacris?  
Sanctosque mox ituros  
Lustrato ut orbe Soles,

Tibe-

Tiberina ter sonanti  
 Indicit Arx boātu?  
 Mæstas beante terras  
 Redeunte luce, lætam,  
 Et Orbis hospitem  
 Effinge, Pictor, Urbem.  
 Conferta Vaticani  
 Ædem, Forumque turba  
 Fac compleat, prematque:  
 Sed Porticus capaces  
 Attolle, devoluta  
 Ubi mallei nitentis  
 Cæmenta sacra ad ictus  
 Aditus diu petitos,  
 Et hospitale pandant  
 Ad celsa Tempia Limen.  
 Quod si perita tantum  
 Permittit ars; dolorem  
 Appinge, lachrymasque  
 Mœrentis Urbis, ægros  
 Languere quæ lacertos \*  
 Malè sustinet, saluti  
 Tot gentium recludi,  
 Piaculare, sacrum  
 Quibus ostium petebat.

IN

---

\* INNOC. XII. morbo detentus Sacrum Limen, aperire non potuit.

IN ODAS ANACREONTIS. 353.

IN ODEN. L

PALINODIA

*In Diem Sacram Cinerum.*

**S**ubmitte colla sacro  
Cineri, ferox Juventus;  
Regnante quæ Lyæo,  
Pictis amicta larvis,  
Dionysiis, furebas,  
Ut Orgiis aguntur  
Mimallones Sorores:  
Sed non comis receptus  
Subeunda fata pulvis  
Indicat ille, fædos  
Prius fragrante Cypro  
Quàm terferis capillos.  
Aspersus ille, fastu  
Ventosa corda, pulvis  
Tunc protinus retundat:  
Curas humoq̃ue mersas,  
Et devias, Honesti  
In tramitem reflectat.  
Sic parvulæ coruscis  
Dum præliantur alis,  
Cient apesq̃ue Martem;  
Si jactus arte pulvis  
Intercepit vagantes,

Z

Re-

Redit immemor minarum,  
 Cellasque turba complet;  
 Et dulciora mella  
 Positâ laborat irâ.

## IN ODEN. LI.

## PALINODIA

*Ulysses Sirenum Victor.*

**Q**uis elegans disertâ  
 Cælator arte finxit  
 Acheloïdes Puellas;  
 Et expedita fortes  
 Retinere vela Cantus?  
 Modos viden' procaces  
 Sopita per latentes  
 Ut haurit unda cautes?  
 Oblita & aura cursus,  
 Viden', silente pennâ,  
 Inebriata dulces  
 Ut combibit querelas?  
 Malo ligatus alto  
 Laërtius canoras  
 Sed præterit, carinâ  
 Procul volante, fraudes.  
 Quibus ille si paratas  
 Victus dedisset aures;  
 Immane vinolenti

IN ODAS ANACREONTIS. 355

Frustra Cyclopi antrum,  
 Titaniamque Circen  
 Vitasset; irritoque  
 Vigil labore Conjux  
 Dissolveret diurnas  
 Pudica nocte telas.

IN ODEN. LI.

PALINODIA

*Najadum Hymnus Lycurgo post Thracie  
 Vites excisas.*

CUM, Thracios per agros,  
 Excisa ponderosis  
 Securibus jacerent  
 Vineta; nec refusis  
 Hebrumque, Strymonemque  
 Prætexerent racemis:  
 Sic amnium feruntur,  
 Nymphæque vitreorum  
 Sic fontium locutæ.  
 Jo: canamus Jo;  
 Sublimis efferatur  
 Hilarique ad astra cantu  
 Bipennifer Lycurgus;  
 Nostris removit oris  
 Veneficum, nigrantem

## 356 P A L I N O D I Æ

Qui sanguinem Lyæi.  
 Adeste nunc, Sodales:  
 Vacuis relicta campis  
 Sarmenta, palmitesque  
 Læto crememus igni:  
 Inter levesque flammæ  
 Saliamus; implicatas  
 Ducamus & Choræas:  
 Cantuque ter secundo,  
 Jo: canamus, Jo;  
 Superisque par feratur,  
 Merito sacratæ Hymno,  
 Bipennifer Lycurgus.  
 Threïssa non juvenis  
 Lymphata compitali  
 Ultra furore sævit.  
 Nec, dum premuntur altis  
 E populis racemi,  
 Agrestiumque nudo  
 Pede pressa multa fervent,  
 Conviciosa pubes  
 Audet, nefas! vetusto  
 Effræna more, candor  
 Quæ ferre nec pudicus;  
 Sed nec referre possit.



## IN ODEN. LIIL

## PALINODIA

*Granadillus.* \*

**C**Anamns eruditum,  
 Ad nos recens profectum  
 Indis ab usque florem;  
 Novosque Vere cultus  
 E barbaro ferentem.  
 Non frondibus cruentis  
 Inscriptus ille monstrat  
 Salaminium Tyrannum.  
 Tibi non, Adoni, debet;  
 Tibi nec, Puella, vitam;  
 Effræna quem peremit  
 Vocalis ira Nymphæ.  
 Sed axe sub remoto  
 Misertus ille pœnas  
 Regis procul Superni,  
 Suos colorat artus  
 Vestigiis, notisque  
 Solimeji furoris.  
 Et cum ferina corda  
 Sensus necis probrosæ  
 Non tangeret, dolorque;

Z 3

Ju-

\* *Flos Indica vulgo Flos Passionis.*

Juuentus in reposto  
 Flos orbe, luctuosam  
 Prasentiente mortem  
 Qui fronde, perduellem  
 Frangens refellat ultor,  
 Coarguatque gentem.  
 Nam cædis auspicatæ  
 Fidelis ille Signa,  
 Satellitumque tela  
 Sinu loquente vulgat.  
 Nimis ille durus olim,  
 Mollescit hinc, acutus  
 Subhorridoque triplex  
 Nigrescit ære Clavus:  
 Sublimis inde frontem,  
 Sacri cruoris ostro  
 Madens Columna tollit.  
 Vernare quid rigentes  
 Mentita ferta dumos;  
 Hastile quid refossi  
 Lateris sitire dicam  
 Undamque, sanguinemque?  
 Nam flos salubre signat  
 Quadratus ipse robur,  
 Nostræ salutis Author  
 Ubi noxias cruento  
 Piavit imbre terras.  
 Sic, Indicis in oris  
 Atratus arma duræ  
 Flos cædis indicabat;  
 Piæque convolutus  
 Ornabat arva pœnis.

Seu natus ille primùm  
 Nova monstra cum refudit,  
 Domino siemens adempto,  
 Caliginosa tellus:  
 Ignotus ille longos  
 Seu prævius per annos  
 Flos vixerit; nefando  
 Proluferitque letho.  
 Quæcumque, Flos, ad auras  
 Sed te vocavit hora,  
 Te molliter rigentem,  
 Austerulum, jocosum,  
 Lætumque, flebilemque,  
 Qui mille, Flos, honores,  
 Laudesque mille misces;  
 Qui me meos amores  
 Lugere vulneratos,  
 Lugere funeratos,  
 Memor ipse, gratus ipse  
 Doces, monesque semper;  
 Mihi sola tu voluptas;  
 Mihi cura tu, decusque  
 Eris ultimas in horas.  
 Primumque fronde Regem  
 Ut exprimis, notasque;  
 Censebere inter omnes  
 Sic primus ipse flores.  
 Ne languidas resolvat  
 Æstiva flamma frondes;  
 Perennibus virentem  
 Te fletibus rigabo:

Brumalis aura molles  
 Et ne comas adurat,  
 Non te fovere parcam  
 Suspiriis trementem.  
 Quodd siqua forte nostri  
 Meruere ferta crines;  
 Non æstimata laurus,  
 Ederæve tortuosæ;  
 Meos sed ipse cinges  
 Clavisque, Lanceisque  
 Virentibus capillos.

## I N O D E N. LIV.

## PALINODIA

*Potio Cocolatis senibus  
 salutaris.*

**P**ocilla Mexicanis  
 Onustiora succis,  
 Puer, ingeras frequenter.  
 Senecta jam propinquat  
 Rugosa, lusciosa,  
 Nitens levi bacillo.  
 Male sit tuis ahenis  
 Quibus Æsonem recoctum

Ver-

# IN ODAS ANACREONTIS 361

Vernantibus juventæ,  
 Medea, reddis annis.  
 Male sit Duci que Ibero,  
 Qui comminuta membra,  
 In aggerata sectum  
 Seseque frustra condi  
 Fimo calente jussit;  
 Præceps carere vitâ,  
 Insanit impotenti  
 Quam prorogare voto.  
 Non Colchici lebetes;  
 Novaculæ fenestram  
 Non auferunt Iberæ;  
 Ingesta sed frequenter  
 Pocilla Mexicanis  
 Onustiora succis.

## IN ODEN. LV.

### PALINODIA

#### *De Aulicis.*

**A**bstusa corda, sensus  
 Et intimos revelat  
 Vario colore vultus.

Su-

\* Marchioni de Villena Nobilissimo Hispano, quem se frustulatim concidi, certisque medicamentis imbutum, ut inde aliquando redi-vivus exurgeret, vitrea in urna condi jussisse, mendax haud dubio fama tenuit.

Subito rubore præceps  
 Depingit ira frontem.  
 Maculis, notisque livens  
 Color inficit malignis,  
 Sors, tabe virulentâ,  
 Aliena quos adurit.  
 Meticulosus albet:  
 Animus nigrescit æger;  
 Pallent leves Amantes.  
 Fulgor nitentis Aulæ  
 Sed quem capit; rotæque  
 Vincitum suo pte voto  
 Ixionem gubernant  
 Regnantis ora; certis  
 Mihi notus ille signis.  
 Nam livet, albet ille,  
 Rubet, simulque pallet;  
 Promiscuos & unâ  
 Centum resumit horâ,  
 Et innovat colores.

## A U T H O R

*Ad Libellum Palinodiarum.*

**F**Ugitive, quod sinistro  
 Pedes commigras, Libelle;  
 Audacibus caminis  
 Qui venditas recoctum;

Et

# IN ODAS ANACREONTIS. 363

Et malleo subactum  
Tundis, scelus! retundis;  
Novitioque priscum  
Recudis ære Vatem?  
\* Petiliæ notandam,  
\* Sempronizque frontem  
Ne debeas, caveto.  
Tibine melle puro  
Mellitior Poëta;  
Aganippidum Sororum  
Medulla, corculumque;  
Tibine blandus ille  
Anacreon venustos  
Miserè retortus artus,  
Divaricatus, excors,  
Cætus virûm frequentet?  
Facinus recens, malumque  
Graviter ferent Amici  
Vatisque, Apollinisque, \*  
Qui Tejam Camenam,  
Tuos, amica Phæbo,  
Tellus Ethrusca colles;  
Docuere bellicosum  
Vel Sequanam sonare.  
Ronsardus hoc gravatè  
Feret ille Gallicanæ

Prin.

---

\* Petilie legi: de ambitu.

\* Sempronio legi: de Injuriis.

\* Poëte illustres, qui Æthruscis, & Gallicis numeris Anacreontis  
Odas reddiderunt. Eos verò retulimus, qui nobis innoscerunt:  
quod propterea dictum volumus; ne, si qui fortè præteriti sunt, in  
silentium nostrum sinistrorsum accipiant.

Princeps, Paterque Musæ:  
 Bellovius simulque;  
 Longeperusque; molli  
 Et major Anna sexu,  
 Doctæque par Minervæ.  
 Quibus adde Regnierum,  
 Garumna quem canentem,  
 Tagus volutus auro,  
 Latiusque Tiberis, ipse  
 Stupetque delicatis  
 Suspensus Arnus undis.  
 Sociata signa jungent  
 Capponus, igneoque  
 Torcillianus ore;  
 Et quos dedit canoros  
 Tyrrena Flora cycnos,  
 Corfine, te; sequuntur  
 Quem comptuli lepores:  
 Salvine, te; venustas  
 Quem munda tollit astris.  
 Acies, Libelle, vatum  
 Hæc te, timenda multum,  
 In jus trahet vocatum  
 Si fortè; tu remisso  
 Sedatus ore; pauca  
 Sic pervelim reponas.  
 Qui me recens Libellum  
 Vulgavit Author, ipsum  
 Anacreonta lento  
 Fessus sopore vidit:  
 Ut assolet, venusto



# IN ODAS ANAGREONTIS. 365

Qui sic locutus ore.  
 Grajà potens Camenâ,  
 Qui blandulos amores,  
 Bromium Patremque lusi;  
 Latioque, Gallicoque,  
 Æthruriæque docto  
 Donatus ore, totum  
 Jam perlegor per Orbem.  
 Sed sunt, severiori  
 Qui fronte me repellunt,  
 Ut nequiter jocosum,  
 Curii, Xenocratesque.  
 His ut placere possim,  
 Te scilicet reposco.  
 Hunc tu meis laborem  
 Impende, amabo, chartis;  
 Talemque me refinge;  
 Qualem Cato severus,  
 Privignus atque Phædræ,  
 Audire comodaque  
 Vestalis aure possit:  
 Effatus hæc, in auras  
 Recessit ille: somnum  
 Tunc fronte terfit Author;  
 Charique jussa Vatis  
 Obtemperans facessit;  
 Vigilique me lucernâ,  
 Morsoque navus ungue  
 Format; manuque mittit.  
 Audin? quid ergo, Vatum  
 Ultra molesta torques

Tu

366 P A L I N O D I Æ

Tu me Caterva? jussit  
Qui spontè se recudi,  
In Jus licebit ipsum  
Vocare Anacreontem.

F I N I S.

*Errata*

# Errata

# Corrige.

Pagina	10.	Vers.	ult.	Urfos,	Urfos.
Pag.	17.	V.	6.	ille diem.	ille diem;
Pag.	20.	V.	9.	sitiret	sititet;
Pag.	22.	V.	5.	referant;	referant
Pag.	31.	V.	ult.	habet	habet.
Pag.	60.	V.	12.	sivus	sinus
Pag.	81.	V.	6.	Aquillas	Aquillas
Pag.	127.	V.	7.	vitæ,	vitæ
Pag.	137.	V.	8.	tibi	tibi
Pag.	160.	V.	2.	Inde	Indi
Pag.	178.	V.	11.	Josuz,	Josuz
Pag.	180.	V.	3.	mortu	morsu
Pag.	219.	V.	13.	benignos	benignus
Pag.	236.	V.	9.	triduane	triduanâ
		V.	11.	confragiosos	confragosos
Pag.	252.	in	Notis.	de utriusque	de utrisque
Pag.	217.	V.	23.	commonstraret	commonstrarent
Pag.	272.	V.	9.	beatè	beate
Pag.	284.	V.	16.	Hospitium	Hospitum
Pag.	292.	V.	11.	Superbæ	superbæ
		V.	19.	ipsâ	ipfa
Pag.	296.	V.	2.	numinis	Numinis
Pag.	305.	V.	20.	Surgat	furgat
Pag.	346.	V.	ult.	Meal	Male

MAG 2014961

[illegible][illegible]

